

Jág₁ Dse₃ quió'₅ Diú₄ a₂ca₂tó'₂ San Juan₅₄ ne₄ Si₂

Jág₁ quió'₅ Diú₄ a₂lín₅ dsa₂ mi₂güí₃

- 1** ¹ Lia'₂ con'₂ le₂'uig₅₄ jme₁ca₂rë₃lióg₃, jme₁ma₂chan₂ i₂të'₂ Jág₁;
jaun₂ i₂'éi₂ i₂lín₅ Jág₁ né₃, jme₁'ein₅₄ quian'₅₄ Diú₄; Diú₄ bá₄
jme₁lín₄ ján₃. ² Jaun₂ lia'₂ con'₂ le₂'uig₅₄, 'éi₂ né₃, jme₁'ein₅₄ quian'₅₄
Diú₄. ³ Të₂le₃ quian'₅₄ 'éi₂ bá₄, ca₂lë₃ ca₂le₃jë₃ 'e₂ a₂cha₂; ca₂lia'₂ 'i₁caun₂
tsá₃ ca₂rë₃chá₃ jua'₅₄ tsá₃ ca₂jmo₃ 'éi₂.
⁴ Ja₁con₂ 'éi₂ bá₄ já₅ bí₂ a₂le₃chan₂ dsa₂; bí₂ jaun₂ né₃, lé₅ Si₂ a₂tág₅
ja₁con₂ dsa₂ mi₂güí₃. ⁵ Tág₅ Si₂ jaun₂ jë₄ qui₁né'₃, la₁ qui₁né'₃ né₃, tsá₃
ma₂ca₂tió'₃.
⁶ Ca₂rë₃chán₃ jan₂ dsa₂ i₂chen₄ quián₅ Diú₄, i₂chen₂ Juan₅₄. ⁷ Ca₂guain₃
ca₂jáng'₃ jág₁ dsau₅ të₂le₃ quió'₅ 'éi₂ i₂lín₅ Si₂, ia₁jaun₂ të₂le₃ quian'₅₄
jág₁ dsau₅ a₂jáng'₅ në₅, le₃'én₂ ca₂le₃jín₃ dsa₂.
⁸ On₃jua'₅₄ Juan₅₄ 'éi₂ i₂jme₁lín₄ Si₂; jnia'₅₄ con'₂ i₂jáng'₅ jág₁ dsau₅ bá₄
jme₁lín₄, jui₁lia'₂ le₃quió'₅ Si₂.
⁹ Jme₁ma₂guán₂ i₂lín₅ Si₂ të₃dsón'₂, a₂tág₃ ja₁con₂ le₂jan₂ le₂jan₂ dsa₂
mi₂güí₃.
¹⁰ I₂'éi₂ i₂lín₅ Jág₁ jme₁'ein₅₄ mi₂güí₃; jaun₂, o₁jnia'₅₄ ca₂lë₃ mi₂güí₃
të₂le₃ quian'₅₄ 'éi₂, tsá₃ ca₂rë₃cuig₅ dsa₂ mi₂güí₃.
¹¹ Guain₃ jin₄ dsa₂ go₅₄, la₁ dsa₂ go₅₄ né₃, tsá₃ ca₂guei₃.
¹² La₁ia₁ i₂con'₂ ca₂guei₃, i₂ca₂rë₃'én₂ të₂le₃ quió'₅, dsa₂ 'éi₂ né₃ ca₂cué'₃
bí₂ a₂lén₂ chi'₂-guein₂ quián₅ Diú₄.
¹³ Jui₁lia'₂ chi'₂-guein₂ 'éi₂, on₃jua'₅₄ ca₂rë₃chán₃ lia'₂ con'₂ lé₅ jmi₄
dsa₂ mi₂güí₃, on₃ guë'₂ lia'₂ con'₂ lé₅ dsí₅ dsa₂ mi₂güí₃, on₃ guë'₂ lia'₂
con'₂ lé₅ dsí₅ jan₂ dsa₂ ñe'₂, ton'₂ ca₂rë₃chán₃ le₃quió'₅ Diú₄ bá₄.
¹⁴ I₂'éi₂ né₃ i₂lín₅ Jág₁, ca₂can₃ ñi₄ dsa₂ mi₂güí₃, ca₂guá₂ jë₄ quián₂
jniog₄. Jnia'₅₄ né₃ ma₂ca₂jag₅₄ a₂co₂'né'₅ quió'₅, co₂'nió'₄ a₂co₂'né'₅ quió'₅
jan₂ tan₅₄ Ja₁ñi'₅₄ Diú₄, i₂já₅ ja₁con₂ Jmei₂, rë₂rín₅ a₂dse₃ dsí₅, a₂rë₂ti'₅₄
né₃.
¹⁵ Ca₂jáng'₃ Juan₅₄ jág₁ dsau₅ të₂le₃ quió'₅ 'éi₂, ca₂juá'₂ tiá₂:
—I₂la₂ bá₄ 'éi₂ i₂lín₅ jniá₂, lia'₂ con'₂ jme₁ca₂juá'₃: “I₂já₅ cang₂ gué₄
con'₂ gué₄ jniá₂, dsein₅₄ gué₄ con'₂ gué₄ jniá₂, ia₁ jme₁ma₂chain₂ jniá₅
gué₄ con'₂ gué₄ jniá₂.”
¹⁶ Ca₂le₃jág₃ bá₄ jniog₄ ma₂qui₂ma₂guéi₂ a₂tson₂ a₂dse₃ dsí₅ 'éi₂, caun₂
qui₂jme₂gu'₅₄ bá₄ Diú₄ jniog₄ lia'₂ i₂gú'₃.
¹⁷ Ca₂ñag₂ jniog₄ Si₂ 'Éi'₃ të₂le₃ quian'₅₄ Moisés, la₁ia₁ të₂le₃ quian'₅₄
Jesucristo bá₄ ca₂já₃ a₂dse₃ dsí₅ Diú₄, ca₂rë₃ti₃ jág₁ dsau₅ né₃.
¹⁸ Lia'₂ 'i₁jan₂ tsá₃ 'ein₂ ma₂jín₂ Diú₄ lia'₂ 'i₁cón'₂; la₁ia₁ Ja₁ñi'₅₄ i₂jan₂
tan₅₄ 'éi₂ quiáin₅, i₂'en₅₄ ja₁con₂ Jmei₂, i₂'éi₂ bá₄ ma₂jmo₃ jág₁ dsau₅ 'a₂
lia'₂ lín₅ Diú₄.

**Jáng' ₅ jág₁ dsau₅ Juan₅₄ i₂chon₅ dsa₂ jmig₂,
 jui₁lia' ₂ i₂'ein₂ 'éi₂ Jesucristo
 (Mateo 3:11-12; Marcos 1:7-8; Lucas 3:15-17)**

¹⁹ Jaun₂ le₂la₂ jág₁ a₂ca₂jáng' ₃ Juan₅₄ jme₁ca₂chen₃ dsa₂ can' ₅₄ quián₅
 dsa₂ judíos i₂tion' ₅₄ Jerusalén ca₂chein₃ jme₂dsa₂ quiain' ₅₄ levitas ne₄
 Juan₅₄, a₂i₁ṇag₁₂ i₂'ein₂ 'éi₂.

²⁰ 'Éi₂ né₃ ca₂jmo₃ jág₁ lia' ₂ rē₂jiá₃, ca₂juá' ₂:

—On₃jua' ₅₄ jniá₂ líng₅ I₂rē₂'ín₁ quián₅ Diú₄.

²¹ Jaun₂ ca₂ṇag₃ táng₃ dsa₂:

—¿'Ein₂ 'ne₂ jaun₂? ¿'Ne₂ líng' ₅ Elías i₂jme₁'é₂ jág₁ o₄quió' ₄ Diú₄?

Jaun₂ ca₂juá' ₂ Juan₅₄:

—On₃jua' ₅₄ 'éi₂ jniá₂.

Dsi₂jui₅ le₂jaun₂ bá₄ ca₂ṇag₃ táng₃ dsa₂:

—¿On₃ bá₄ 'ne₂ líng' ₅ i₂'é₂ jág₁ 'éi₂, i₂lé₅ jág₁ jiá₃?

Jaun₂ ca₂ṇag₃ Juan₅₄:

—Jan₂'ón₄.

²² Jaun₂ bá₄ ca₂juá' ₂ dsa₂ ca₂tsí' ₃ Juan₅₄:

—¿'Ein₂ lín' ₅ 'ne₂, jaun₂ né₃? Jua' ₅₄, ia₁jaun₂ dsi₁con₁ jnia' ₅₄ jág₁ dsau₅
 ne₄ dsa₂ i₂ca₂chei₃. ¿'Ein₂ juá' ₂ 'ne₂ líng' ₅?

²³ Jaun₂ ca₂ṇag₃ Juan₅₄:

—Jniá₂ bá₄ líng₅ i₂'éi₂ i₂juá' ₂ jág₁ tiá₂ caun₂ 'uë₃ quein₂ co₂'ṇiog₅
 i₁juá' ₄: “Nia₄ 'nia' ₂ caun₂ jui₅ co₂dsau₅ quió' ₅ Te₁gui' ₅₄.”^a

²⁴ Dsa₂ i₂i₁len₅₄ i₁dsia₂ jág₁ quian' ₅₄ Juan₅₄, dsa₂ i₂chen₄ quián₅ dsa₂
 fariseos bá₄ 'éi₂, ²⁵ jaun₂ ca₂ṇag₃ ca₂ṇí' ₃ táng₃ Juan₅₄:

—Chi₂jua' ₂ on₃jua' ₅₄ 'ne₂ líng' ₅ I₂rē₂'ín₁ quián₅ Diú₄, on₃ guë' ₂ Elías,
 on₃ guë' ₂ jan₂ i₂'é₂ jág₁ o₄quió' ₄ Diú₄ né₃, ¿'e₂ ta₁ 'eng' ₅₄ tsóng' ₅ dsa₂
 jmig₂?^b

²⁶ Jaun₂ ca₂juá' ₂ Juan₅₄:

—Jniá₂ tiáng₅ dsa₂ jmig₂; la₁ia₁ jin₄ 'nia' ₂ chan₂ jan₂ i₂tsá₃ cuin' ₂
 'nia' ₂. ²⁷ Já₅ jan₂ cang₂ guë' ₄ con' ₂ guë' ₄ jniá₂, on₃jua' ₅₄ 'ein₂ lín₅ jniá₂
 jua' ₅₄ ca₂tíng₂ tsi' ₅₄ lau₂ ton₅ tag₅₄.

²⁸ Ca₂le₃jé₃ a₂la₂ ca₂lë₃ caun₂ ja₁chei₂ Betania,^c a₂nio₅ tē₂le₃ ja₁'ia₂
 'iog₂ tē₂le₃ quióng₄ Cuá₃ Jordán, ja₁jme₁'en₅₄ Juan₅₄ choin₂₃ dsa₂ jmig₂.^d

Jesús i₂lín₅ Guein₂ Já' ₂ Cha' ₂ quián₅ Diú₄

²⁹ Jme₁jnia₃ jaun₂, ca₂jín₂ Juan₅₄ Jesús a₂já₅ ja₂quiáin₃ ja₁chéin' ₄,
 jaun₂ ca₂juá' ₂:

^a23 Isaías 40:3.

^b25 lit. “¿'e₂ ta₁ 'eng' ₅₄ tiáng' ₅ dsa₂ jmig₂? ”

^c28 A₂lín₅₄ chog₅₄ si₂: “Betábara.” Juig₂ Betania siá' ₂ cau₅ Cuá₃ Jordán, uíng₂ ja₁nio₅
 Jerusalén; on₃jua' ₅₄ Betania ja₁jme₁guá₄ Lázaro quiain' ₅₄ 'io₅₄ riin' ₅₄.

^d28 lit. “ja₁jme₁'en₅₄ Juan₅₄ tiáin₂ dsa₂ jmig₂. ”

—Jag₄ 'nia'₂, i₂në₅ bá₄ Guein₂ Já'₂ Cha'₂ quián₅ Diú₄, i₂jñiá'₂ dsáu₁ dsa₂ mi₂güí₃.³⁰ I₂në₅ bá₄ 'éi₂ i₂'ín₅ jniá'₂, lia'₂ con'₂ jme₁ca₂juá'₃: “I₂já₅ cang₂ gué'₄ con'₂ gué'₄ jniá'₂, dsein₅₄ gué'₄ con'₂ gué'₄ jniá'₂, ia₁ jme₁ma₂chain₂ jñiá'₅ gué'₄ con'₂ gué'₄ jniá'₂.”³¹ Lia'₂ jñia'₅₄ 'ñi₃, tsá₃ jme₁guion₅₄ 'ein₂ 'éi₂; la₁ia₁ chón₅ dsa₂ jmi₂g₂ ma₂guio₃,^e ia₁jaun₂ le₃cuig₅ dsa₂ juig₂ Israel 'ein₂ 'éi₂.

³² Ján₃ bá₄ ca₂jáng'₃ Juan₅₄ jág₁ dsau₅ la₂, ca₂juá'₂:

—Ca₂jín₄ jniá'₂ Jme₂dsí₂ Jñi₃o₅ ca₂sióin₃ guei'₅₄ i₂juí₃ i₂jniá'₂ lia'₂ jniá'₂ jan₂ i₁ju₂, ca₂të₁gua₁ ne₄ quió'₅ 'éi₂.³³ Tsá₃ jme₁ma₂guion₄ bá₄ gué'₄ jniá'₂ i₂'ein₂ 'éi₂; la₁ia₁ i₂ca₂chei₃ jniá'₂ a₂chón₄ dsa₂ jmi₂g₂,^f ca₂tság₃ jniá'₂: “Jë₁ma₂ca₂jing'₅₄ Jme₂dsí₂ sióin₅ ne₄ quió'₅ jan₂ dsa₂ ñe'₂, i₂'éi₂ bá₄ qui₃tián₂ dsa₂ Jme₂dsí₂ Jñi₃o₅.”³⁴ Ma₂ca₂jñin₅₄ bá₄ jniá'₂, jaun₂ jáng'₅ jniá'₂ jág₁ dsau₅, a₂lín₅ 'éi₂ Ja₁ñi'₅₄ Diú₄.

I₂le₂'uig₅₄ dsa₂ guia₃-tín₂ quián₅ Jesús

³⁵ Jme₁jñia₃ jaun₂, jme₁'en₅₄ táng₃ Juan₅₄ ja₁jaun₂ quian'₅₄ gué'₄ on₃ dsa₂ i₂i₂nio₄ quian'₅₄.

³⁶ Jaun₂ jme₁ca₂jág₃ Juan₅₄ ca₂ñi₅ Jesús, jaun₂ ca₂juá'₂:

—Jag₄ 'nia'₂, i₂në₅ bá₄ Guein₂ Já'₂ Cha'₂ quián₅ Diú₄.

³⁷ Jaun₂ ca₂nág₂ le₃on₃ dsa₂ 'éi₂ a₂ca₂juá'₂, jaun₂ i₃lén₂ chi₁co'₅₄ quió'₅ Jesús.

³⁸ Jaun₂ né₃ ca₂jén'₃ Jesús të₂le₃ ca'₃, ca₂jñin₂ dsa₂ i₂i₃lén₂ chi₁co'₅₄ quió'₅, jaun₂ ca₂juá'₂ ca₂tsí'₃ 'éi₂:

—¿E₂ 'náu'₂ 'nia'₂?

Jaun₂ ca₂juá'₂ dsa₂ 'éi₂ ca₂tsí'₃ Jesús:

—Rabbí —co₂'nió'₄ le₃jua'₅₄: Të₅—, ¿Já'₄ ñéi'₂ 'ne₂?

³⁹ Jaun₂ ca₂ñag₃ Jesús:

—I₂nó'₅ 'nia'₂ i₂jag₄.

Jaun₂ i₃lén₂ i₁jag₅₄ já'₄ guá₅ Jesús, jaun₂ quian'₅₄ 'éi₂ bá₄ ca₂tóin'₂ të₁lia'₂ ca₂'láu₂ jmi₂g₄ jaun₂; ia₁ jme₁ma₂ca₂té₂ con'₂ hora ñi₁ quén₂ të₂le₃ ca₂'láu₂.^g

⁴⁰ Jan₂ i₂on₃ 'éi₂ i₂ca₂nág₂ a₂ca₂juá'₂ Juan₅₄, i₂i₃lén₂ chi₁co'₅₄ quió'₅ Jesús, jme₁chen₂ Dré₄ i₂lín₅ rin'₅₄ Si₂mu₅₄ i₂té'₂ dsa₂ Pe₄.

⁴¹ Dsi₂jui₅ né'₃ gué'₄ jaun₂ bá₄ ñe₄ Dré₄, i₁'nai'₂ Si₂mu₅₄ riin'₅₄, jaun₂ ca₂juá'₂ ca₂tsí'₃ 'éi₂:

—Ma₂dsán'₅ jñia'₅₄ Mesías, (co₂'nió'₄ le₃jua'₅₄, dsa₂ I₂rë₂'ín₁ quián₅ Diú₄).

⁴² Jaun₂ i₁jñia₃ Dré₄, Si₂mu₅₄ riin'₅₄ ja₁'en₅₄ Jesús, jaun₂ jme₁ca₂jág₂ Jesús né₃, ca₂juá'₂:

^e31 lit. “la₁ia₁ tiáng₅ dsa₂ jmi₂g₂ ma₂guio₃.”

^f33 lit. “la₁ia₁ i₂ca₂chei₃ jniá'₂ a₂tiáng₄ dsa₂ jmi₂g₂.”

^g39 lit. “hora guia₃.” 'Nio'₂ ja₁ton₅ Apéndice B.

—'Ne₂ líng'₅ Si₂mu₅₄, ja₁ŋi'₅₄ Jonás. La₁ia₁ le₃cheng'₂ Cefas.
Lia'₂ chen₂ Cefas ně₅, co₂'nió'₄ le₃jua'₅₄ Pe₄.^h

Té'₂ Jesús Felipe quian'₅₄ Natanael

⁴³ Jme₁jnia₃ jaun₂, ca₂lě₃ dsí₅ Jesús dsó₃ 'uě₃ Galilea, jaun₂ ca₂dsáin'₂ Felipe, jaun₂ ca₂juá'₂ ca₂tsí'₃ 'éi₂:

—Jme₁quiong'₅₄ jniá'₂.

⁴⁴ Felipe 'éi₂ ně₃, jme₁chain₂ juig₂ Betsaida, ján₃ bá₄ ja₁jme₁chan₂ Dré₄ quian'₅₄ Pe₄ ně₃.

⁴⁵ Fe₂li₄ 'éi₂ ně₃, ŋei₅₄ i₁'niai'₂ Natanael, jaun₂ ca₂juá'₂ ca₂tsí'₃ 'éi₂:

—Ma₂dsán'₅ jnia'₅₄ dsa₂ 'éi₂ i₂'in₅ Moisés ne₄ Si₂ 'Éi'₃, i₂'in₅ dsa₂ i₂'é₂ jág₁ quián₅ Diú₄ ně₃. Jesús bá₄ 'éi₂, ja₁ŋi'₅₄ José, i₂chan₂ juig₂ Nazaret.

⁴⁶ Jaun₂ ca₂juá'₂ Natanael:

—¿Lé₂ le₃o₃'ag₅ caun₂ a₂dse₃ juig₂ Nazaret?

Jaun₂ ca₂ŋag₃ Fe₂li₄:

—Ŋia₅ de'₂ i₂jag₄.

⁴⁷ Jaun₂ jme₁ca₂jág₃ Jesús a₂ma₂ja₂quián₃ Natanael, ca₂juá'₂:

—La₂ dé₄ dsón'₂ já₅ jan₂ dsa₂ israelita tē₃dsón'₂, i₂tsá₃ cha₂ mai₅₄ ja₁con₂.

⁴⁸ Jaun₂ ca₂ŋag₃ Natanael ca₂ŋí'₃ Jesús:

—¿A₂ lia'₂ cui₂g'₂ jniá'₂?

Jaun₂ ca₂juá'₂ Jesús:

—Jniá'₂ ně₂jŋg₅₄ 'ne₂ jniá'₅, né'₃ gué₄ a₂dsi₃té₂ Fe₂li₄, lia'₂ con'₂ jme₁ŋéi'₂ né'₃ ni₁'ma₂ higuera.

⁴⁹ Jaun₂ ně₃ ca₂juá'₂ Natanael ca₂tsí'₃ Jesús:

—Tě₅, 'ne₂ bá₄ líng'₅ Ja₁ŋi'₅₄ Diú₄; 'ne₂ bá₄ líng'₅ Rag₅₄ quián₅ dsa₂ juig₂ Israel.

⁵⁰ Jaun₂ ca₂ŋag₃ Jesús ca₂tsí'₃ 'éi₂:

—¿A₁jaun₂ 'éng'₂ ia₁ ně₂juá'₃ a₂ně₂jŋ₄ jniá'₂ 'ne₂, ŋéi'₂ né'₃ ni₁'ma₂ higuera? La₁ia₁ ně₃ gué₄ tē₃ ne'₅₄ 'lóng₂ léi₄ juě'₂ gué₄ con'₂ gué₄ a₂la₂.

⁵¹ Ján₃ bá₄ ca₂juá'₂ Jesús:

—A₂dsi₂jó'₃ juig₂ jniá'₂ 'nia'₂, jag'₅₄ 'nia'₂ rē₂na₄ guei'₅₄ i₂juíg₃, jŋi'₅₄ 'nia'₂ ángeles quián₅ Diú₄ ně₃, qui₂tsau₂ qui₂tsi₂sioin₂ ne₄ Jaun₅ dsa₂ mi₂güí₃.

Ca₂jen'₂ gu₂ dsa₂ jě₄ juig₂ Caná juig₂ tén₅ Galilea

2 ¹ 'Ni₅ jmig₄ cang₂ gué₄ jaun₂, ca₂nio₃ jmig₄ ca₂jen'₂ gu₂ dsa₂ jě₄ juig₂ Caná, a₂nio₅ 'uě₃ Galilea. Ja₁jaun₂ jme₁'en₅₄ chog₅₄ Jesús ně₃; ² ján₃ bá₄ ca₂tě'₃ dsa₂ Jesús quian'₅₄ dsa₂ i₂quian'₅₄, ja₁jen'₂ gu₂ dsa₂ jaun₂.

^h42 Co₂'nió'₄ le₃jua'₅₄, “Ni₁cang₁.” Le₂ně₅ juá'₂ jág₁ “Cefas” quian'₅₄ jág₁ jmei₅ arameo; co₂jaun₂ juá'₂ “Petros” (ja₁já₅ jág₁ piedra, Pedro ně₃) quian'₅₄ jág₁ jmei₅ griego.

- ³ Jme₁ca₂dsa₃ vino, jaun₂ ca₂juá'₂ chog₅₄ Jesús ca₂tsí'₃ 'éi₂:
—Tsá₃ ma₃cha₂ vino quió'₅ dsa₂ tioin'₅₄.
- ⁴ La₁ ca₂ɲag₃ Jesús:
—Io₅₄, ¿'e₂ lë₃ juig'₂ jniá₂ a₂në₅? Ia₁ tsá₃ ma₂të₂ gué₄ hora quió'₃.
- ⁵ La₁ ca₂juá'₂ chog₅₄ ca₂tsí'₃ dsa₂ i₂tion'₅₄ tia'₅:
—Jmo₄ 'nia'₂ chi₂'e₂ juá'₂ i₂në₅.
- ⁶ Jme₁tióng₂ ja₁jaun₂ jñéi'₂ ti'₂ cang₄, jui₁lia'₂ a₂jme₁jmó'₂ dsa₂ judíos ta₁ a₂jme₁qui₂jmo₂₃ le₁jín₃, con'₂ lë₅ tag₄ jme₁chí'₄ quió'₅. Lia'₂ caun₂ ni₁ti'₂ cang₄ jaun₂ 'a₄ con'₂ të₂láu₃-guiá₂, o₃ caun₂ 'ñiá₂-láu₂ litro jmig₂.
- ⁷ Jaun₂ ca₂juá'₂ Jesús ca₂tsí'₃ dsa₂ i₂tia'₅:
—Jme₁can'₂ 'nia'₂ ni₁ti'₂ tióng₂ la₂ quian'₅₄ jmig₂.
Ca₂jme₃can'₂ bá₄ gué'₂ dsa₂ lia'₂ ca₂rin₅ rë₂ lin₃. ⁸ Jaun₂ ca₂juá'₂ Jesús ca₂tsí'₃ dsa₂ 'éi₂:
—Në₃ në₃, dsen₅₄ ca₂juig₄, o₂can₄ ne₄ dsa₂ i₂niog₅ ne₄ jmig₄.
Jaun₂ i₁can₅ dsa₂.
- ⁹ Dsa₂ i₂niog₅ ne₄ jmig₄ jaun₂, ca₂tí₂ 'o₅₄ jmig₂ a₂ca₂lë₃ vino jaun₂, të₃ tsá₃ ɲi₅ a₂já'₄ já₃; jñia'₅₄ lia'₂ dsa₂ i₂ca₂dsen₅ jmig₂ bá₄ jme₁ɲi₅. Jaun₂ në₃ ca₂të₃ dsa₂ i₂niog₅ ne₄ jmig₄, ca₂të'₃ dsa₂ ɲe'₂ i₂jen'₂ gu₂, ¹⁰ jaun₂ ca₂tsí'₃ 'éi₂:
—Ca₂le₃jín₃ bá₄ dsa₂ tiin₂₃ tia'₃ le₂'uig₅₄ vino dse₃, jaun₂ jë₁ma₂le₁'en₅ dsa₂, jaun₂ gué₄ tia'₃ vino ga₂. La₁ 'ne₂ në₃ në₂'ma'₅₄ vino dse₃ ca₂të₂ jë₁ca₂tó'₂.
- ¹¹ Jë₄ juig₂ Caná a₂tén₅ 'uë₃ Galilea jaun₂, ca₂jmo₃ Jesús léi₄ juë'₂ le₂'uig₅₄. Le₂në₅ ca₂jme₃jñiai₂₃ 'ein₂ lín₅ të₂le₃ quian'₅₄ jui₅bí₂ quió'₅, jaun₂ ca₂rë₃'én₂ chi'₂ dsi₂guia₃-tín₂ quiáin₅.
- ¹² Cang₂ gué₄ jaun₂ ca₂ɲó₃ jë₄ juig₂ Capernaum, lia'₂ jma₃quiain'₅₄ chog₅₄, riin'₅₄, chi'₂ dsi₂guia₃-tín₂ quiáin₅ në₃; ja₁jaun₂ ca₂tóin'₂ tin₃-ni₅ jmig₄.

Ca₂chí₃ Jesús i₁dsi₅ guá'₅

(Mateo 21:12-13; Marcos 11:15-18; Lucas 19:45-46)

- ¹³ Jme₁ma₂ja₂quián₃ Jmig₄ Të₂'in₅₄ quió'₅ dsa₂ judíos, jaun₂ ca₂uig₂ Jesús jui₅ Jerusalén.
- ¹⁴ Ja₁jaun₂ ca₂dsáin'₂ i₁dsi₅ guá'₅ templo dsa₂ i₂'ni₅ ca₁jui₅, i₂'ni₅ já'₂ cha'₂, i₂'ni₅ i₁ju₂ në₃, quian'₅₄ dsa₂ i₂qui₂jme₂tsín₃ cu₄ quió'₅ dsa₂.
- ¹⁵ Jme₁ca₂jág₃ Jesús a₂jaun₂, ca₂jmo₃ caun₂ látigo a₂lë₅ quian'₅₄ tsi₁'nei₅₄, jaun₂ ca₂'uín'₂ ca₁'né₄ ca₂le₃jín₃ i₂tion'₅₄ i₁dsi₅ lia'₂ jma₃quiain'₅₄ já'₂ cha'₂ quiáin₅, ca₁jui₅ në₃. Ca₂jein₃ 'uë₃ cu₄ quió'₅ dsa₂ i₂jme₂tsín₃ cu₄, qui₂ca₂jéin'₃ ni₁mesa në₃.
- ¹⁶ Jaun₂ ca₂tsí'₃ i₂'ni₅ i₁ju₂:
—i'Uë'₅₄ 'nia'₂ ca₂le₃jé₃ a₂në₅ ja₁lá₃! i'Tsá₃ lë₁jmo₂ 'nia'₂ ja₁'ma'₅₄ ja₁quió'₄ ɲe'₃!
- ¹⁷ Jaun₂ ca₂dsáu'₃ dsí₅ dsa₂ i₂jme₁quiain'₅₄, a₂chi₁ton₅ ne₄ Si₂ le₂la₂:

Në₂ jag₄ bá₄ a₂ ca₂ cóng₂ 'uig₅₄ ia₁ a₂ ñí₄ lë₃ dsí₅ dsi₃
o₄ quió₄ dsi₂ néi₂ quiáng₂.ⁱ

¹⁸ Jaun₂ nē₃ ca₂ ñag₃ dsa₂ judíos ca₂ ñí₃ Jesús:

—¿'E₂ léi₄ le₃ 'é₂ jnia₅₄ a₂ jáng₅ jág₁ dsau₅ a₂ ca₂ tín₂ 'ne₂ jmó₂ le₂ nē₅?

¹⁹ Jaun₂ ca₂ ñag₃ Jesús:

—'Én₂ 'nia₂ guá₅ la₂, jaun₂ tsi₅₄ táng₃ jniá₂ quian₅₄ 'ni₅ jmig₄.

²⁰ Jaun₂ nē₃ ca₂ juá₂ dsa₂ judíos ca₂ tsí₃ Jesús:

—Të₂ láu₃-ñéi₂ ñi₂ ca₂ rë₃ 'ín₅ dsa₂ jme₁ ca₂ chi₃ guá₅ la₂. ¿'En₁ jmá₃ jaun₂, lé₂ le₃ jmog₅₄ tsi₅₄ quian₅₄ 'ni₅ jmig₄?

²¹ La₁ ia₁ guá₅ a₂ 'ë₅ Jesús jaun₂, ñi₁ ñí₄ 'ñiog₅ bá₄ Jesús 'ë₂₃.

²² Jaun₂ lë₃, lia₂ con₂ jme₁ ca₂ jen₅₄ Jesús a₂ jme₁ rë₂ 'liin₅₄, ca₂ dsáu₃ dsí₅ chi₂ dsi₂ gua₃-tín₂ quiáin₅ jág₁ jaun₂. Jaun₂ ca₂ rë₃ 'éin₂ jág₁ a₂ juá₂ ne₄ Si₂ quió₅ Diú₄, quian₅₄ jág₁ a₂ jme₁ ca₂ juá₂ Jesús jaun₂.

I₂ cuin₅ bá₄ Jesús ca₂ le₃ jín₃ dsa₂

²³ Lia₂ con₂ jme₁ 'en₅₄ Jesús Jerusalén Jmig₄ Të₂ 'in₅₄, ca₂ rë₃ 'én₂ juin₅ lin₃ dsa₂ të₂ le₃ quió₅ Jesús, jme₁ ca₂ jág₃ léi₄ a₂ ma₂ qui₂ ma₂ jmo₃.

²⁴ La₁ tsá₃ jme₁ 'én₂ Jesús quió₅ dsa₂ 'éi₂, ia₁ i₂ cuin₂₃ bá₄ ca₂ le₃ jín₃ dsa₂, 'a₂ lia₂ lë₅ të₂ dsí₅.

²⁵ Tsá₃ 'e₂ ca₂ rë₃ 'nió₅ quió₅, jua₅₄ a₂ jáng₃ dsa₂ jág₁ dsau₅ jui₁ lia₂ quió₅ 'i₁ jan₂, ia₁ ma₂ ñi₅ rë₂ bá₄ Jesús 'e₂ a₂ qui₂ dsi₂ jnia₅ dsí₅ dsa₂ mi₂ güig₃.

Jme₂ tag₅ Jesús jme₂ tiin₂₃ Nicodemo

3 ¹ Jme₁ chan₂ jan₂ dsa₂ fariseo i₂ jme₁ chen₂ Nicodemo, i₂ jme₁ lín₄ jan₂ dsa₂ dsen₅₄ quián₅ dsa₂ judíos.

² Ne₄ 'éi₂ ca₂ i₁ jiin₁₂ Jesús të₂ le₃ ca₂ nei₂, jaun₂ ca₂ juá₂ ca₂ tsí₃ Jesús:

—Të₅, ne₄ bá₄ jnia₅₄ a₂ lín₅ 'ne₂ jan₂ të₅ i₂ chen₄ quián₅ Diú₄, ia₁ ca₂ lia₂ 'i₁ jan₂ tsá₃ lé₂ le₃ jmo₃ léi₄ jué₂ le₂ nē₅, jui₁ lia₂ jmo₂ 'ne₂, jua₅₄ tsá₃ quiong₅₄ Diú₄.

³ Jaun₂ nē₃ ca₂ juá₂ Jesús ca₂ tsí₃ Nicodemo:

—A₂ dsi₂ jó₃ juig₂ jniá₂ 'ne₂, nē₁ jua₂ tsá₃ rë₂ chan₂ táng₃ dsa₂, tsá₃ lé₂ le₃ jág₃ ja₁ gon₂ Diú₄.

⁴ Jaun₂ ca₂ ñag₃ Nicodemo:

—¿'A₂ bá₄ lia₂ lé₂ le₃ chan₂ táng₃, jan₂ dsa₂ ma₂ juin₂? ¿Lé₂ le₃ 'í₂ táng₃ né₃ të₂ dsí₅ chog₅₄, jaun₂ le₃ chain₂ táng₃?

⁵ Jaun₂ ca₂ ñag₃ Jesús:

—A₂ dsi₂ jó₃ juig₂ jniá₂ 'ne₂, jui₁ lia₂ i₂ tsá₃ rë₂ chan₂ le₃ quió₅ jmig₂, quian₅₄ le₃ quió₅ Jme₂ dsí₂, tsá₃ lé₂ le₃ 'í₂ ja₁ gon₂ Diú₄. ⁶ Jui₁ lia₂ i₂ rë₂ chan₂ le₃ quió₅ ñi₁ ñí₅, jan₂ dsa₂ ñi₁ ñí₅ bá₄ 'éi₂; jui₁ lia₂ i₂ rë₂ chan₂ le₃ quió₅ Jme₂ dsí₂, jan₂ dsa₂ i₂ gu₂ dsí₂ bá₄ lín₅ 'éi₂. ⁷ Tsá₃ jui₁ dsi₂ gó₃ 'au₂

ⁱ17 Salmo 69:9

'ne₂ a₂juá'₅ jniá'₂: "Tion₅₄ bá₄ le₃chan'₂ 'nia'₂ táng₃." ⁸ 'Ag₅ dsí₂ jui'₁ a₂ gué'₃ já'₄ 'nio₃ 'ag₃; nag'₂ bá₄ 'ne₂ mi'₅₄ a₂lé₂, la₁ia₁ tsá₃ ŋi'₅₄ a₂já'₄ já₅, on₃ gué'₂ a₂já'₄ dsó₃. Ján₃ bá₄ le₂nē₅ lín₅ ca₂le₃jín₃ i₂rē₂chan₂ le₃quíó'₅ Jme₂dsí₂.

⁹ Jaun₂ nē₃ ca₂ŋag₃ táng₃ Nicodemo:

—¿'A₂ bá₄ lia'₂ lé₂ le₃lé₂ a₂juá'₂ 'ne₂ nē₅?

¹⁰ Jaun₂ ca₂ŋag₃ Jesús:

—¿'Ne₂ gué'₂ lín₅ jan₂ tē₅ quián₅ dsa₂ juíg₂ Israel, ton'₂ tsá₃ ŋi'₂ bá₄ gué'₄ 'au'₂ jág₁ nē₅? ¹¹ A₂dsi₂jó'₃ juíg₂ jniá'₂ 'ne₂, jui'₁lia'₂ a₂ma₂tag₂ bá₄ jnia'₅₄, dsia₂; ján₃ bá₄ jang'₂ jnia'₅₄ jág₁ dsau₅ jui'₁lia'₂ a₂ma₂tē₂ ne₄ jnia'₅₄. La₁ 'nia'₂ nē₃ tsá₃ gue'₂ jág₁ dsau₅ a₂jang'₂ jnia'₅₄. ¹² Chi₂jua'₂ ma₂nē₂juá'₃ jniá'₂ a₂é₂₃ jui'₁lia'₂ a₂cha₂ mi₂güí₃ la₂, ton'₂ tsá₃ 'én'₂ bá₄ gué'₂ 'nia'₂, ¿'a₂ bá₄ gué'₂ lia'₂ le₃'én'₂ 'nia'₂ jág₁ quió₃ nē₁ca₂juá'₃ jniá'₂ ca₂juíg₂ 'nia'₂ a₂é₂₃ jui'₁lia'₂ a₂cha₂ guei'₅₄ i₂juíg₃?

¹³ 'Ca₂lia'₂ 'i₁jan₂ tsá₃ 'ein₂ ma₂uí₂ guei'₅₄ i₂juíg₃, jnia'₅₄ lia'₂ 'éi₂ i₂ca₂sión₃ guei'₅₄ i₂juíg₃; co₂'nió'₄ 'ŋiog₅ Jaun₅ dsa₂ mi₂güí₃. ^j ¹⁴ Jui'₁lia'₂ ca₂chón'₂ Moisés dsí₂mi'₂ guei'₅₄ ja₁lé₄ 'uē₃ quein₂ co₂'ŋiog₅ jaun₂, ján₃ bá₄ le₂jaun₂ 'i₄ 'éi'₃ chón'₂ dsa₂ guei'₅₄ Jaun₅ dsa₂ mi₂güí₃, ¹⁵ ia₁jaun₂ ca₂le₃jín₃ i₂'én₂ tē₂le₃ quió'₅ 'éi₂, le₃chain₂ co₂tan₅₄.

'Nio₃ Diú₄ dsa₂ mi₂güí₃

¹⁶ 'Jaun₂, 'uí₅₄ ia₁ a₂ŋí₄ lē₃ ca₂rē₃'nio₃ Diú₄ ca₂rē₃'nioi₃ dsa₂ mi₂güí₃, ca₂cuiin₃ Ja₁ŋi'₅₄ i₂jan₂ tan₅₄ quián₅, ia₁jaun₂ ca₂le₃jín₃ i₂'én₂ tē₂le₃ quió'₅ 'éi₂, tsá₃ dsi₃'éin₂, ton'₂ le₃chain₂ bá₄ co₂tan₅₄. ¹⁷ Ia₁ on₃jua'₅₄ jaun₂ ca₂chei₃ Diú₄ ca₂chein₃ Ja₁ŋi'₅₄ mi₂güí₃ a₂qui₃'é₂ uí₅ ja₁con₂ dsa₂ mi₂güí₃; a₂jaun₂ bá₄ ca₂chei₃ ia₁jaun₂ líón₂ dsa₂ mi₂güí₃ tē₂le₃ quian'₅₄ 'éi₂. ¹⁸ Jui'₁lia'₂ dsa₂ i₂'én₂ tē₂le₃ quió'₅ 'éi₂, tsá₃ rē₂'é₂ uí₅ ja₁coin₂; la₁ia₁ jui'₁lia'₂ i₂tsá₃ 'én₂ gué'₂ nē₃, ma₂rē₂'é₂ uí₅ ja₁coin₂, 'uí₅₄ ia₁ a₂tsá₃ 'éin₂ tē₂le₃ quió'₅ Ja₁ŋi'₅₄ i₂jan₂ tan₅₄ quián₅ Diú₄. ¹⁹ A₂la₂ bá₄ uí₅ a₂rē₂'é₂ jaun₂: a₂ma₂gua₅ si₂ ja₁con₂ dsa₂ mi₂güí₃, la₁ ca₂rē₃'nio₃ gué'₄ dsa₂ jē₄ qui₁né₃ lia'₂ con'₂ gué'₄ ja₁tág₅ si₂, ia₁ a₂'lig'₅₄ bá₄ jme₁jmo₂₃-dsáu₅.

²⁰ Ca₂le₃jín₃ dsa₂ i₂jmo₅ a₂'lig'₅₄, 'io'₅₄ si₂, jaun₂ tsá₃ jme₂quián₃ ja₁tág₅ si₂, ia₁jaun₂ tsá₃ le₃jniá'₂ a₂'lig'₅₄ a₂jmo₂₃-dsáu₅. ²¹ La₁ia₁ jui'₁lia'₂ dsa₂ i₂chan₂ caun₂ jui₅ co₂dsau₅, jme₂quián₃ ja₁tág₅ si₂, ia₁jaun₂ le₃jniá'₂, le₃quíó'₅ Diú₄ bá₄ já₅ a₂dse₃ a₂jmo₅ 'éi₂.

^j13 A₂lin₅₄ chog₅₄ si₂ juá'₂ ján₃: "i₂'en₅₄ guei'₅₄ i₂juíg₃."

**Jáng'₅ táng₃ jág₁ dsau₅ Juan₅₄ i₂chon₅
dsa₂ jmiḡ₂ jui₁lia'₂ 'ein₂ 'éi₂ Jesús**

²² Cang₂ jaun₂, ḡó₃ Jesús jui₅ 'uē₃ Judea quiaín'₅₄ chi'₂ dsi₂guia₃-tín₂
quiaín₅, jaun₂ ja₁jaun₂ ca₂'í₃ ca₂la₂ uē₂ quiaín'₅₄ 'éi₂, qui₂choin₂₃ jmiḡ₂
dsa₂.^k

²³ Ján₃ bá₄ le₂jaun₂ jme₁'en₅₄ Juan₅₄ né₃, choin₂₃ jmiḡ₂ dsa₂,^l caun₂
ja₁chei₂ Enón, ma₂quiaín₅ Salim, ia₁ ja₁jaun₂ jme₁cha₂ 'lióng₂ jmiḡ₂; jaun₂
jme₁ja₂lén₂ dsa₂ ia₁jaun₂ qui₃cho₃ Juan₅₄ jmiḡ₂.^m

²⁴ (A₂la₂ ca₂lē₃ né'₃ gué₄ a₂ton'₂ dsa₂ Juan₅₄ né'₃ 'má₃.)

²⁵ Jaun₂ né₃, i₂lín₅₄ dsa₂ i₂quiaín'₅₄ Juan₅₄ ca₂tsín₂ quiaín'₅₄ jan₂ dsa₂
judío ne₄ jág₁ jui₁lia'₂ a₂jmo₅ dsa₂ le₁jín₃.

²⁶ Jaun₂ i₃lén₂ i₁chi'₄ Juan₅₄:

—Tē₅, dsa₂ i₂jme₁'en₅₄ quiaín'₅₄ 'ne₂ tē₂le₃ ja₁'ia₂ 'iog₂ tē₂le₃ quióng₄
Cuá₃ Jordán, dsa₂ i₂'ín'₅ 'ne₂ 'éi₂, jē₂ bá₄ choin₂₃ jmiḡ₂ dsa₂,ⁿ jaun₂
ca₂le₃jín₃ bá₄ dsa₂ dsi₂lén₂ ja₁coin₂.

²⁷ Jaun₂ ca₂ḡag₃ Juan₅₄:

—Ca₂lia'₂ 'i₁caun₂ tsá₃ 'e₂ lé₂ le₃cha₂ quió'₅ dsa₂ jua'₅₄ tsá₃ ḡei₂ guei'₅₄
i₂juíg₃. ²⁸ Ca₂nei'₂ bá₄ 'nia'₂ guiong'₅₄ jme₁ca₂juá'₃: “On₃jua'₅₄ jniá₂ líng₅
I₂rē₂'ín₁ quiaín₅ Diú₄; jan₂ dsa₂ i₂chen₄ ne₄ jui₅ quió'₅ 'éi₂ bá₄ líng₅.”

²⁹ I₂ca₂tín₂ dsa₂ ḡe'₂ i₂jen'₂ gu₂ bá₄, dsa₂ mí₂ i₂jen'₂ gu₂ quiaín'₅₄. Jaun₂
dsa₂ a₂mei₅₄ quiaín₅ dsa₂ ḡe'₂ né₃, chi₁ḡia₁ nag₂₃. Jaun₂ 'io'₂ jén'₅
jē₁ma₂nág₂ jág₁ quió'₅ 'éi₂. Ján₃ bá₄ le₂jaun₂ jniá₂ né₃, rē₂'ḡia₅ a₂'io'₂
jén'₅ dsi₃.

Jui₁lia'₂ i₂já₅ guei'₅₄ i₂juíg₃

³⁰ 'Éi₂ ca₂tín₂ le₃dsein₅₄ gué₄; jniá₂ guē'₂ ca₂tíng₂ le₃meg'₂. ³¹ Jui₁lia'₂
i₂já₅ jui₅ guei'₅₄ i₂juíg₃, dsen₅₄ gué₄ ne₄ quió'₅ ca₂le₃jín₃. Jui₁lia'₂ i₂já₅
gua'₅₄ 'uē₃, jan₂ i₂chan₂ gua'₅₄ 'uē₃ bá₄ 'éi₂. Jaun₂ dsia₂₃ jui₁lia'₂ a₂quió'₅
gua'₅₄ 'uē₃. La₁ia₁ jui₁lia'₂ i₂já₅ guei'₅₄ i₂juíg₃, dsen₅₄ gué₄ ne₄ quió'₅
ca₂le₃jín₃. ³² Jáng'₅ 'éi₂ jág₁ dsau₅ jui₁lia'₂ a₂ma₂té₂ ne₅₄, jui₁lia'₂
a₂ma₂nág₂ né₃; la₁ 'i₁jan₂ tsá₃ 'ein₂ tón'₂ jui₅ jág₁ dsau₅ a₂jáng'₅ 'éi₂.
³³ La₁ia₁ jui₁lia'₂ i₂tón'₂ jui₅, ma₂caun₅ 'í₁ a₂dsón'₂ bá₄ tí₅ jág₁ a₂juá'₂
Diú₄; ³⁴ ia₁ i₂ca₂chen₃ Diú₄ né₃, dsia₂₃ jág₁ quió'₅ Diú₄, ia₁ cuín₅ Diú₄
Jme₂dsí₂ quiaín₅ ca₂lia'₂ tsá₃ niog₅ 'éi'₃. ³⁵ A₂'nio₃ Diú₄ Jmei₂ 'nioi₃
Ja₁ḡi'₅₄, jaun₂ o₄gú₃ 'éi₂ ma₂dsia₃ ca₂le₃jé₃. ³⁶ Jui₁lia'₂ i₂'én₂ tē₂le₃ quió'₅
Ja₁ḡi'₅₄ Diú₄, le₃chain₂ bá₄ co₂tan₅₄; la₁ jui₁lia'₂ i₂tsá₃ ne'₅₄ le₃quió'₅
Ja₁ḡi'₅₄ Diú₄, tsá₃ tē₃ ne₅₄ a₂le₃chain₂ rē₂'ḡiai₂₃, ton'₂ tē₂le₃ tē₃gua₄ 'nei₂
dsí₅ Diú₄ ja₁coin₂.

^k22 lit. “qui₂tiaín₂ dsa₂ jmiḡ₂.”

^l23 lit. “tiaín₂ dsa₂ jmiḡ₂.”

^m23 lit. “ia₁jaun₂ qui₃tióg₃ Juan₅₄ jmiḡ₂.”

ⁿ26 lit. “jē₂ bá₄ tiaín₂ dsa₂ jmiḡ₂.”

Dsia₅ Jesús jág₁ quian'₅₄ jan₂ 'io₅₄ i₂chan₂ Samaria

4 ¹ Jme₁ca₂rë₃ñi₅ Te₁gui'₅₄ a₂ma₂nág₂ dsa₂ fariseos jág₁, 'ñio₅ lin₃ gué₄ juin₅ dsa₂ i₂ma₂quian'₅₄ Jesús, qui₂ma₂cho₃ jmi₂g₂^o lia'₂ con'₂ gué₄ Juan₅₄; ² (o₁ñia'₅₄ on₃jua'₅₄ 'ñiog₅ Jesús choin₂₃ jmi₂g₂ dsa₂,^p jñia'₅₄ lia'₂ chi'₂ dsi₂guia₃-tín₂ quiáin₅ bá₄), ³ jaun₂ ca₂o₃'íin₃ 'uë₃ Judea, a₂ñái'₃ táng₃ jui₅ 'uë₃ Galilea. ⁴ Ja₁tioin'₅₄ jui₅ jaun₂, ca₂tín₂ ñí₃ 'uë₃ Samaria. ⁵ Jaun₂ né₃ ca₂dsi₃lén₂ caun₂ juig₂ ja₁tén₄ Samaria a₂chei₂ Sicar, ma₂quián₅ ca₂jne₄ 'uë₃ a₂jme₁ca₂cuë₃ Jacob ma₂líg'₂ ca₂cué'₃ ja₁ñi'₅₄ i₂chen₂ Sé₄.

⁶ Ja₁jaun₂ jme₁dsi₅₄ caun₂ tau₂ pozo a₂té'₂ dsa₂ a₂quió'₅ Jacob. Jaun₂ ca₂guá₂ Jesús cau₅, ia₁ a₂ca₂'ú'₃ 'ein₅₄ jui₅. Jme₁ma₂ca₂té'₂ con'₂ dsi₂ñí'₃ jaun₂.

⁷ Të₃ guá₅ jaun₂ ca₂dsióg₃ jan₂ 'io₅₄ i₂chan₂ Samaria a₂i₃dsein₂₃ jmi₂g₂ pozo jaun₂. Jaun₂ ca₂juá'₂ Jesús ca₂tsí'₃ 'io₅₄ 'éi₂:

—Cuë₄ ca₂juig₄ jmi₂g₂ gui'₅₄.

⁸ Të₁lia'₂ jaun₂, i₁len₅₄ jë₄ juig₂ chi'₂ dsi₂guia₃-tín₂, i₁lia₅ má₃ a₂gué'₃.

⁹ Jaun₂ né₃ ca₂juá'₂ 'io₅₄ chan₂ Samaria 'éi₂ ca₂tsí'₃ Jesús:

—¿'A₂ lia'₂ lé₅ jaun₂, 'ne₂ jan₂ dsa₂ i₂lín₅ judío, mi'₂ jmi₂g₂ ne₃ jniá₂, jan₂ 'io₅₄ chan₂ Samaria?

(Ia₁ tsá₃ jág₁ 'ei₅ dsa₂ judíos quian'₅₄ dsa₂ chan₂ Samaria.)^q

¹⁰ Jaun₂ né₃ ca₂ñag₃ Jesús:

—Jua'₅₄ mei'₂ gué₃ ñi'₅₄ 'ne₂ 'e₂ jaun₂ a₂cuë₅ Diú₄, quian'₅₄ 'ein₂ i₂mi₅ jmi₂g₂ ne'₅₄, jme₁mí'₂ ne₃ jniá₂, jaun₂ jniá₂ né₃ cuë₅₄ jmi₂g₂ jén'₃.

¹¹ Jaun₂ ca₂juá'₂ 'io₅₄ ca₂tsí'₃ Jesús:

—Gui'₅₄, tsá₃ ñí₁ cubeta cha₂ quiáng'₂ a₂dséng'₄ jmi₂g₂, ton'₂ a₂ji'₂ bá₄ tau₂ pozo. ¿'A₂ guë'₂ já'₄ cán'₁ jmi₂g₂ jén'₃ a₂cué'₂ jniá₂? ¹² ¿'E₂, 'ne₂ líng'₅ i₂juin'₂ gué₄ con'₂ gué₄ 'lag₄ jmei₂ jniog₄ Jacob, i₂ca₂cuë₃ pozo la₂? Jme₁cán₂ 'éi₂ jmi₂g₂ a₂'ín'₂ 'ñiog₅ quian'₅₄ chi'₂ quiáin₅, quian'₅₄ já'₂ quiáin₅ né₃.

¹³ Jaun₂ ca₂ñag₃ Jesús:

—Ca₂le₃jín₃ jui₁lia'₂ dsa₂ i₂'ín'₂ jmi₂g₂ la₂, lé₂ táng₃ dsí₅ i₁'ín'₂ jmi₂g₂;

¹⁴ Ia₁ia₁ jui₁lia'₂ i₂'ín'₂ jmi₂g₂ a₂cué₄ jniá₂, lia'₂ o₁líg'₂ jmi₂g₄ tsá₃ ma₃lé₂ dsí₅ i₁'ín'₂ jmi₂g₂. Ia₁ jui₁lia'₂ jmi₂g₂ a₂cué₄ jniá₂, lé₂ nē₂jag₄ bá₄ caun₂ o₄tu₁ jmi₂g₂ tē₂le₃ quió'₅, a₂qui₃'iá₃ jmi₂g₂ a₂gu₂dsí₂ a₂jmo₃ a₂le₃chain₂ co₂tan₅₄.

¹⁵ Jaun₂ né₃ ca₂juá'₂ 'io₅₄ ca₂tsí'₃ Jesús:

—Gui'₅₄, cuë₄ jmi₂g₂ a₂'ë'₂ nē₅, ia₁jaun₂ tsá₃ ma₃le₃quein₂ dsi₃, on₃ guë'₂ caun₂ guío₅₄ gué₄ ca₂tē₂ la₂ i₁dséng₃ jmi₂g₂.

^o1 lit. “qui₂ma₂tióg₃ jmi₂g₂.”

^p2 lit. “tiáin₂ dsa₂ jmi₂g₂.”

^q9 o₃, “tsá₃ jmó'₂ dsa₂ judíos ta₁ jui₁lia'₂ ni₁uings₅ a₂jmó'₂ dsa₂ chan₂ Samaria ta₁.”

¹⁶ Jaun₂ ca₂juá'₂ Jesús:

—Guan'₂ o₂te'₂ dsi₂i₂gog'₂, jaun₂ ηe'₅₄ táng₃ ja₁lá₃.

¹⁷ Jaun₂ ca₂ηag₃ 'io₅₄ 'éi₂:

—Tsá₃ dsi₂i₂gu₃ jniá'₂ chan₂.

Jaun₂ ně₃ ca₂juá'₂ Jesús:

—Tí₅ bá₄ jág₁ quiáng'₂ a₂ně₂jua'₅₄, a₂tsá₃ chan₂ dsi₂i₂gog'₂; ¹⁸ ia₁ 'ñiá'₂ dsi₂i₂gog'₂ i₂ma₂ca₂né'₂ quiang'₅₄, jaun₂ i₂ñéi'₂ quiang'₅₄ rě₂ně₃ ján₃, on₃jua'₅₄ dsi₂i₂gog'₂ 'éi₂. Dsón'₂ bá₄ tí₅ jág₁ quiáng'₂ a₂ně₂jua'₅₄.

¹⁹ Jme₁ca₂nág₂ 'io₅₄ jág₁ ně₅, ca₂juá'₂ ca₂tsí'₃ Jesús:

—Te₁gui'₅₄, dsón'₂ bá₄ lín'₅ 'ne₂ jan₂ dsa₂ i₂'é₂ jág₁ quián₅ Diú₄, lín₂ jniá'₂. ²⁰ Ja₁chí'₄ má'₂ la₂ ca₂jme₃juin'₂ dsa₂ can'₅₄ quián₂ jnia'₅₄ ca₂jme₃juin'₂ Diú₄ ma₂líg'₂, la₁ia₁ 'nia'₂ i₂lín'₅ dsa₂ judíos ně₃, juá'₂ Jerusalén bá₄ ja₁ca₂tín₂ dsa₂ jme₃juin'₂ Diú₄.

²¹ Jaun₂ ca₂ηag₃ Jesús:

—Jui₁le₂'éng'₂ bá₄ a₂juá'₅ jniá'₂: já₅ caun₂ jmig₄ a₂jme₁juin'₂ 'nia'₂ Diú₄, on₃jua'₅₄ i₁nóg'₅ má'₂ la₂, on₃ guē'₂ o₁nó'₅ 'nia'₂ Jerusalén. ²² 'Nia'₂ jme₂juíng'₁ tē₃ tsá₃ ηi'₅₄ 'ein₂ jme₂juíng'₁; a₂dsau₅ bá₄ jnia'₅₄, ne₄ jnia'₅₄ 'éin₂ i₂jme₂juín'₂; ia₁ tē₂le₃ quió'₅ dsa₂ judíos bá₄ já₅ jág₁ a₂lión₂ dsa₂.

²³ La₁ já₅ hora, ton'₂ ma₂tē₂ dsón'₂, a₂jme₃juin'₂ dsa₂ Jmei₂, jui₁lia'₂ dsa₂ i₂jme₂juag'₂ tē₃dsón'₂, jme₃juag'₂ tē₂le₃ gu₂dsí₂ ton'₂ tē₂le₃ quian'₅₄ jág₁ dsau₅. Ia₁ i₂le₂'éi₂ bá₄ 'na'₂ Jmei₂ jme₃juag'₂. ²⁴ A₂lín₅ Diú₄ jme₂dsí₂; jaun₂ jui₁lia'₂ i₂jme₂juag'₂, ca₂tín₂ jme₃juag'₂ tē₂le₃ gu₂dsí₂ ton'₂ tē₂le₃ quian'₅₄ jág₁ dsau₅.

²⁵ Jaun₂ ca₂juá'₂ 'io₅₄:

—Guion₄ jniá'₂ a₂jiá'₃ Mesías, (i₂tē'₂ dsa₂ I₂rě₂'ín₁ quián₅ Diú₄).

Jē₁ma₂guain₂₃, jaun₂ guē'₄ juá'₂ ca₂le₃jē₃ lia'₂ rě₂jiá'₃.

²⁶ Jaun₂ ca₂juá'₂ Jesús:

—Jniá'₂ bá₄ 'éi₂, i₂dsia₅ jág₁ quian'₅₄ 'ne₂.

²⁷ Tē₁lia'₂ jaun₂, ca₂o₃len₃ chi'₂ dsi₂guia₃-tín₂ quián₅, jaun₂ ca₂i₃gó'₃ dsí₅ jme₁ca₂jág₃ a₂dsia₅ Jesús jág₁ quian'₅₄ jan₂ 'io₅₄. La₁ia₁ lia'₂ 'i₁jan₂ tsá₃ ca₂tiá'₂ dsí₅ ηag₃ 'e₂ 'no'₂, 'e₂ jág₁ dsia₂₃ quian'₅₄ 'io₅₄ 'éi₂.

²⁸ Jaun₂, ja₁jaun₂ ca₂chi'₃ 'io₅₄ ni₁dsig₁ quió'₅, jaun₂ ñái'₃ jē₄ juig₂, jaun₂ ca₂juá'₂ ca₂tsí'₃ dsa₂:

²⁹ —I₂nó'₅ 'nia'₂ i₂jín₄ jan₂ dsa₂ ηe'₂ i₂ma₂ně₂juá'₂ ca₂le₃jē₃ 'e₂ a₂ma₂jmo₃ jniá'₂. ¿On₁jua'₅₄ mei'₂ tsá₃ 'éi₂ lín₅ I₂rě₂'ín₁ quián₅ Diú₄?

³⁰ Jaun₂ ně₃ ca₂'uin₂ dsa₂ jē₄ juig₂ ca₂i₃lén₂ ja₁guá₄ Jesús.

³¹ Tē₁lia'₂ jaun₂, ca₂chi₃quióng₂ jmig₄ chi'₂ dsi₂guia₃-tín₂ chi₂quián₂ jmig₄ Jesús a₂guē'₃, juá'₂:

—Tē₅, qué'₂ ca₂la₂.

³² Jaun₂ ca₂juá'₂ Jesús:

—Cha₂ caun₂ má₃ a₂guē'₅₄ jniá'₂, a₂tsá₃ cuin'₂ 'nia'₂.

³³ Jaun₂ ně₃ qui₂ca₂ñí'₃ chi'₂ dsi₂guia₃-tín₂ riin'₅₄, jain₂ jain₂:

—¿On₃ bá₄ chan₂ jan₂ i₂ma₂o₃can₅ má₃ a₂guē'₃?

³⁴ La₁ ca₂juá'₂ Jesús ca₂tsí'₃ 'éi₂:

—A₂jaun₂ bá₄ má₃ quió'₃ jniá'₂, a₂jmo₅₄ 'éi'₃ a₂'ñio₂ dsí'₅ i₂ca₂chei₃, a₂jme₁'ñiag₅ ta₁ quió'₅ né₃. ³⁵ ¿'On₁ juá'₂ gué'₂ 'nia'₂: “'Ei₅ bá₄ gué'₄ quén₂ tsi'₂ a₂ráu₃”? La₁ia₁ jniá'₂ juíg₂ 'nia'₂, jag₄ 'a₂ lia'₂ ma₂tion'₅₄ dsa₂ le₁jñia₂₃, nē₂jag₄ bá₄ a₂le₁chein'₂ ja₁nau₂ ca₂ron₂, ma₂lé₂ bá₄ cág'₃.

³⁶ Jui₁lia'₂ dsa₂ i₂jmo₅ ta₁ ja₁nau₂ né₃ gue₂₃ 'liain'₅₄. Jui₁lia'₂ a₂ráu₃, a₂cág'₃ ja₁nau₂ jaun₂, a₂jio₃ co₂tan₅₄ bá₄ jaun₂, ia₁jaun₂ co₂lě₅ bá₄ jmo₃ 'io'₂, lia'₂ dsa₂ i₂jne₅, lia'₂ dsa₂ i₂cág'₅ né₃. ³⁷ Le₂nē₅ dsón'₂ bá₄ quio₃' a₂dsia₅ dsa₂: “Jan₂ i₂jne₅, i₂sián'₂ i₂cág'₅.” ³⁸ Jniá'₂ ma₂tsíng₂ 'nia'₂ a₂o₁cag'₄ ja₁tsá₃ ta₁ ma₂jmo'₅₄ 'nia'₂ guiong'₅₄, ta₁ ma₂jmo₃ i₂sián'₂; jaun₂ 'nia'₂ né₃ ca₂ling'₃ ta₁ quió'₅ dsa₂ 'éi₂.

³⁹ Juin₅ dsa₂ i₂chan₂ Samaria i₂tián'₅ juíg₂ jaun₂ ca₂rě₃'éin₂ tē₂le₃ quió'₅ Jesús jme₁ca₂nág₂ jág₁ dsau₅ a₂ca₂jáng'₃ 'io₅₄, jme₁ca₂juá'₂: “Nē₂juá'₂ 'éi₂ ca₂le₃jě₃ 'e₂ a₂ma₂jmo₃ jniá'₂.”

⁴⁰ 'Uig₅₄ jaun₂ né₃, jme₁ca₂o₃lén₂ dsa₂ chan₂ Samaria, ca₂chi₃quiáin₂ jmig₄ Jesús a₂jme₁jñia₃ 'éi₂ quiong'₅₄. Jaun₂ ca₂jñia₃ Jesús tin₃ jmig₄ ja₁jaun₂.

⁴¹ Jaun₂ tē₂le₃ juin₅ gué'₄ dsa₂ ca₂rě₃'én₂ jme₁ca₂nág₂ jág₁ a₂juá'₂ 'ñiog₅ Jesús.

⁴² Jaun₂ ca₂juá'₂ dsa₂ ca₂tsí'₃ 'io₅₄:

—Nē₃ gué'₄ né₃ 'éin₂ jnia'₅₄, on₃jua'₅₄ 'uig₅₄ jág₁ a₂ca₂jua'₅₄ 'ne₂, ia₁ a₂ma₂nē₂néi₁ jnia'₅₄ guio₅₄ jág₁ quió'₅, jaun₂ ne₄ jnia'₅₄, tē₃dsón'₂ bá₄ 'éi₂ lín₅ dsa₂ i₂lión₂ dsa₂ mi₂güí₃.⁵

Ca₂jme₃'lión₂ Jesús jan₂ ja₁ñi'₅₄ jan₂ dsa₂ dsen₅₄ quián₅ dsi₂tan₅₄

⁴³ Jme₁ca₂dsan₃ tin₃ jmig₄ jaun₂, ca₂o₃'íin₃ ja₁jaun₂, ca₂'í₃ jui₅ ñái'₃ jui₅ 'uē₃ Galilea.

⁴⁴ Ia₁ jui₁lia'₂ ca₂juá'₂ 'ñiog₅ Jesús, jui₁lia'₂ jan₂ dsa₂ i₂'ě₂ jág₁ o₄quió'₄ Diú₄, tsá₃ jme₂go₃ dsa₂ juíg₂ go₅₄.

⁴⁵ Jme₁ca₂dsiáin'₃ 'uē₃ Galilea né₃, ca₂guei₃ bá₄ dsa₂ dse₃ ja₁jaun₂, ia₁ jme₁ma₂ca₂jág₃ bá₄ ca₂le₃jě₃ 'e₂ a₂ca₂jmo₃ Jesús juíg₂ Jerusalén jme₁ca₂tě₂ Jmíg₄ Tē₂'ín₅₄, ia₁ ján₃ bá₄ jme₁i₁len₅₄ 'éi₂ jmig₄.

⁴⁶ Jaun₂ né₃, ca₂dsióg₃ táng₃ juíg₂ Caná a₂tén₅ 'uē₃ Galilea ja₁ca₂jme₃tsíin₃ jmig₂ ca₂jmo₃ vino. Ja₁jaun₂ jme₁'en₅₄ jan₂ dsa₂ i₂jme₂ti₃ ta₁ ne₄ rag₅₄, i₂chan₂ jan₂ chi'₂ dso'₅₄ quiáin₅, jē₄ juíg₂ Capernaum.

⁴⁷ Jme₁ca₂rě₃ñi₅ dsa₂ 'éi₂ a₂ma₂ñi₅ Jesús 'uē₃ Galilea, 'ein₅₄ jui₅ a₂o₂'íin₃ 'uē₃ Judea, jaun₂ ñei₅₄ ca₂i₁jñin₁₂ Jesús, jaun₂ ca₂chi₃quióng₂ jmig₄ tion₅₄-jan₃ a₂dsó₃ 'éi₂ ja₁quió'₄ a₂jme₃'lióin₂ ja₁ñi'₅₄ i₂ron₅ ma₂i₁jón₂.

^r37 quio₃: Jág₁ quió'₅ dsa₂ Jen'₅₄, co₂'nió'₄ le₃jua'₅₄, caun₂ jág₁ a₂ñí'₂ dsí'₅ a₂ca₂quio₂ dsa₂ can'₅₄, a₂dsia₅ dsa₂.

^s42 A₂lin₅₄ chog₅₄ si₂: “Tē₃dsón'₂ bá₄ 'éi₂ lín₅ I₂rě₂'ín₁ quián₅ Diú₄, i₂lión₂ dsa₂ mi₂güí₃.”

- ⁴⁸ Jaun₂ né₃ ca₂juá'₂ Jesús:
—Tsá₃ 'én'₂ 'nia'₂ ně₁jua'₂ tsá₃ ca₂jag'₅₄ léi₄ juë'₂ a₂dsi₂gó'₃ 'au'₂.
- ⁴⁹ Jaun₂ ca₂juá'₂ dsa₂ i₂jme₂ti₃ ta₁ ne₄ rag₅₄ 'éi₂:
—Te₁gui'₅₄, i₂ñáu'₂ ué₃ ñia₅, né₃ gué₄ a₂jón₂ chi'₂ quiáng₃.
- ⁵⁰ Jaun₂ né₃ ca₂juá'₂ Jesús:
—Guan'₂ bá₄ quiáng'₂; ia₁ i₂chan₂ bá₄ chi'₂ quiáng'₂.
Ca₂rë₃'én₂ bá₄ dsa₂ jág₁ a₂ca₂juá'₂ Jesús, jaun₂ ca₂ñái'₃.
- ⁵¹ Jaun₂ jme₁ma₂'ein₅₄ jui₅ dsiáin'₂, jaun₂ ca₂jme₃jein'₂ dsa₂ i₂jme₂ti₃ ta₁ ne₅₄, jaun₂ ca₂juá'₂ 'éi₂:
—I₂chan₂ bá₄ chi'₂ quiáng'₂.
- ⁵² Jaun₂ ca₂ñag₃ 'e₂ hora ca₂tág'₃ dsí₅. Jaun₂ ca₂juá'₂ dsa₂ 'éi₂:
—Dsióg₂ con'₂ hora ñí₁ caun₂ tē₂le₃ ca₂'láu₂,^t ca₂ñia₃ dséi₂ a₂jme₁'i₁.
- ⁵³ Jaun₂ ca₂rë₃lí'₄ jmei₂ chi'₂ 'éi₂, hora jaun₂ dé₄ ca₂juá'₂ Jesús:
“I₂chan₂ bá₄ chi'₂ quiáng'₂.” Jaun₂ ca₂rë₃'én₂ dsa₂ 'éi₂, quian'₅₄ ta₁jín₂ dsa₂ dsi₂néi₂ quió'₅.
- ⁵⁴ A₂nē₅ jē₁ca₂tē₂ táng₃ léi₄ juë'₂ a₂ca₂jmo₃ Jesús, jme₁ca₂o₃'ín₃ Judea, jme₁guáin'₃ Galilea.

Ca₂jme₃'lión₂ Jesús jan₂ dsa₂ 'lian'₂ i₂ron₅ cau₅ Dsiog₅ Betesda

- 5** ¹ Cang₂ jaun₂ ca₂jmo₃ dsa₂ judíos caun₂ jmig₄, jaun₂ ca₂uíg₂ táng₃ Jesús jui₅ Jerusalén.
- ² Jē₄ juig₂ Jerusalén jaun₂, cau₅ ja₁lě₄ caun₂ o₄'né₄ a₂chei₂ quió'₅ Já'₂ Cha'₂, niog₅ caun₂ dsiog₅ a₂chei₂ Betesda^u quian'₅₄ jág₁ arameo, ja₁lě₄ 'ñiá₂ corredor.
- ³ Ja₁jaun₂ jme₁tián'₄ 'uē₃ juin₅ dsa₂ i₂qui₂le₁dso'₅₄, jē₃ dsa₂ ten₄, dsa₂ guian'₅₄ quian'₅₄ dsa₂ 'lian'₂ né₃, a₂chi₁ñia₂₃ a₂qui₃jē'₂ jmig₂. ⁴ Ia₁ jme₁lín₅₄, sión₅ jan₂ ángel quián₅ Te₁gui'₅₄ ja₁niog₅ dsiog₅ jaun₂, jaun₂ jmo₂₃ qui₂jē'₂ jmig₂. Jaun₂ jui₁lia'₂ dsa₂ dso'₅₄ i₂'í₂ le₂'uig₅₄ jmig₂ jē₁ma₂i₂bi₅₄, jme₁ñia₅ quió'₅, chi₂jua'₂ 'e₂ dso₄ jme₁lín₄.^v
- ⁵ Ja₁jaun₂ jme₁ron₅ jan₂ dsa₂ dso'₅₄, jme₁ma₂tē₂ guióg₂-guiá₂-ñiá₂ ñi₂ roin₂₃ dso'₅₄.
- ⁶ Jme₁ca₂jág₃ Jesús ron₅ dsa₂ dso'₅₄ ja₁jaun₂, jaun₂ jme₁ca₂rë₃lí'₄ ma₂líg'₂ bá₄ lín₅ le₂jaun₂, ca₂ñag₃:
—¿'Niog'₂ 'lióng'₂?
- ⁷ Jaun₂ ca₂ñag₃ dsa₂ dso'₅₄:
—Gui'₅₄, tsá₃ 'ein₂ chan₂ to'₂ jniá₂ 'ñiό'₃ dsiog₅ jē₁ma₂tē₂ rē₁qui₃jē'₂ jmig₂. Lia'₂ co₂ráun₂ 'nio₃ 'ú₄, i₂sián'₂ bá₄ sión₅ le₂'uig₅₄.
- ⁸ Jaun₂ ca₂juá'₂ Jesús:
—Nau₂, chog'₅₄ tsī₁jein₁ quiáng'₂, ñi₄ né₃.

^t52 lit. “hora guio₃.” 'Nio'₂ ja₁ton₅ Apéndice B.

^u2 A₂lin₅₄ chog₅₄ si₂: “Betzata”; a₂siá'₂ né₃: “Betsaida.”

^v4 Chog₅₄ si₂ a₂dse₃ gué₄ tsá₃ chi₁ton₅ versículo 4.

⁹ Dsi₂jui₅ le₂jaun₂ bá₄ ca₂jñia₃ quió'₅ dsa₂ 'éi₂. Ca₂chóg'₃ tsi₁jein₁ quió'₅, jaun₂ ca₂jme₃lióg₃ ca₂ñi₃. A₂jaun₂ ca₂lë₃ caun₂ jmi₄g₄ sa₅₄.

¹⁰ Jaun₂ ca₂juá'₂ dsa₂ judíos ca₂tsí'₃ dsa₂ i₂ca₂'lón₂ 'éi₂:

—Jmi₄g₄ sa₅₄ bá₄ nē₃; tsá₃ 'i₄ 'éi'₃ caun'₅₄ tsi₁jein₁ quiáng'₂ jmi₄g₄ nē₃.

¹¹ Jaun₂ ca₂ñag₃ dsa₂ 'éi₂:

—I₂nē₂jme₃'lió₂ jniá₂, nē₂juá'₂: “Chog'₅₄ tsi₁jein₁ quiáng'₂, ñi₄ nē₃.”

¹² Jaun₂ nē₃ ca₂ñag₃ táng₃ dsa₂ 'éi₂:

—¿Ein₂ 'éi₂ nē₂juá'₂ a₂caun'₅₄ tsi₁jein₁ quiáng'₂, a₂ñí'₂ nē₃?

¹³ La₁ tsá₃ ñi₅ 'ein₂ 'éi₂ i₂nē₂jme₃'lió₂ quió'₅, ia₁ jme₁ma₂i₂cón'₅ Jesús jin₄ dsa₂ juin₅ i₂jme₁tion'₅₄ ja₁jaun₂.

¹⁴ Cang₂ jaun₂ ca₂jen'₂ Jesús ca₂jein'₂ dsa₂ 'éi₂ i₁dsi₅ guá'₅ templo, jaun₂ ca₂juá'₂:

—Jag₄ de'₂, nē₃ lia'₂ ma₂'lóng'₂, tsá₃ ma₃lë₁'nau₂ dso₄, ia₁jaun₂ tsá₃ dsi₃ñíg'₂ caun₂ jmi₁uig₅ 'ñio₅ gué₄ con'₂ gué₄ a₂jme₁lín'₄ le₂jñiá₅.

¹⁵ Jaun₂ ñá'₃ bá₄ dsa₂ 'éi₂, jaun₂ ca₂i₁chi'₄ dsa₂ judíos, Jesús bá₄ 'éi₂ i₂ca₂jme₃'lió₂ quió'₅.

¹⁶ 'Uig₅₄ jaun₂ qui₂ca₂co₃'ein₃ dsa₂ judíos quió'₅ Jesús,^w ia₁ jme₁tin₂ Jesús jme₁jmo₂₃ le₂nē₅ jmi₄g₄ sa₅₄.

¹⁷ La₁ ca₂juá'₂ Jesús ca₂tsí'₃ dsa₂ judíos:

—Lia'₂ jmo₅ jaun₂ Ñe'₃ ta₁ jñia'₅₄ jmi₄g₄ nē₃; ján₃ bá₄ le₂jaun₂ jmo₅ jniá₂ ta₁.

¹⁸ 'Uig₅₄ jaun₂, tē₂le₃ i₂jui'₂ gué₄ jme₁'nio₃ jñag'₃ dsa₂ judíos, ia₁ on₃jua'₅₄ jmá'₃ 'éi'₃ jmi₄g₄ sa₅₄ jmo₂₃ cau₅, ján₃ bá₄ ca₂tē₂ jmo₂₃ a₂lín₅ co₂riin₂ quian'₅₄ Diú₄, ia₁ a₂juá'₂ Diú₄ bá₄ lín₅ Jmei₂.

'Éi'₃ a₂ron₅ quió'₅ Ja₁ñi'₅₄ Diú₄.

¹⁹ Jaun₂ nē₃ ca₂juá'₂ Jesús ca₂tsí'₃ dsa₂ judíos:

—A₂dsi₂jó'₃ juíg₂ jniá₂ 'nia'₂, tsá₃ 'e₂ lé₂ le₃jmo₃ Ja₁ñi'₅₄ 'i₁caun₂ 'ñiog₅; a₂jaun₂ bá₄ jmo₂₃ jui₁lia'₂ a₂jág₅ jmo₅ Jmei₂. Jui₁lia'₂ 'e₂ ta₁ a₂jmo₅ Jmei₂, a₂jaun₂ bá₄ jmo₅ Ja₁ñi'₅₄ ján₃.²⁰ Ia₁ 'nio₃ Jmei₂ 'nioi₃ Ja₁ñi'₅₄, jaun₂ 'ē₂₃ 'é'₅ Ja₁ñi'₅₄ ca₂le₃jé₃ 'e₂ a₂jmo₂₃. Tē₂le₃ lé₅ gué₄ jué'₂ ta₁ qui₃'ē₃, con'₂ gué₄ a₂le₂la₂, ia₁jaun₂ qui₂dsi₃gó'₃ 'au'₂ 'nia'₂.²¹ Ia₁, jui₁lia'₂ jme₂jen'₅₄ Jmei₂ jme₂jein'₅₄ 'lag₄, cuē₂₃ jme₂dsí₂ a₂le₃chain₂, ján₃ bá₄ le₂jaun₂ cuē₅ Ja₁ñi'₅₄ jme₂dsí₂ cué'₅ jui₁lia'₂ i₂'nio₃ cué'₃.²² Ján₃ gué'₂, tsá₃ con₂ Jmei₂ 'í₁ quió'₅ 'i₁jan₂; o₄gú₃ Ja₁ñi'₅₄ bá₄ ma₂dsia₃ ca₂le₃jé₃ 'éi'₃ a₂con₂ 'í₁,²³ ia₁jaun₂ jme₃go₃ ca₂le₃jín₃ dsa₂ jme₃gain₃ Ja₁ñi'₅₄, jui₁lia'₂ jme₂gain₃ Jmei₂. Jui₁lia'₂ i₂tsá₃ jme₂gan₃ Ja₁ñi'₅₄, tsá₃ jme₂gain₃ Jmei₂ i₂ca₂chei₃.

²⁴ 'A₂dsi₂jó'₃ juíg₂ jniá₂ 'nia'₂: jui₁lia'₂ i₂nag₅ i₂tón'₂ jui₅ jág₁ quió'₃, ton'₂ 'éin₂ tē₂le₃ quió'₅ i₂ca₂chei₃, le₃chain₂ bá₄ co₂tan₅₄. Tsá₃ 'í₁ jióg'₂ ja₁coin₂, ia₁ ma₂ca₂ñi₅ ne₄ 'mú₃, ma₂ca₂dsióg₃ ja₁le₃chain₂ co₂tan₅₄.

^w16 A₂lin₅₄ chog₅₄ si₂ a₂me'₂ gué₄ juá'₂ ján₃: “a₂jme₁'nio₃ jñag'₃.”

²⁵ A₂dsi₂jó₃ juí₂ jniá₂ 'nia'₂, já₅ jmi₄ ton'₂ ma₂tě₂ dsón'₂, jē₁ma₂tě₂ rē₁nag₃ 'lag₄ já₁ quió'₅ Ja₁ñi'₅₄ Diú₄. Jui₁lia'₂ i₂ne'₅₄ ně₃, le₃chain₂ bá₄.
²⁶ Ia₁ jui₁lia'₂ 'io₅ bí₂ Jmei₂ a₂le₃chain₂ 'ñiog₅, já₃ bá₄ le₂ně₅ ma₂cué'₃ Ja₁ñi'₅₄ jui₅bí₂ a₂le₃chain₂ 'ñiog₅.
²⁷ Já₃ bá₄ ma₂cuē₃ jui₅bí₂ a₂con₂ 'í₁ qui₃dsi₂₃ 'éi'₃, ia₁ lín₅ Jaun₅ dsa₂ mi₂güí₃.
²⁸ Tsá₃ lē₁jui₁dsi₂gó'₃ 'au'₂ 'nia'₂ já₁ a₂nē₂juá'₃ jniá₂ la₂, ia₁ já₅ hora a₂nag₃ ca₂le₃jín₃ dsa₂ i₂le₁'on₅ tau₂ 'ñio₅, já₁ quió'₅,
²⁹ jaun₂ 'uín₃ ja₁jaun₂. Jui₁lia'₂ i₂ca₂jmo₃ a₂dsi₂ten₅₄, jein'₅₄ a₂dsi₁lein₅ ja₁le₃chain₂ co₂tan₅₄; la₁ia₁ jui₁lia'₂ i₂ca₂jmo₃ a₂'lig'₅₄, jein'₅₄ a₂tě₃dsi₅₄ 'éi'₃ ja₁coin₂.

Jau'₂ 'í₁ a₂dsón'₂ 'io₅ Jesús bí₂

³⁰ 'Tsá₃ 'e₂ lé₂ le₃jmo₅₄ jniá₂ jua'₅₄ a₂jmo₅₄ con'₂ ting₂ 'ñio₃. Qui₂dsi₂ jniá₂ 'éi'₃ lia'₂ con'₂ lē₅ já₁ a₂nég'₄ ja₁con₂ Ne'₃, jaun₂ dsi₂ten₅₄ bá₄ 'éi'₃ a₂qui₂dsi₂ jniá₂, ia₁ tsá₃ a₂jaun₂ jmo₅ jniá₂ lia'₂ con'₂ lē₅ a₂'ñio₂ dsi₃ 'ñio₃; a₂jaun₂ bá₄ jmo₅ jniá₂ lia'₂ con'₂ lē₅ a₂'ñio₂ dsi₅ 'éi'₂ i₂ca₂chei₃ jniá₂.
³¹ Nē₁jua'₂ já₁ng'₅ jniá₂ já₁ dsau₅ ja₁cong₂ 'ñio₃, já₁ jaun₂ a₂jáng'₅, tsá₃ quen₅.
³² La₁ia₁ chan₂ guē₄ jan₂ i₂sián'₂ i₂jáng'₅ já₁ dsau₅ tē₂le₃ quió₃ jniá₂, jaun₂ guion₄ jniá₂ jui₁lia'₂ a₂juá'₂ 'éi'₂ 'ag₂₃ jniá₂, tí₅ bá₄ já₁ a₂jáng'₅.
³³ Ca₂chen'₂ 'nia'₂ dsa₂ a₂ca₂i₁nag₁₂ ne₄ Juan₅₄, jaun₂ dsón'₂ tí₅ bá₄ já₁ dsau₅ a₂ca₂jáng'₃ 'éi'₂.
³⁴ La₁ia₁ on₃jua'₅₄ jaun₂ chén'₅ jniá₂ rē₂ ia₁ a₂jáng'₅ dsa₂ mi₂güí₃ já₁ dsau₅ tē₂le₃ quió₃ jniá₂; a₂jaun₂ bá₄ juí₂ jniá₂ 'nia'₂ já₁ la₂ ia₁jaun₂ lé₂ le₃lión'₂ 'nia'₂.
³⁵ Jme₁lín₄ Juan₅₄ nē₂jag₄ caun₂ si₂ ni₁tsí₅ a₂cau₂ a₂tág₅. Jaun₂ 'nia'₂ ně₃, jme₁ma₂'éi'₂ caun₂ 'au'₂ a₂jmo₂ co₂'na₂ 'io'₂ ja₁tág₅ si₂ quió'₅.
³⁶ La₁ia₁ jniá₂ ně₃, 'ñio₅₄ jan₂ i₂jáng'₅ já₁ dsau₅ i₂juin'₂ guē₄ lia'₂ con'₂ guē₄ Juan₅₄. Ia₁ jui₁lia'₂ léi₄ a₂jmo₅ jniá₂, a₂jaun₂ ca₂cuē₃ Ne'₃ a₂jmo₅₄. A₂jaun₂ bá₄ jáng'₅ já₁ dsau₅ a₂dsón'₂ bá₄ ca₂chei₃ Ne'₃.
³⁷ Já₃ bá₄ le₂jaun₂, 'ñiog₅ bá₄ Ne'₃ jniá₂ i₂ca₂chei₃, jáng'₅ 'éi'₂ já₁ dsau₅ tē₂le₃ quió₃ jniá₂. 'Nia'₂ ně₃, lia'₂ 'i₁cón'₂ tsá₃ ma₂nei'₂ 'nia'₂ já₁ quió'₅, on₃ guē'₂ ma₂jñin'₅₄ 'nia'₂ 'a₂ lia'₂ lín₅,
³⁸ on₃ guē'₂ ma₂tē₁gua₁ já₁ quió'₅ tē₂'au'₂, ia₁ tsá₃ 'én'₂ 'nia'₂ tē₂le₃ quió'₅ 'ñiog₅ i₂ca₂chein₃.
³⁹ A₂'i'₂ 'nia'₂ Si₂ quió'₅ Diú₄ ca₂lia'₂ dsen₅₄ 'au'₂, ia₁ lín'₂ 'nia'₂ a₂le₃chan₂ 'nia'₂ co₂tan₅₄ tē₂le₃ quian'₅₄ Si₂ jaun₂. Si₂ jaun₂ bá₄ jáng'₅ já₁ dsau₅ 'ag₂₃ jniá₂.
⁴⁰ Jaun₂ 'nia'₂ ně₃, tsá₃ 'niog'₂ i₁nóg'₅ ne₃ jniá₂ ia₁jaun₂ le₃chan'₂ 'nia'₂.

⁴¹ 'Tsá₃ gue₅ jniá₂ a₂jme₂juag'₂ dsa₂ mi₂güí₃.
⁴² La₁ cuín₅ jniá₂ 'nia'₂, jaun₂ guion₄ jniá₂ a₂tsá₃ jaun₂ le₁'i₁ tē₂'au'₂ 'nia'₂ a₂niog₅ dsi₅ Diú₄ a₂'nioi₃ 'nia'₂.
⁴³ O₄quió'₄ Ne'₃ bá₄ jniá₂ guio₃, 'nia'₂ guē'₂ tsá₃ guē'₅ jniá₂; la₁ia₁ nē₁jua'₂ ca₂já₃ jan₂ o₄quió'₄ 'ñiog₅, i₂'éi'₂ bá₄ guén'₄ 'nia'₂.
⁴⁴ 'A₂ lia'₂ lé₂ le₃'én'₂ 'nia'₂, chi₂jua'₂ jaun₂ 'náu'₂ a₂tióng'₂ rē₂ quiang'₅₄ ríng'₂, tsá₃ guē'₂ 'náu'₂ 'nia'₂ a₂qui₁náu'₂ rē₂ quiang'₅₄ Diú₄?
⁴⁵ Tsá₃ o₁len'₂ 'nia'₂ jua'₅₄ a₂'nág₄ jniá₂ ne₄ Ne'₃; chan₂ jan₂ i₂'nag₅: Moisés bá₄ 'éi'₂. Le₃quió'₅ 'éi'₂ bá₄ 'ín₂ 'au'₂ 'nia'₂.
⁴⁶ Ia₁ jua'₅₄ mei'₂ guē₃ ca₂rē₃'éng'₂ já₁ quió'₅ Moisés, já₃ bá₄ le₂jaun₂ jme₁le₃'éng'₂ já₁ quió₃, ia₁ jniá₂ bá₄

ca₂'ag₃ Moisés ne₄ Si₂.⁴⁷ La₁ chi₂jua'₂ tsá₃ 'én'₂ guë'₂ 'nia'₂ jág₁ a₂ca₂tó'₂ 'éi'₂ ne₄ Si₂, 'a₂ guë'₂ lia'₂ lé₂ le₃'én'₂ 'nia'₂ jág₁ a₂juá'₅ jniá'₂?

Ca₂ñi'₃ Jesús 'ñiá₂ mei₅ dsa₂

(Mateo 14:13-21; Marcos 6:30-44; Lucas 9:10-17)

6¹ Cang₂ jaun₂ ca₂ñó₃ Jesús të₂le₃ quióng₄ ca₂taun₂ jmi₁ñí'₄ Galilea, (a₂chei₂ jmi₁ñí'₄ Tiberias).² Jaun₂ ca₂i₃lén₂ juin₅ lin₃ dsa₂ chi₁co'₅₄ quió'₅, ia₁ ma₂jág₃ léi₄ jué'₂ a₂ma₂jmo₃, a₂qui₂ma₂ca₂jme₂'lióin₂ dsa₂ i₂jme₁le₁dso'₅₄.³ Jaun₂ né₃ ca₂uíg₂ Jesús caun₂ má'₂, jaun₂ ca₂guá'₂ ja₁jaun₂ quiaín'₅₄ chi'₂ dsi₂guia₃-tín₂ quiaín₅.

⁴ Jmíg₄ jaun₂, jme₁ma₂ja₂quián₃ Jmíg₄ Të₂'lin₅₄, co₂'nió'₄ jmíg₄ quió'₅ dsa₂ judíos.

⁵ Jme₁ca₂jág₃ Jesús ca₂jín₂ juin₅ lin₃ dsa₂ i₂ja₂lén₂, jaun₂ ca₂juá'₂ ca₂tsí'₃ Felipe:

—'A₂já'₄ dsi₁liá'₄ má₃ a₂gué'₃ ca₂le₃jín₃ dsa₂ në₅?

⁶ A₂jaun₂ bá₄ ca₂juá'₂ Jesús le₂në₅ o₁ne₄ 'e₂ jme₁ñag₃ Fe₂li₄, ia₁ jme₁ma₂ñi₅ rë₂ bá₄ Jesús 'ñiog₅ 'e₂ a₂jmo₃.

⁷ Jaun₂ né₃ ca₂ñag₃ Fe₂li₄:

—Tin₃ 'ñiá₂-láu₂ denario i₁ñí'₄ tsá₃ len₅ bá₄ gué'₄ a₂ñe₂ jma₃ca₂juig₄ le₂jan₂ le₂jan₂ dsa₂.

⁸ Jaun₂ né₃ ca₂ñag₃ gué'₄ jan₂ chi'₂ dsi₂guia₃-tín₂ quiaín₅ Jesús, i₂jme₁chen₂ Dré₄ rin'₅₄ Si₂mu₅₄ Pe₄:

⁹ —Jë₄ la₂ 'en₅₄ jan₂ i₂bë'₅₄ i₂quian₅ 'ñiá₂ i₁ñí'₄ cebada, quian'₅₄ guë'₂ on₃ ju₄; la₁ia₁, 'e₂ bá₄ cha₂ 'e₂ jaun₂, ja₁con₂ dsa₂ juin₅ le₂në₅?

¹⁰ Jaun₂ né₃ ca₂juá'₂ Jesús:

—Chei'₅₄ dsa₂ ca₂le₃jín₃ jui₁tiain'₂₃.

'Lióng₂ ñi₂ma'₂ jme₁cha₂ ja₁jaun₂, jaun₂ ca₂tián'₂ dsa₂ ñe'₂, i₂jme₁lé₂ con'₂ 'ñiá₂ mei₅ dsa₂.

¹¹ Jaun₂ né₃ ca₂can₃ Jesús i₁ñí'₄, jaun₂ jme₁ma₂në₂cué'₃ ti₁'mag'₄ Diú₄, qui₂ca₂dsiό'₃ ca₂cué'₃ ca₂le₃jín₃ dsa₂ i₂jme₁tián'₄ ja₁jaun₂.^x Ján₃ bá₄ le₂jaun₂ ca₂jmo₃ quian'₅₄ dsi₂ju₄ 'éi₂, ca₂cué'₃ ca₂le₃jín₃ dsa₂ 'a₂ con'₂ jñia'₅₄ 'nio₃.

¹² Jaun₂ jme₁ma₂lí'₃ dsa₂ gué'₅, ca₂juá'₂ Jesús ca₂tsí'₃ chi'₂ dsi₂guia₃-tín₂:

—Cag'₅₄ 'nia'₂ ni₁jne₁ i₁ñí'₄ a₂ca₂chóng₃, ia₁jaun₂ tsá₃ 'e₂ dsi₃'én₂.

¹³ Jaun₂ ca₂cág'₃, jaun₂ ca₂jme₃cain'₂ guia₃-tín₂ tsi₁mi'₂ tá₂, quian'₅₄ ni₁jne₁ a₂ca₂chóng₃ a₂'ñiá₂ i₁ñí'₄ cebada jaun₂.

¹⁴ Jaun₂ né₃, jme₁ca₂jág₃ dsa₂ léi₄ a₂ca₂jmo₃ Jesús, ca₂juá'₂:

—Dsón'₂ bá₄ lín₅ dsa₂ në₅ dsa₂ i₂'é₂ jág₁ quiaín₅ Diú₄, i₂lé₅ jág₁ jiá₃ mi₂güí₃.

^x11 A₂lin₅₄ chog₅₄ si₂ a₂me'₂ gué'₄ juá'₂: “jme₁ma₂në₂cué'₃ ti₁'mag'₄ Diú₄, jaun₂ ca₂cué'₃ chi'₂ dsi₂guia₃-tín₂, jaun₂ chi'₂ dsi₂guia₃-tín₂ né₃ qui₂ca₂dsiό'₃ ca₂cué'₃ ca₂le₃jín₃ dsa₂.”

¹⁵ La₁ ca₂rë₃lí₄ bá₄ Jesús a₂'nio₃ dsa₂ jme₁të₂ tion₅₄, a₂jme₁jmoí₂ 'éi₂ rag₅₄, jaun₂ ca₂ñái₃ bá₄ táng₃ ca₂'í₃ má₂ con₂ 'ñiog₅.

Ca₂ñi₃ Jesús ne₄ jmi₂g₂ jmi₁ñí₄

(Mateo 14:22-27; Marcos 6:45-52)

¹⁶ Jme₁ca₂nei₂ jaun₂, ca₂sión₃ chi₂' dsi₂guia₃-tín₂ quiáin₅ ca₂të₂ jmi₁ñí₄.

¹⁷ Jaun₂ ca₂tóin₂ 'ñió₃ caun₂ tsi₁mu₅, jaun₂ ca₂jme₃lióg₃ ca₂'ain₃ jmi₁ñí₄ a₂dsi₃lén₂ Capernaum. Jme₁ma₂tó₂ nei₂ bá₄ jaun₂, tsá₃ jme₁ma₂quiong₅₄ bá₄ gué₄ Jesús.

¹⁸ Jaun₂ ca₂rë₃lióg₃ ca₂'ág₂ dsí₂ tiá₂ lín₃, jaun₂ qui₂ca₂ron₂' jmi₁ñí₄.

¹⁹ Jme₁ma₂'ain₂ con₂ 'ñiá₂-jñéi₂ kilómetros, jaun₂ ca₂jág₃ a₂ja₂quián₃ Jesús cau₅ tsi₁mu₅, a₂ñi₂₃ ne₄ jmi₂g₂; jaun₂ ca₂rë₃gó₅ 'ñio₅ lín₃.

²⁰ La₁ia₁ ca₂juá₂' Jesús:

—iJniá₂ bá₄ la₂; tsá₃ lë₁jmo₂ 'nia₂ gang₃!

²¹ Jaun₂ né₃ ca₂lia₂' 'io₂ jén₅ bá₄ ca₂guein₃^y Jesús 'ñió₃ tsi₁mu₅, jaun₂ quian₅₄ ca₂tiá₂ co₂lág₂ bá₄ ca₂dsi₃lén₂ chei₅₄ 'uë₃ ja₁jme₁tioin₅₄ jui₅ i₃lén₂.

'Nau₂ dsa₂ 'nai₂ Jesús

²² Jme₁ca₂jnia₃ jaun₂, ca₂rë₃lí₄ dsa₂ i₂të₁'ñiá₄ të₂le₃ quióng₄ ca₂taun₂ jmi₁ñí₄, a₂jme₁chí₄ caun₂ tan₅₄ tsi₁mu₅ ja₁jaun₂, ton₂' tsá₃ ca₂'í₃ Jesús 'ñió₃ jaun₂ quiain₅₄ chi₂' dsi₂guia₃-tín₂; guion₅₄ bá₄ chi₂' dsi₂guia₃-tín₂ i₃lén₂.

²³ La₁ të₁lia₂' jaun₂, o₃lé₂ tsi₁mu₅ siá₂' a₂ja₂lei₃ juig₂ Tiberias, ca₂o₃lé₂ quián₅ ja₁ca₂gué₃' i₁ñí₄ le₂jñiá₅ jme₁ca₂lë₃ cué₅' Te₁gui₅₄ ti₁'mag₄' Diú₄.^z

²⁴ Jaun₂ né₃, jme₁ca₂rë₃lí₄ dsa₂ a₂tsá₃ Jesús chan₂ ja₁jaun₂, on₃ guë₂' chi₂' dsi₂guia₃-tín₂ quiáin₅, ca₂i₃toin₅₄ 'ñió₃ tsi₁mu₅, ca₂i₃lén₂ jui₅ Capernaum ca₂i₁'niog₂'.

Jesús bá₄ lín₅ i₁ñí₄ a₂le₃chan₂ dsa₂ co₂tan₅₄

²⁵ Jme₁ca₂dsi₃lén₂ dsa₂ të₂le₃ quióng₄ ca₂taun₂ jmi₁ñí₄, ca₂dsáin₂' Jesús, jaun₂ ca₂ñag₃:

—Të₅, ñlíg₂' guang₃' ja₁lá₃?

²⁶ La₁ia₁ ca₂ñag₃ Jesús ca₂tsí₃ dsa₂ 'éi₂:

—A₂dsi₂jó₃' juíg₂ jniá₂ 'nia₂, a₂'nau₂' jniá₂ i₂niog₅₄, ia₁ ca₂qué₂' 'nia₂ lia₂' ág₃' 'au₂' i₁ñí₄, on₃jua₅₄ rë₂' ia₁ a₂ca₂rë₃ñí₂' 'nia₂ léi₄ jaun₂.²⁷ Tsá₃ lë₁jmo₂ 'nia₂ ta₁ o₄quió₄' má₃ a₂jñia₅₄ con₂' dsi₃'én₂, të₂le₃ o₄quió₄' má₃ a₂jio₅ co₂tan₅₄ bá₄ jmo₄ 'nia₂ ta₁, a₂cuë₅ Jaun₅ dsa₂ mi₂güí₃. Ia₁ ne₄ 'éi₂ ma₂tíong₃ 'ñiog₅ bá₄ Diú₄ Jme₁ léi₄ quió₅'.

^y21 o₃, “jme₁guein₃.”

^z23 A₂lin₅₄ chog₅₄ si₂ tsá₃ chi₁ton₅ “jme₁ca₂lë₃ cué₅' Te₁gui₅₄ ti₁'mag₄' Diú₄.”

²⁸ Jaun₂ né₃ ca₂ɲag₃ dsa₂:
—¿E₂ 'nió'₅ jmó'₁ jnia'₅₄ ia₁jaun₂ lé₂ le₃jmó'₁ jnia'₅₄ ta₁ a₂'nio₃ Diú₄
jmó'₁?

²⁹ Jaun₂ ca₂ɲag₃ Jesús:
—A₂la₂ bá₄ ta₁ quió'₅ Diú₄: a₂le₃'én'₂ 'nia'₂ tē₂le₃ quió'₅ i₂chen₄
quiáin₅.

³⁰ Jaun₂ né₃ ca₂ɲag₃ dsa₂:
—¿E₂ léi₄ lé₂ le₃'é'₂ jnia'₅₄, ia₁jaun₂ jag₅₄ jnia'₅₄ jaun₂ le₃'éin₂ jnia'₅₄
quiáng'₂? ¿E₂ léi₄ jmó'₂? ³¹ Dsa₂ can'₅₄ quián₂ jnia'₅₄ ma₂líg'₂, ca₂gué'₃
i₁ɲí'₄ maná, lia'₂ con'₂ jme₁tioin'₅₄ 'uē₃ quein₂ co₂'ɲiog₅ jaun₂, jui₁lia'₂
juá'₂ ne₄ Si₂ quió'₅ Diú₄: “Ca₂cuē₃ Moisés ca₂gué'₃ 'éi₂ i₁ɲí'₄ a₂ca₂já₃
guei'₅₄ i₂juíg₃.”^a

³² Jaun₂ ca₂ɲag₃ Jesús:
—A₂dsi₂jó'₃ juíg₂ jniá'₂ 'nia'₂: on₃jua'₅₄ Moisés i₂ca₂cuē₃ i₁ɲí'₄ a₂já₅
guei'₅₄ i₂juíg₃; Ne'₃ bá₄ jniá'₂ i₂cué'₅ 'nia'₂ i₁ɲí'₄ tē₃dsón'₂ a₂já₅ guei'₅₄
i₂juíg₃. ³³ Ia₁ jui₁lia'₂ i₁ɲí'₄ a₂já₅ ja₁con₂ Diú₄, i₂'éi₂ bá₄ lín₅, i₂ca₂sión₃
guei'₅₄ i₂juíg₃, i₂jmo₅ a₂le₃chan₂ dsa₂ co₂tan₅₄.

³⁴ Jaun₂ né₃ ca₂juá'₂ dsa₂ ca₂tsí'₃ Jesús:
—Te₁gui'₅₄, cuē₄ lia'₂ o₂jmig₄ i₁ɲí'₄ a₂'ë'₂ 'ne₂ nē₅.

³⁵ Jaun₂ ca₂juá'₂ Jesús:
—Jniá'₂ bá₄ lín₅ i₁ɲí'₄ a₂jmo₅ a₂le₃chan₂ dsa₂. Jui₁lia'₂ i₂ja₂ ja₁con₂
jniá'₂, lia'₂ o₁líg'₂ jmig₄ tsá₃ ma₃lé₂ i₁cón'₅; ján₃ bá₄ le₂jaun₂ jui₁lia'₂ i₂'én₂
tē₂le₃ quió'₃ jniá'₂, lia'₂ o₁líg'₂ jmig₄ tsá₃ ma₃le₃quein₂ dsí'₅. ³⁶ La₁ jui₁lia'₂
ma₂nē₂juíg₂ jniá'₂ 'nia'₂, tsá₃ 'én'₂ 'nia'₂ o₁jnia'₅₄ ma₂nē₂jag'₅₄ 'nia'₂ jniá'₂.
³⁷ Ca₂le₃jín₃ jui₁lia'₂ dsa₂ i₂cuin₅ Ne'₃ cuig₂₃ jniá'₂, ja₃léin₂ ja₁con₂ jniá'₂;
jaun₂ jui₁lia'₂ i₂ja₂ ja₁con₂ jniá'₂, lia'₂ o₁'e₂ gué'₃ tsá₃ dséin₄ jniá'₂. ³⁸ Ia₁
on₃jua'₅₄ jaun₂ guio₃ jniá'₂ ca₂sión₃ guei'₅₄ i₂juíg₃ jua'₅₄ a₂jmo₅₄ a₂'ɲio₂
dsi₃ 'ɲió₃; a₂jaun₂ bá₄ guio₃ a₂jmo₅₄ a₂'ɲio₂ dsí'₅ i₂ca₂chei₃. ³⁹ A₂la₂ bá₄
a₂'ɲio₂ dsí'₅ i₂ca₂chei₃: a₂tsá₃ qui₂dsi₃cón'₅ 'i₁jan₂ i₂ma₂cuin₃ 'éi₂ jniá'₂,
tē₂le₃ a₂jme₁jein'₅₄ bá₄ jniá'₂ jmig₄ jē₁ca₂tó'₂. ⁴⁰ A₂la₂ bá₄ a₂'ɲio₂ dsí'₅ Ne'₃:
jui₁lia'₂ ca₂le₃jín₃ i₂jín₂ Ja₁ɲi'₅₄ ton'₂ 'éin₂ tē₂le₃ quió'₅, jui₁le₂chain₂
co₂tan₅₄, jaun₂ jniá'₂ né₃ jme₁jein'₅₄ jmig₄ jē₁ca₂tó'₂.

⁴¹ Quian'₅₄ jág₁ nē₅ ca₂jme₃lióg₃ dsa₂ judíos qui₂ca₂dsia₃ guioin₅₄,
ca₂chi₃'iin₃ Jesús ia₁ jme₁ma₂nē₂juá'₂: “Jniá'₂ bá₄ lín₅ i₁ɲí'₄ i₂ca₂sión₃
guei'₅₄ i₂juíg₃.”

⁴² Jaun₂ ca₂juá'₂:
—¿On₃jua'₅₄ i₂nē₅ Jesús ja₁ɲi'₅₄ Sé₄? I₂cuin₅ bá₄ jniog₄ chog₅₄-jmei₂
i₂nē₅. ¿A₂ gué'₂ lia'₂ juá'₂ a₂ca₂sióin₃ guei'₅₄ i₂juíg₃?

⁴³ Jaun₂ né₃ ca₂juá'₂ Jesús:
—Tsá₃ lē₁ma₃chi₂'ág₅ 'nia'₂. ⁴⁴ Lia'₂ 'i₁jan₂ tsá₃ lé₂ jiá₃ ja₁con₂ jniá'₂,
jua'₅₄ tsá₃ o₂jiog₃ Ne'₃ i₂ca₂chei₃; jaun₂ jniá'₂ jme₁jein'₅₄ jmig₄ jē₁ca₂tó'₂.

^a31 Éxodo 16:4; Nehemías 9:15; Salmo 78:24-25.

⁴⁵ Le₂la₂ ca₂tó'₂ ne₄ Si₂ dsa₂ i₂jme₁'é₂ jág₁ o₄quíó'₄ Diú₄: “Diú₄ bá₄ jme₃tag₅ jme₃tiin₂₃ ca₂le₃jín₃ dsa₂.”^b Jaun₂ ca₂le₃jín₃ jui₁lia'₂ i₂nag₅ jág₁ quió'₅ Ne'₃, ton'₂ qui₂rë₂tiin₂ 'e₂ a₂jmo₅ 'éi₂, ja₃léin₂ bá₄ ja₁con₂ jniá₂.
⁴⁶ On₃jua'₅₄ rë'₂ ia₁ 'ein₂ ma₂jín₂ Jmei₂. Jnia'₅₄ lia'₂ i₂ca₂já₃ ja₁con₂ Diú₄; i₂'éi₂ bá₄ ma₂jín₂ Jmei₂.⁴⁷ A₂dsón'₂ juíg₂ jniá₂ 'nia'₂, jui₁lia'₂ i₂'én₂,^c le₃chain₂ co₂tan₅₄.⁴⁸ Jniá₂ bá₄ líng₅ i₁ñí'₄ a₂jmo₅ a₂le₃chan₂ dsa₂.
⁴⁹ Qui₂ca₂gué'₃ dsa₂ can'₅₄ quián'₂ 'nia'₂ i₁ñí'₄ maná, lia'₂ con'₂ jme₁tioin'₅₄ 'uë₃ quein₂ co₂'ñiog₅ jaun₂, la₁ ca₂dsain₃ bá₄.⁵⁰ A₂la₂ bá₄ lé₅ i₁ñí'₄ a₂ca₂sió₃ guei'₅₄ i₂juíg₃ ia₁jaun₂ në₁jua'₂ 'ein₂ ca₂gué'₃, tsá₃ dsiáin₃.
⁵¹ Jniá₂ bá₄ líng₅ i₁ñí'₄ jén'₃ i₂ca₂sió₃ guei'₅₄ i₂juíg₃ jaun₂; jui₁lia'₂ i₂gué'₅ i₁ñí'₄ la₂, le₃chain₂ co₂tan₅₄. I₁ñí'₄ jui₁lia'₂ a₂juá'₅ jniá₂ cuë₅₄, ni₁ñi₃ 'ñió₃ bá₄ jniá₂ 'ë₂₃, a₂jáng'₄ jniá₂ ia₁jaun₂ le₃chan₂ dsa₂ mi₂güí₃.
⁵² Jaun₂ në₃ qui₂ca₂chen₃ dsa₂ judíos guioin₅₄, a₂juá'₂:
—¿A₂ lia'₂ lé₂ le₃cuë₃ i₂në₅ ñi₅₄ 'ñiog₅ a₂que₅₄ jniog₄?
⁵³ Jaun₂ ca₂juá'₂ Jesús:
—A₂dsi₂jó'₃ juíg₂ jniá₂ 'nia'₂, në₁jua'₂ tsá₃ ca₂qué'₂ 'nia'₂ ñi₄ Jaun₅ dsa₂ mi₂güí₃, në₁jua'₂ tsá₃ ca₂'én'₂ 'nia'₂ jmi₂ 'ain₅₄ në₃, tsá₃ jén'₃ 'nia'₂ të₁lia'₂ chang'₂.⁵⁴ Jui₁lia'₂ i₂gué'₅ ñi₃ jniá₂, ton'₂ 'ín'₂ jmi₃ jniá₂ në₃, le₃chain₂ bá₄ co₂tan₅₄; jaun₂ jniá₂ jme₁jein'₅₄ jmi₄ jë₁ca₂tó'₂.⁵⁵ Ia₁ ni₁ñi₃ jniá₂ bá₄ lé₅ má₃ a₂tí₅ dsón'₂; ján₃ bá₄ le₂jaun₂ jmi₃ jniá₂ lé₅ jmi₂ a₂'ág'₃ dsí₅ të₃dsón'₂.⁵⁶ Jui₁lia'₂ i₂gué'₅ ñi₃ jniá₂, ton'₂ 'ín'₂ jmi₃ jniá₂ në₃, të₂'ñiai₅₄ le₃quíó₃ jniá₂; jniá₂ guë'₂ le₃quíó'₅ 'éi₂.⁵⁷ Jui₁lia'₂ ca₂chei₃ Ne'₃ jén'₃ ca₂chei₃ jniá₂, jaun₂ chan₂ jniá₂ 'uig₅₄ quió'₅ 'éi₂, ján₃ bá₄ le₂jaun₂, jui₁lia'₂ i₂gué'₅ quió₃ jniá₂, le₃chain₂ 'uig₅₄ quió₃ jniá₂.⁵⁸ A₂la₂ bá₄ 'ë₂₃ i₁ñí'₄ i₂ca₂sió₃ guei'₅₄ i₂juíg₃. Qui₂ca₂gué'₃ dsa₂ can'₅₄ quián'₂ 'nia'₂ i₁ñí'₄ maná, la₁ ca₂dsain₃; la₁ jui₁lia'₂ i₂gué'₅ i₁ñí'₄ la₂, le₃chain₂ bá₄ co₂tan₅₄.
⁵⁹ Jág₁ në₅ ca₂juá'₂ Jesús të₁lia'₂ ca₂jme₃tag₂₃ dsi₂néi₂ guá'₅ sinagoga jë₄ juig₂ Capernaum.

Jág₁ a₂le₃chan₂ dsa₂ co₂tan₅₄

⁶⁰ Jme₁ca₂nág₂ dsa₂ jág₁ jaun₂ a₂jme₂tag₅ Jesús, juin₅ dsa₂ i₂quian'₅₄ Jesús ca₂juá'₂:
—Jág₁ a₂juá'₂ në₅ 'ñio₅ lin₃ juí'₅, quian₅ ta₁ guéi₁. ¿'Ein₂ bá₄ lé₂ le₃tón'₂ jui₅ quió'₅?
⁶¹ Jaun₂ në₃ ca₂rë₃lí'₄ Jesús 'e₂ jág₁ chen₅ dsa₂ tioin'₅₄, o₄quíó'₄ jág₁ jaun₂, jaun₂ ca₂juá'₂:
—¿O₃ bá₄ tsá₃ dse₃ ca₂tín'₂ 'nia'₂ jág₁ në₅?⁶² ¿'E₂ bá₄ lé₂ jaun₂ në₁jua'₂ ca₂jing'₅₄ 'nia'₂ Jaun₅ dsa₂ mi₂güí₃ a₂uíg₂ táng₃ ja₁jme₁'ein₅₄ le₂jniá₅?
⁶³ Jme₂dsí₂ bá₄ i₂jmo₅ a₂chan₂ dsa₂; jui₁lia'₂ ni₁ñi₁ dsa₂ në₃, tsá₃ ta₁ tí₄.

^b45 Isaías 54:13.

^c47 A₂lin₅₄ chog₅₄ si₂ juá'₂: “i₂'én₂ të₂le₃ quió₃ jniá₂.”

La₁ jág₁ a₂ma₂në₂juíg₂ jniá₂ 'nia'₂, a₂gu₂dsí₂ bá₄ jaun₂, ton'₂ jmo₅ a₂chan₂ dsa₂.⁶⁴ La₁ tion'₅₄ bá₄ gué₄ i₂lin₅₄ 'nia'₂ i₂tsá₃ 'én₂.

Ia₁ jme₁ma₂ñi₅ bá₄ Jesús lia'₂ con'₂ le₂'uig₅₄ i₂'ein₂ 'éi₂ tsá₃ 'én₂, i₂'ein₂ gué'₂ i₂jáng'₂ cang₂.

⁶⁵ Jaun₂ ca₂juá'₂:

—'Uig₅₄ jaun₂ ma₂në₂juíg₂ jniá₂ 'nia'₂, lia'₂ 'i₁jan₂ tsá₃ lé₂ jiá₃ ja₁con₂ jniá₂ jua'₅₄ tsá₃ o₂jio₃ Ne'₃.

⁶⁶ Ca₂le₃jaun₂, juin₅ dsa₂ i₂jme₁i₂nio₄ quaiain'₅₄ Jesús ca₂i₃uín₂ cau₅, tsá₃ ma₃jme₁i₂nioi₅₄ quaiain'₅₄ 'éi₂.

⁶⁷ Jaun₂ né₃ ca₂ñag₃ Jesús ca₂ñí'₃ chi'₂ dsi₂guia₃-tín₂:

—¿O₃ bá₄ 'niog'₂ 'nia'₂ o₁nog'₁ ján₃?

⁶⁸ La₁ ca₂ñag₃ Si₂mu₅₄ Pe₄:

—Te₁gui'₅₄, ¿ne₄ 'ein₂ lé₂ dsi₁náu₄ jnia'₅₄? Ia₁ 'ne₂ bá₄ 'au'₂ jág₁ a₂le₃chong₂ jnia'₅₄ co₂tan₅₄.⁶⁹ Ma₂ca₂rë₃'éin₂ bá₄ jnia'₅₄, jaun₂ ne₄ jnia'₅₄, 'ne₂ bá₄ líng'₅ I₂jñi₅ quían₅ Diú₄.^d

⁷⁰ Jaun₂ ca₂ñag₃ Jesús:

—¿On₁jua'₅₄ jniá₂ ca₂quiong'₅₄ 'nia'₂ ta₁guia₃-tín'₂? La₁ia₁, jan₂ i₂'en₅₄ jë₄ quían'₂ 'nia'₂ lín₅ i₂'lín'₅₄.

⁷¹ (A₂ca₂juá'₂ Jesús le₂në₅ a₂'iin₂₃ Judas bá₄, ja₁ñi'₅₄ Si₂mu₅₄ Iscariote,^e ia₁ Judas bá₄ i₂jáng'₂ quió'₅, o₁jñia'₅₄ lín₅ jan₂ dsa₂ guia₃-tín₂.)

Tsá₃ 'én₂ rin'₅₄ Jesús jág₁ quió'₅

7¹ Cang₂ jaun₂, ca₂ñi₃ Jesús 'uë₃ Galilea; a₂tsá₃ 'nio₃ dsi₃ñí₃ jë₄ 'uë₃ Judea, ia₁ ja₁jaun₂ jme₁'nio₃ dsa₂ judíos jñag'₃.

² La₁ia₁ jme₁ma₂ja₂quían₃ Jmíg₄ quió'₅ Tsi₁'io₅ Láu₃, jmíg₄ quió'₅ dsa₂ judíos, ³ jaun₂ ca₂juá'₂ rin'₅₄ Jesús:

—Tsá₃ lë₁jan₁ ja₁lá₃; gua₂ jui₅ Judea, ia₁jaun₂ jág₃ dsa₂ i₂quiang'₅₄ léi₄ a₂jmo'₂.⁴ Ia₁ jui₁lia'₂ i₂'nio₃ a₂le₃cui₅ dsa₂ quió'₅, tsá₃ jmo₂₃ jui₁lia'₂ a₂tiin₂₃ jë₄ chi₁'ma₁. Chi₂jua'₂ dsón'₂ jmo'₂ léi₄ le₂në₅, jmo₄ të₃ jág₅ dsa₂ juin₅.

⁵ Ia₁ ca₂lia'₂ jñia'₅₄ rin'₅₄ bá₄ Jesús tsá₃ jme₁'éin₂ le₃quió'₅.

⁶ Jaun₂ né₃, ca₂juá'₂ Jesús ca₂tsí'₃ riin'₅₄:

—Tsá₃ ma₂të₂ bá₄ gué₄ hora quió₃ jniá₂, la₁ia₁ të₂le₃ quían'₂ 'nia'₂, jua'₅₄ 'e₂ gué₃ hora bá₄ dse₃.⁷ Tsá₃ lé₂ le₃jme₃'iog₅₄ dsa₂ mi₂güí₃ jme₃'ñiai₅₄ 'nia'₂; la₁ia₁ 'iog₅₄ bá₄ jniá₂, 'uig₅₄ ia₁ a₂jáng'₅ jniá₂ jág₁ dsau₅ ja₁con₂ 'éi₂, a₂'lig'₅₄ bá₄ a₂jmo₂₃-dsáu₅.⁸ O₂nó'₅ 'nia'₂ guiong'₅₄ jmíg₄; tsá₃ nei₅₄ jniá₂, ia₁ tsá₃ ma₂dsin₃ gué₄ hora quió₃.

⁹ Jme₁ma₂në₂chí'₃ riin'₅₄ le₂në₅, ca₂jñia₃ jë₄ 'uë₃ Galilea.

^d69 A₂lin₅₄ chog₅₄ si₂ juá'₂: “'Ne₂ bá₄ líng'₅ I₂rë₂'ín₁ quían₅ Diú₄; 'ne₂ bá₄ líng'₅ Ja₁ñi'₅₄ Diú₄ jén'₃.”

^e71 A₂lin₅₄ chog₅₄ si₂ juá'₂: “Judas Iscariote, ja₁ñi'₅₄ Si₂mu₅₄.”

Nó₃ Jesús Jmig₄ quió'₅ Tsi'₁io₅ Láu₃

¹⁰ La₁ cang₂ gué₄ jaun₂, jme₁ma₂i₂lén₂ rin'₅₄ Jesús, ján₃ bá₄ ca₂ηó₃ 'éi₂ jmig₄ jaun₂, o₁ηia'₅₄ ca₂ηó₃ tē₃ tsá₃ jme₂li₅₄ jin₄ dsa₂ juin₅. Mei'₂ tsá₃ con'₂ tē₃co'₅₄ bá₄ ηó₃.

¹¹ Jaun₂ lē₃, ca₂i₁nio₁ dsa₂ judíos 'nai'₂ Jesús ja₁nio₅ jmig₄, jaun₂ juá'₂:

—¿A₂já'₄ 'en₅₄ dsa₂ 'éi₂?

¹² Jin₄ dsa₂ guē'₂, juin₅ i₂dsia₅ tē₂'ua₁ jin₄ riin'₅₄ a₂'iin₂₃ 'éi₂. I₂lin₅₄ juá'₂: “Dsa₂ dsen₃ bá₄ 'éi₂”, la₁ i₂sián'₂ guē'₂ juá'₂: “On₃jua'₅₄ dsa₂ dsen₃ 'éi₂, ia₁ jme₂gain₂₃ dsa₂.”

¹³ La₁ia₁ lia'₂ 'i₁jan₂ tsá₃ ca₂dsia₃ lia'₂ rē₂jiá₃ jág₁ a₂'iin₂₃ 'éi₂, ia₁ a₂gain₃ dsa₂ judíos.

¹⁴ Con'₂ tin₃ dso'₅₄ jmig₄ jme₁ma₂tē₂, jaun₂ ca₂'í₃ Jesús i₁dsi₅ guá'₅ templo, jaun₂ ca₂jme₃lióg₃ ca₂jme₃tiin₂₃ dsa₂.

¹⁵ Jaun₂ ca₂i₃gó'₃ dsí₅ dsa₂ judíos jaun₂ ca₂juá'₂:

—¿A₂ lia'₂ ηí₄ lē₃ ma₂tin₂ si₂ i₂nē₅ tē₃ tsá₃ si₂ ca₂'í₂?

¹⁶ Jaun₂ ca₂ηag₃ Jesús:

—Jui₁lia'₂ a₂jme₂tág₂ jniá₂ la₂, on₃jua'₅₄ jág₁ quió₃ 'ηi₃ juá'₅; jág₁ quió'₅ i₂ca₂chei₃ bá₄ la₂. ¹⁷ Chi₂jua'₂ 'ein₂ jan₂ ma₂'ei₅ dsí₅ jmo₃ a₂'ηio₂ dsí₅ Diú₄, le₃ηi₅ bá₄ 'éi₂ 'a₂ lia'₂ lē₅ jág₁ a₂jme₂tág₂ jniá₂, chi₂jua'₂ jág₅ ja₁con₂ Diú₄, o₃ chi₂jua'₂ dsia₂₃ 'a₂ con'₂ ting₂ 'ηi₃. ¹⁸ Jui₁lia'₂ i₂dsia₅ o₄quió'₄ 'ηiog₅, jmo₂₃ le₂jaun₂ ia₁jaun₂ jme₃juag'₂ dsa₂. La₁ jui₁lia'₂ i₂'no'₂ a₂le₃juin'₂ i₂ca₂chei₃, i₂tē₃dsón'₂ bá₄ 'éi₂; 'i₁caun₂ a₂'lig'₅₄ tsá₃ cha₂ ja₁coin₂.

¹⁹ ¿On₁jua'₅₄ Moisés ca₂cuē₃ 'Éi'₃ ca₂cuē₃ 'nia'₂? La₁ia₁, ca₂lia'₂ 'i₁jan'₂ 'nia'₂ tsá₃ jme₂tí'₁ Si₂ 'Éi'₃. ¿'E₂ lē₃ 'niog'₂ 'nia'₂ jnág'₄ jniá₂?

²⁰ Jaun₂ ca₂ηag₃ dsa₂:

—'En₅₄ je₂na'₅₄ tē₂'au'₂; ¿'ein₂ 'nio₃ jñi'₃ 'ne₂?

²¹ Jaun₂ ca₂juá'₂ Jesús:

—Caun₂ léi₄ ca₂jmo₃ jniá₂ jmig₄ sa₅₄, jaun₂ ca₂i₃gó'₃ 'au'₂ 'nia'₂ ca₂le₃jíng'₃. ²² Jaun₂ né₃, ca₂jmo₃ Moisés 'éi'₃ a₂ti₃ dsa₂ ni₁lo₁, (la₁ia₁ on₃jua'₅₄ Moisés i₂ca₂jme₃lióg₃; dsa₂ can'₅₄ bá₄ ca₂jme₃lióg₃ ma₂líg'₂). 'Uig₅₄ jaun₂ ti'₂ 'nia'₂ ni₁lo₄ guein₂, o₁ηia'₅₄ tē₃ lē₅ jmig₄ sa₅₄. ²³ Dse₃ bá₄ jaun₂, chi₂jua'₂ jaun₂ ti'₂ 'nia'₂ ni₁lo₄ guein₂ jmig₄ sa₅₄ ia₁jaun₂ tsá₃ dsó₃ 'uē₃ 'Éi'₃ quió'₅ Moisés, ¿'e₂ lē₃ 'ne'₂ 'nia'₂ quian'₅₄ jniá₂, ia₁ ca₂jme₁'liong₁₂ jan₂ dsa₂ ta₁jain₂, tē₃ jmig₄ sa₅₄? ²⁴ Tsá₃ lē₁caun₂ 'nia'₂ 'í₁ a₂ηia'₅₄ con'₂ jniá₂ le₃co'₅₄. Quion₂ bá₄ 'nia'₂ 'í₁ con'₂ dsi₂ten₅₄.

Dsia₅ Jesús a₂juá'₂ a₂já'₄ já₅

²⁵ Jaun₂ né₃ ca₂jme₃lióg₃ qui₂ca₂ηag₃ i₂lin₅₄ dsa₂ chan₂ Jerusalén qui₂ca₂ηí'₃ riin'₅₄:

—¿On₁jua'₅₄ i₂nē₅ 'na'₂ dsa₂ a₂jñag'₃ i₂nioi₅₄? ²⁶ Ó₃ bá₄ guē'₂ 'ein₅₄ dsia₂₃ lia'₂ rē₂jiá₃ jág₁ jin₄ dsa₂ juin₅, tsá₃ 'ein₂ juá'₂ 'i₁caun₂ quió'₅. ¿O₃ bá₄ dsón'₂ ma₂ca₂rē₃ñi₅ dsi₂tan₅₄, a₂lín₅ dsa₂ nē₅ I₂rē₂'ín₁ quián₅ Diú₄? ²⁷ La₁ ne₄ bá₄ jniog₄ a₂já'₄ já₅ i₂nē₅; a₂dsau₅, jē₁ma₂tē₂ rē₁jiá₃ I₂rē₂'ín₁ quián₅ Diú₄, lia'₂ 'i₁jan₂ tsá₃ le₃ñi₅ a₂já'₄ já₅.

²⁸ Jaun₂ lē₃, tē₁lia'₂ 'en₅₄ Jesús jme₂tiin₂₃ dsa₂ i₁dsi₅ guá'₅ templo, jaun₂ ca₂juá'₂ tiá₂:

—iCuig'₂ bá₄ 'nia'₂ jniá₂, jaun₂ ñi'₅₄ bá₄ 'nia'₂ 'a₂ guē'₂ guio₃ jniá₂! La₁ on₃jua'₅₄ o₄quió₃ 'ñi₃o₃ guio₃; tē₂le₃ o₄quió'₄ i₂ca₂chei₃ i₂tē₃dsón'₂ bá₄ guang₃. I₂'éi₂ guē'₂, tsá₃ cuin'₂ 'nia'₂. ²⁹ La₁ia₁ jniá₂ cuín₅, ia₁ ja₁con₂ 'éi₂ bá₄ guio₃, jaun₂ 'éi₂ bá₄ ca₂chei₃.

³⁰ Jaun₂ nē₃, jme₁'nio₃ dsa₂ jme₁tsáun'₂; la₁ lia'₂ 'i₁jan₂ tsá₃ ca₂téi₂ gu₂, ia₁ tsá₃ jme₁ma₂tē₂ bá₄ gué₄ hora quió'₅.

³¹ La₁ia₁ juin₅ dsa₂ 'éi₂ ca₂rē₃'én₂ jág₁ quió'₅, jaun₂ juá'₂:

—Jē₁ma₂tē₂ rē₁jiá₃ I₂rē₂'ín₁ quián₅ Diú₄, ¿O₃ bá₄ le₃qui'₅₄ jmi₄g₄ jmo₃ léi₄ a₂juē'₂ gué₄ lia'₂ con'₂ gué₄ a₂jmo₅ i₂nē₅?^f

Ca₂chen₃ dsa₂ fariseos chi'₂ 'i'₅₄ quián₅ guá'₅ a₂tsáin'₂ Jesús

³² Ca₂nág₂ bá₄ dsa₂ fariseos jág₁ a₂ca₂juá'₂ dsa₂ a₂'iin₂₃ Jesús; jaun₂ dsa₂ fariseos 'éi₂ quiaín'₅₄ juig₅₄ jme₂dsa₂, ca₂chein₃ chi'₂ 'i'₅₄ quián₅ guá'₅ a₂tsáin'₂ Jesús jaun₂ tē₂. ³³ Jaun₂ nē₃ ca₂juá'₂ Jesús:

—Me'₂ bá₄ jmi₄g₄ 'ú₄ jniá₂ jin'₂ 'nia'₂, jaun₂ gué₄ nég'₄ táng₃ ja₁con₂ i₂ca₂chei₃. ³⁴ 'Nau'₅₄ 'nia'₂ jniá₂ i₁niog'₄, la₁ia₁ tsá₃ dsio₂g'₂ 'nia'₂; ia₁ tsá₃ lé₂ o₁nó'₅ 'nia'₂ ja₁nég'₄.

³⁵ Jaun₂ nē₃, ca₂jme₃lióg₃ dsa₂ judíos qui₂ca₂ñí'₃ riin'₅₄:

—¿A₂já'₄ dsi₂jio₅g₅ dsí₅ i₂nē₅ dsó₃, a₂tsá₃ dsiaín'₂ jniog₄? ¿On₃ bá₄ dsó₃ jin₄ dsa₂ go₄ jniog₄ i₂tián'₅ tsi₁rē₂jan₅₄ jin₄ dsa₂ griegos, ia₁jaun₂ jme₃tiin₂₃ dsa₂ griegos? ³⁶ ¿'E₂ jein₅ jág₁ a₂nē₂juá'₂ nē₅: “'Nau'₅₄ 'nia'₂ jniá₂ i₁niog'₄, la₁ia₁ tsá₃ dsio₂g'₂ 'nia'₂, ia₁ tsá₃ lé₂ o₁nó'₅ 'nia'₂ ja₁nég'₄”?

Jui₁lia'₂ caun₂ jmi₄g₂ cuá₃ jén'₃

³⁷ Jmi₄g₄ juē'₂ dé₄ dsón'₂ jē₁ca₂tó'₂ quió'₅ jmi₄g₄, ca₂nau₂ Jesús, jaun₂ ca₂juá'₂ tiá₂:

—Nē₁jua'₂ 'ein₂ rē₂queín₂ dsí₅, jui₁lia₂ ja₁con₂ jniá₂, jui₁'en'₅₄ jmi₄g₂.

³⁸ Jui₁lia'₂ juá'₂ Si₂, jui₁lia'₂ dsa₂ i₂'én₂ tē₂le₃ quió₃ jniá₂, 'iá₃ tē₂tsí₅ nē₂jag₄ bá₄ jmi₄g₂ cuá₃ a₂jén'₃.^g

³⁹ La₁ a₂juá'₂ le₂nē₅ a₂'iin₂₃ Jme₂dsí₂ Jñi₃o₅ i₂jme₁ma₂'i₄ 'éi'₃ guen₃ dsa₂ i₂'én₂ tē₂le₃ quió'₅; ia₁ tsá₃ jme₁ma₂guan₅ bá₄ gué₄ Jme₂dsí₂, ia₁ tsá₃ gué₄ jme₁ma₂ca₂rē₃juin'₂ Jesús.

^f31 'Nio'₂ ja₁ton₅ Isaías 35:5-6.

^g38 'Nio'₂ ja₁ton₅ Isaías 44:3; 55:1.

Ca₂lë₃ le₁dson'₅₄ dsa₂

- ⁴⁰ I₂lin₅₄ dsa₂ i₂jme₁tion'₅₄ ja₁jaun₂, jme₁ca₂nág₂ a₂juá'₂ Jesús, ca₂juá'₂:
 —Dsón'₂ bá₄ i₂në₅ dsa₂ i₂'é₂ jág₁ quián₅ Diú₄ i₂lé₅ jág₁ jiá₃ 'éi₂.
⁴¹ I₂lin₅₄ guë'₂ juá'₂:
 —I₂rë₂'ín₁ quián₅ Diú₄ bá₄ në₅.
 La₁ia₁ i₂sián'₂ guë'₂ ca₂juá'₂:
 —¿A₂ bá₄ lia'₂ lé₂ le₃chan₂ Galilea I₂rë₂'ín₁ quián₅ Diú₄? ⁴² ¿Tsa₁ juá'₂
 Si₂, tsi₁jon₂ Rag₅₄ David bá₄ tion₅₄ lén₂ I₂rë₂'ín₁ quián₅ Diú₄, jaun₂ jë₄
 juig₂ Belén bá₄ le₃chain₂, juig₂ go₄ David 'ñiog₅?
⁴³ Jaun₂ né₃, le₁dson'₅₄ bá₄ dsa₂ ca₂lë₃ o₄quió'₄ Jesús.
⁴⁴ Jme₁'nio₃ i₂lin₅₄ tsáun'₂, la₁ ca₂lia'₂ 'i₁jan₂ tsá₃ 'ein₂ ca₂téi₂ gu₂.

Tsá₃ 'én₂ dsa₂ can'₅₄ tē₂le₃ quió'₅ Jesús

- ⁴⁵ Jaun₂ ca₂dsi₃len₃ táng₃ chi'₂ 'i'₅₄ quián₅ guá'₅ ja₁jme₁tion'₅₄ juig₅₄
 jme₂dsa₂ quian'₅₄ dsa₂ fariseos, jaun₂ ca₂ñag₃ 'éi₂ ca₂ñí'₃ chi'₂ 'i'₅₄:
 —¿E₂ 'uig₅₄ tsá₃ në₂te'₅₄ 'nia'₂ 'éi₂?
⁴⁶ Jaun₂ ca₂ñag₃ chi'₂ 'i'₅₄:
 —iLia'₂ 'i₁cón'₂ tsá₃ 'ein₂ dsa₂ ma₂juá'₂ jág₁ jui₁lia'₂ juá'₂ dsa₂ 'éi₂!
⁴⁷ Jaun₂ né₃ ca₂juá'₂ dsa₂ fariseos:
 —¿O₃ bá₄ ma₂jme₃gau₅ dsa₂ 'éi₂ quián'₂ 'nia'₂ ján₃? ⁴⁸ 'I₁jan₂ dsa₂
 can'₅₄ juig₅₄ jniog₄, on₃ guë'₂ dsa₂ fariseos, tsá₃ ma₂ca₂rë₃'én₂ le₃quió'₅
 'éi₂, jme₁né₄. ⁴⁹ La₁ dsa₂ lë₁dsa₂ i₂tion'₅₄ në₅, tsá₃ cuí'₅ Si₂ 'Éi'₃.
 Ma₂tioin'₅₄ ne₄ jmi₁uig₅ a₂ma₂rë₂'é₂ ja₁coin₂.^h
⁵⁰ Jin₄ dsa₂ fariseos 'éi₂ jme₁'en₅₄ Nicodemo, i₂jme₁ma₂ñe₄ i₁jiin₅₄
 Jesús le₂jñiá₅.ⁱ 'Éi₂ né₃ ca₂ñag₃:
⁵¹ —Jui₁lia'₂ con'₂ lé₅ juá'₂ Si₂ 'Éi'₃ quián₂, ¿lé₂ le₃qui₁dsi₅ 'éi'₃ ja₁con₂
 jan₂ dsa₂, tē₃ tsá₃ ma₂në₂néi₂ jág₁ quió'₅, a₂juá'₂ 'e₂ a₂ma₂jmo₃?
⁵² Jaun₂ né₃ ca₂ñag₃ riin'₅₄:
 —¿Ján₃ bá₄ lín'₅ 'ne₂ jan₂ dsa₂ i₂chan₂ Galilea? 'Í₂ dse₃ ne₄ Si₂, jaun₂
 jag'₅₄, lia'₂ 'i₁jan₂ dsa₂ i₂'é₂ jág₁ quián₅ Diú₄ tsá₃ já₅ 'uë₃ Galilea.^j
⁵³ Jaun₂ guë'₄ i₃len₃ le₂jan₂ le₂jan₂ dsa₂ ja₁quió'₄.

Jan₂ 'io₅₄ i₂ca₂tán'₂ dso₄

8 ¹ La₁ ca₂ñó₃ bá₄ Jesús jui₅ Má'₂ Olivos. ² Jme₁jñia₃ jaun₂ táng₃,
 ca₂guáin'₃ i₁dsi₅ guá'₅ templo. Ja₁jaun₂ ca₂jme₃quián₃ ca₂le₃jín₃
 dsa₂. Jaun₂ ca₂guá'₂ Jesús, jaun₂ ca₂jme₃lióg₃ jme₂tiin₂₃ dsa₂. ³ Jaun₂ né₃,
 ca₂o₃jñia₃ tē₅juá'₅ quian'₅₄ dsa₂ fairseos ca₂o₃jñiai₃ jan₂ 'io₅₄ i₂ca₂join₃
 jme₁'ein₅₄ quian'₅₄ dsa₂ ñe'₂. Jaun₂ ca₂chei'₃ dsi₂jo₂ jë₄ quió'₅ dsa₂
 i₂tion'₅₄ ja₁jaun₂.

^h49 'Nio'₂ ja₁ton₅ Deuteronomio 27:14-26.

ⁱ50 A₂lin₅₄ chog₅₄ si₂ juá'₂: "i₁jiin₅₄ Jesús a₂'uë₂ jaun₂."

^j52 Ne₄ chog₅₄ si₂ a₂gui'₅₄ guë'₄, tsá₃ le₁ton₅ Juan 7:53-8:11.

- ⁴ Jaun₂ ca₂juá'₂ ca₂tsí'₃ Jesús:
 —Të₅, ca₂jón₂ 'io₅₄ la₂ nió'₅ jág₁ quian'₅₄ dsa₂ ηe'₂ on₃jua'₅₄ dsi₂i₂gu₂.
⁵ Nē₃ nē₃, ne₄ Si₂ 'Éi'₃, juá'₂ Moisés a₂jñí'₄ jnia'₅₄ jan₂ 'io₅₄ le₂la₂,
 a₂qui₁dsiin₅ jnia'₅₄ cang₄. ¿'Ne₂ guë'₂, 'a₂ lia'₂ juá'₂?
⁶ Ca₂juá'₂ dsa₂ le₂nē₅ ia₁ a₂cáin₂ táu₂ Jesús, ia₁jaun₂ cuin₃ jmig₄ bóg'₂
 dso₄. La₁ ca₂guá₂ Jesús i₁sióg'₅ 'uë₃, jaun₂ ca₂jme₃lióg₃ ca₂jmóg'₃ letras
 ne₄ 'uë₃ quian'₅₄ nei'₅₄ chi₁gú₃.
⁷ La₁ caun₂ tioin'₅₄ qui₂ηag₂₃ qui₂ηí'₂ Jesús, jaun₂ ca₂nau₂, ca₂juá'₂
 ca₂tsí'₃ dsa₂:
 —Chi₂jua'₂ 'ein₂ jan₂ 'nia'₂ i₂tsá₃ dso₄ rë₂cán'₄, o₁tiong₅₄ le₂'uig₅₄
 ca₂míg₂ ni₁cang₁ jui₁qui'₅₄ quió'₅ 'io₅₄.
⁸ Jaun₂ ca₂guá₂ táng₃ i₁sióg'₅ 'uë₃, jmóg'₅ letras a₂tsáng₂ 'uë₃.
⁹ La₁ jme₁ca₂nág₂ dsa₂ jág₁ a₂ca₂juá'₂ Jesús,^k jaun₂ ca₂jme₃lióg₃
 qui₂ca₂'uiin₂ bá₄ le₂jain₂ le₂jain₂, jñiá'₅ de'₂ dsa₂ i₂ma₂guen'₂ ca₂'uiin₂ ne₄
 jui₅. Jaun₂ jme₁ma₂ca₂'uiin₂ ca₂le₃jín₃ dsa₂, 'ηiog₅ bá₄ Jesús tē₁tsiin'₅₄
 quiaín'₅₄ 'io₅₄ 'éi₂, i₂chén'₅ dsi₂jo₂ jaun₂.
¹⁰ Jaun₂ nē₃ ca₂nau₂ Jesús,^l jaun₂ ca₂juá'₂ ca₂tsí'₃ 'io₅₄:
 —'Io₅₄, ¿na₅ dsa₂?^m ¿Tsa₁ 'ein₂ nē₂'é₂ uig₅?
¹¹ Jaun₂ ca₂juá'₂ 'io₅₄:
 —Jan₂'ón₄. Lia'₂ 'i₁jan₂ dsa₂, Te₁gui'₅₄.
 Jaun₂ nē₃ ca₂juá'₂ Jesús:
 —On₃ guë'₂ jniá'₂ 'é₄ uig₅ quiáng'₂; guan'₂ nē₃, la₁ tsá₃ ma₃lë₁ 'nau₂
 dso₄.

Lín₅ Jesús si₂ a₂tág₅ quió'₅ dsa₂ mi₂güig₃

- ¹² Ca₂juá'₂ táng₃ Jesús tsí'₅ dsa₂, a₂juá'₂:
 —Jniá'₂ líng₅ si₂ i₂jmo₅ tág₅ jui₅ quió'₅ dsa₂ mi₂güig₃; jui₁lia'₂ i₂'ein₅
 jniá'₂, lia'₂ o₁líg'₂ tsá₃ ma₃ηi₃ jë₄ qui₁né'₃, ton'₂ qui₃'io₃ si₂ a₂jmo₅
 a₂chain₂.
¹³ Jaun₂ nē₃ ca₂juá'₂ dsa₂ fariseos ca₂tsí'₃ Jesús:
 —'Ne₂ jáng'₂ jág₁ dsau₅ tē₂le₃ quián'₂ 'ηiag'₂; 'uig₅₄ jaun₂ tsá₃ quen₅
 jág₁ quiáng'₂ a₂jáng'₂.
¹⁴ Jaun₂ ca₂ηag₃ Jesús ca₂tsí'₃ dsa₂:
 —Jui₁lia'₂ a₂juá'₅ jniá'₂, quen₅ bá₄, o₁jñia'₅₄ 'ηió₃ jniá'₂ jáng'₅ jág₁ dsau₅
 tē₂le₃ quió₃ 'ηió₃. Ia₁ guion₄ bá₄ jniá'₂ a₂já'₄ guio₃, a₂já'₄ nēg'₄ nē₃; la₁ia₁
 'nia'₂ nē₃, tsá₃ ηi'₅₄ 'nia'₂ a₂já'₄ guio₃, on₃ guë'₂ a₂já'₄ nēg'₄.¹⁵ 'Nia'₂ guë'₂
 cáun'₂ 'í₁ lia'₂ con'₂ lë₅ 'éi'₃ quió'₅ dsa₂ mi₂güig₃. Jniá'₂ nē₃ tsá₃ 'í₁ cáun₅
 jniá'₂ jua'₅₄ a₂qui₂dsí'₂ 'éi'₃ ja₁con₂ 'i₁jan₂.¹⁶ La₁ia₁ chi₂jua'₂ cáun₅ jniá'₂

^k9 A₂lin₅₄ chog₅₄ si₂ juá'₂ ján₃: “ca₂jéin'₃ o₂guí'₃ ia₁ rë₂cáin'₄ dso₄ guioin₅₄.”

^l10 A₂lin₅₄ chog₅₄ si₂ juá'₂ ján₃: “ia₁ tsá₃ ca₂jág₃ jua'₅₄ tión₂ guë'₄ i₂sián'₂, jñia'₅₄ lia'₂ 'io₅₄
 'éi₂.”

^m10 A₂lin₅₄ chog₅₄ si₂ juá'₂ ján₃: “i₂'nag₅ quiáng'₂.”

'í₁, dse₃ dsi₂ten₅₄ bá₄ 'éi'₃ a₂qui₂dsí₂ jniá₂, ia₁ on₃jua'₅₄ jniá₂ 'ñi₃ cáun₅ 'í₁; qui₂dsí₂ jniá₂ 'éi'₃ co₂lě₅ quiang'₅₄ i₂ca₂chei₃ bá₄.¹⁷ Ján₃ bá₄ ca₂tě₂ ne₄ Si₂ 'Éi'₃ quián'₂ 'nia'₂, rě₂ton₅ juá'₂, nē₁jua'₂ on₃ dsa₂ lě₂ i₂jáng'₅ jág₁ dsau₅, a₂quen₅ bá₄ jág₁ quió'₅.¹⁸ Jniá₂ líng₅ i₂jáng'₅ jág₁ dsau₅ tē₂le₃ quió₃ 'ñi₃; Ne'₃ jniá₂ i₂ca₂chei₃ guē'₂, lín₅ táng₃ jan₂ i₂jáng'₅ jág₁ dsau₅.

¹⁹ Jaun₂ nē₃ ca₂ṇag₃ dsa₂ fariseos ca₂ṇí'₃ Jesús:

—¿Na₅ ṇéi'₅ 'ne₂?

Jaun₂ ca₂ṇag₃ Jesús:

—Tsá₃ cuig'₂ 'nia'₂ jniá₂, on₃ guē'₂ Ne'₃ jniá₂ cuin'₂ 'nia'₂; jua'₅₄ mei'₂ guē'₃ cuig'₂ 'nia'₂ jniá₂, ján₃ bá₄ jme₁le₃cuin'₂ 'nia'₂ Ne'₃.

²⁰ Ca₂juá'₂ Jesús le₂nē₅ tē₁lia'₂ jme₁'ein₅₄ jme₂tiin₂₃ dsa₂ i₁dsi₅ guá'₅ templo, cau₅ ja₁jme₁tióng₂ tsi₁gu₅ quió'₅ cu₄ guá'₅. La₁ia₁, lia'₂ 'i₁jan₂ tsá₃ 'ein₂ ca₂ṇau'₃, ia₁ tsá₃ jme₁ma₂tē₂ bá₄ guē'₄ hora quió'₅.

“Jui₁lia'₂ ja₁né'₄ jniá₂, tsá₃ lē₂ o₁nó'₅ 'nia'₂”

²¹ Con'₂ siá'₂ táng₃ ca₂juá'₂ Jesús ca₂tsí'₃ dsa₂:

—Né'₄ jniá₂; jaun₂ 'nia'₂ guē'₂, 'náu'₂ jniá₂ i₁niog'₄, la₁ia₁ dsián'₃ 'nia'₂ tē₃ rě₂cán'₄ 'nia'₂ dsáu'₂; ja₁né'₄ jniá₂, tsá₃ lē₂ o₁nó'₅ 'nia'₂.

²² Jaun₂ nē₃ ca₂juá'₂ dsa₂ judíos:

—¿O₃ bá₄ a₂ṇíi'₃ 'e₂ 'ṇiog₅, jaun₂ guē'₂ juá'₂ tsá₃ lē₂ dsi₁náu₄ jniog₄ ja₁dsáin'₃?

²³ Jaun₂ ca₂juá'₂ Jesús:

—Dsa₂ chan₂ gua'₅₄ 'uē₃ la₂ bá₄ lín'₅ 'nia'₂; jniá₂ nē₃, líng₅ i₂chan₂ guei'₅₄. Dsa₂ i₂tén₅ mi₂güí'₃ la₂ bá₄ lín'₅ 'nia'₂; jniá₂ nē₃ tsá₃ téng₅ mi₂güí'₃ la₂.²⁴ 'Uig₅₄ jaun₂ bá₄ nē₂juí'₂ jniá₂ 'nia'₂ a₂dsiáng'₃ tē₃ rě₂cáng'₄ jaun₂ dsáu'₂. Ia₁ chi₂jua'₂ tsá₃ 'én'₂ 'nia'₂, jniá₂ bá₄ líng₅ 'éi'₂,ⁿ dsiáng'₃ 'nia'₂ qui₂rě₂cáng'₄ dsáu'₂.

²⁵ Jaun₂ nē₃ ca₂ṇag₃ dsa₂ judíos ca₂ṇíi'₃ Jesús:

—¿Ein₂ bá₄ lín'₅ 'ne₂?

Jaun₂ ca₂ṇag₃ Jesús:

—Le₂jaun₂ jui₁lia'₂ ma₂qui₂ma₂juí'₂ jniá₂ 'nia'₂ ca₃le₂'uig₅₄.^o ²⁶ 'Lióng₂ bá₄ 'uig₅₄ cha₂ a₂le₃juá'₄ jniá₂ a₂qui₂dsi₅ jniá₂ 'éi'₃ ja₁con'₂ 'nia'₂. La₁ tí₅ bá₄ jág₁ quió'₅ i₂ca₂chei₃. Jaun₂ jniá₂ nē₃, jág₁ a₂ma₂nag₃ ja₁coin₂, a₂jaun₂ bá₄ juí'₂ jniá₂ dsa₂ mi₂güí'₃.

²⁷ La₁ tsá₃ ca₂rě₃ṇí'₂ dsa₂, a₂jme₁juá'₂ Jesús tsí'₅ dsa₂ 'éi'₂, a₂'iin₂₃ Jmei₂.

²⁸ 'Uig₅₄ jaun₂ ca₂juá'₂ Jesús:

—Jē₁ma₂tē₂ rē₁chóng'₄ 'nia'₂ Jaun₅ dsa₂ mi₂güí'₃, jaun₂ guē'₄ le₃ṇi'₅₄ 'nia'₂ a₂lín₅ jniá₂ 'éi'₂,^p le₃ṇi'₅₄ 'nia'₂, a₂tsá₃ jmo₅ jniá₂ 'i₁caun₂ tē₂le₃

ⁿ24 o₃, “jniá₂ bá₄ líng₅.”

^o25 o₃, “¿Ein₂ jaun₂ ma₂qui₂ma₂juí'₂ jniá₂ 'nia'₂ ca₃le₂'uig₅₄?”

^p28 o₃, “le₃ṇi'₅₄ 'nia'₂, jniá₂ líng₅.”

o₄quió₃ 'ñio₃, jñia'₅₄ lia'₂ a₂jaun₂ bá₄ juá'₅ jniá'₂ jui₁lia'₂ a₂ma₂ca₂jme₃tag₅ Ñe'₃.²⁹ Ia₁ i₂ca₂chei₃ 'ein₅₄ quian'₅₄ jniá'₂, tsá₃ jua'₅₄ ma₂téin₂ jniá'₂ 'ñio₃, ia₁ lia'₂ co₂tan₅₄ bá₄ jmo₅ jniá'₂ a₂'ñio₂ dsí₅ 'éi₂.

³⁰ Lia'₂ jme₁juá'₂ Jesús jág₁ në₅, juin₅ lín₃ dsa₂ ca₂rë₃'én₂ le₃quió'₅.

Chi'₂-guein₂ quián₅ Diú₄, quian'₅₄ dsa₂ i₂qui₂le'_{ñe'}₅₄ 'uig₅₄ dsáu₁

³¹ Jaun₂ në₃ ca₂juá'₂ Jesús ca₂tsí'₃ dsa₂ judíos i₂ca₂rë₃'én₂ le₃quió'₅:

—Në₁jua'₂ të₁'ñiá'₄ 'nia'₂ le₃quió'₅ jág₁ quió₃, dsón'₂ bá₄ lín'₅ 'nia'₂ dsa₂ i₂quian'₅₄ jniá'₂; ³² jaun₂ le₃cuin'₂ 'nia'₂ jág₁ dsau₅, jaun₂ jág₁ dsau₅ në₃, jmo₃ qui₃chen'₂ 'nia'₂.

³³ Jaun₂ ca₂ñag₃ dsa₂ 'éi₂ ca₂tsí'₃ Jesús:

—Lág₅ jnia'₅₄ dsa₂ tsi₁jon₂ Abraham, jaun₂ lia'₂ 'i₁cón'₂ tsá₃ ma₂lag₃ jnia'₅₄ dsa₂ i₂le₁'ñe'₅₄ ne₄ 'i₁jan₂. ¿'A₂ guë'₂ lia'₂ juá'₂ 'ne₂ jaun₂ a₂qui₃chei'₂ jnia'₅₄?

³⁴ Jaun₂ ca₂juá'₂ Jesús:

—A₂dsi₂jó'₃ juí₂g₂ jniá'₂ 'nia'₂, jui₁lia'₂ ca₂le₃jín₃ dsa₂ i₂'no₅ dso₄, qui₂le₁'ñe'₅₄ ne₄ dsáu₁. ³⁵ Jui₁lia'₂ jan₂ dsa₂ i₂chi₁'ñe'₅₄ në₃, tsá₃ jua'₅₄ të₃'ñiái₄ co₂tan₅₄ dsi₂néi₂ quió'₅ juig₅₄; la₁ia₁ chi'₂ ja₁ñi'₅₄ në₃, co₂tan₅₄ bá₄ téin₅ dsi₂néi₂ jaun₂. ³⁶ Jaun₂ në₃, chi₂jua'₂ ca₂chéi'₂ Ja₁ñi'₅₄ ca₂chéin'₂ 'nia'₂, jaun₂ bá₄ lén'₂ 'nia'₂ dsa₂ i₂le₁tsin'₁ të₃dsón'₂.

³⁷ Ma₂guion₄ bá₄ jniá'₂ jaun₂ a₂lín'₅ 'nia'₂ tsi₁jon₂ Abraham; la₁ia₁ 'niog'₂ 'nia'₂ jnág'₄ jniá'₂, ia₁ a₂tsá₃ guei'₂ 'nia'₂ 'e₂ a₂juá'₅ jniá'₂. ³⁸ Jniá'₂ në₃ juá'₅ juí₂g₂ 'nia'₂ jui₁lia'₂ 'e₂ a₂ma₂jág₃ ja₁con₂ Ñe'₃; 'nia'₂ në₃, jmo'₂ 'e₂ a₂ma₂nei'₂ 'nia'₂ ja₁con₂ ñéi'₅.

³⁹ Jaun₂ ca₂ñag₃ dsa₂ 'éi₂ ca₂tsí'₃ Jesús:

—Abraham bá₄ jme₁lín₄ jmei₂ jnia'₅₄ ma₂líg'₂.

La₁ ca₂juá'₂ Jesús ca₂tsí'₃ dsa₂ 'éi₂:

—Jua'₅₄ mei'₂ gué₃ lín'₅ 'nia'₂ chi'₂-guein₂ quián₅ Abraham, jaun₂ jme₁jmó'₂ 'nia'₂ jui₁lia'₂ a₂ca₂jmo₃ 'éi₂. ⁴⁰ La₁ia₁ 'nia'₂ në₃ 'niog'₂ jnág'₄ jniá'₂, o₁jñia'₅₄ ma₂në₂juí₂g₂ jniá'₂ 'nia'₂ jág₁ tí₅ të₃dsón'₂ a₂ma₂ca₂jme₃tag₅ Diú₄ jniá'₂. Tsá₃ le₂në₅ ca₂jmo₃ Abraham. ⁴¹ 'Nia'₂ në₃, le₂jaun₂ bá₄ jmo'₂ jui₁lia'₂ jmo₅ ñéi'₅.

Jaun₂ në₃ ca₂juá'₂ dsa₂ 'éi₂:

—La₁ on₃jua'₅₄ jnia'₅₄ lág₅ guein₂ i₂lë₁chan₂; jan₂ bá₄ jmei₂ jnia'₅₄ chan₂: i₂'éi₂ lín₅ Diú₄.

⁴² Jaun₂ në₃ ca₂juá'₂ Jesús:

—Jua'₅₄ mei'₂ gué₃ të₃dsón'₂ Diú₄ lín₅ ñéi'₅ 'nia'₂, jme₁jme₁'nió'₄ bá₄ 'nia'₂ jniá'₂, ia₁ ja₁con₂ Diú₄ bá₄ 'uín₂ jniá'₂; jaun₂ la₂ ma₂guio₃. On₃jua'₅₄ o₄quió₃ 'ñio₃ guio₃; o₄quió'₄ i₂ca₂chei₃ bá₄ jniá'₂ guio₃. ⁴³ ¿'E₂ lë₃ tsá₃ lé₂ le₃ñí'₂ 'nia'₂ jág₁ a₂juá'₅ jniá'₂? 'Uig₅₄ ia₁ a₂tsá₃ tian'₃ 'nia'₂ nág'₁ jág₁ a₂'ë₅ jniá'₂. ⁴⁴ 'Nia'₂ bá₄ rë'₂ téng'₅ le₃quió'₅ i₂së₃dsen₃ ñéi'₅ 'nia'₂. Jaun₂ 'ín₅ 'au'₂ jmó'₂ 'e₂ a₂'ñio₂ dsí₅ 'éi₂. Lia'₂ con'₂ le₂'uig₅₄ bá₄ jaun₂ lín₅ jan₂ i₂jme₂dsian₅ dsa₂. Tsá₃ le₃quió'₅ jág₁ dsau₅ chéin'₅, ia₁ 'i₁ca₂míg₂ jág₁

dsau₅ tsá₃ cha₂ ja₁ coin₂. Jë₁ ma₂ ca₂ juá'₂ jág₁ të₂ jág₁, juá'₂ bá₄ jui₁ lia'₂ tiin₂ 'ñiog₅, ia₁ i₂ të₂ jín₁ bá₄ 'éi₂, jaun₂ lín₅ jmei₂ dsa₂ të₂ jín₁.⁴⁵ La₁ ia₁, 'uig₅₄ ia₁ a₂ juá'₅ jniá₂ jág₁ dsau₅ né₃, tsá₃ 'éng'₂ jág₁ quió₃.⁴⁶ ¿I₂ 'ein₂ 'nia'₂ qui'₅₄ jmig₄ cáun₂ 'í₁ a₂ rin₂ jniá₂ dso₄? Chi₂ jua'₂ juá'₅ jniá₂ jág₁ dsau₅, ¿E₂ lë₃ tsá₃ 'én'₂ 'nia'₂ jág₁ quió₃?⁴⁷ Jui₁ lia'₂ i₂ tén₅ le₃ quió'₅ Diú₄, nag₂₃ jág₁ quió'₅ Diú₄. 'Uig₅₄ jaun₂ bá₄ tsá₃ nag'₂ 'nia'₂ jág₁: ia₁ tsá₃ tén'₅ 'nia'₂ le₃ quió'₅ Diú₄.

Né'₃ gué'₄ a₂ le₃ chan₂ Abraham, jme₁ ma₂ chan₂ bá₄ Te₁ gui'₅₄

⁴⁸ Jaun₂ né₃ ca₂ ñag₃ dsa₂ judíos ca₂ ñí'₃ Jesús:

—¿Tsa₁ dsau₅ jág₁ a₂ jua'₂ jnia'₅₄, dsa₂ chan₂ Samaria bá₄ lín'₅ 'ne₂; a₂ 'en₅₄ jan₂ je₂ na'₅₄ të₂ 'au'₂ né₃?

⁴⁹ Jaun₂ ca₂ ñag₃ Jesús:

—Lia'₂ 'i₁ jan₂ je₂ na'₅₄ tsá₃ 'en₅₄ të₂ dsi₃. A₂ jaun₂ bá₄ jmo₅ jniá₂ a₂ jme₂ juín'₁ jniá₂ Ne'₃; 'nia'₂ gué'₂, tsá₃ jme₂ go'₃ jniá₂.⁵⁰ Tsá₃ a₂ jaun₂ 'náu'₅ jniá₂ a₂ jme₃ juag'₂ dsa₂, la₁ chan₂ jan₂ i₂ 'no'₂ a₂ jme₃ juag'₂ dsa₂ jniá₂, ton'₂ 'éi₂ bá₄ con₂ jág₁ dsau₅.⁵¹ A₂ dsi₂ jó'₃ juíg₂ jniá₂ 'nia'₂, chi₂ jua'₂ 'ein₂ dsa₂ i₂ tón'₂ jui₅ jág₁ quió₃, lia'₂ o₁ líg'₂ jmig₄ tsá₃ dsi₃ ñí'₅₄ 'mú₃.

⁵² Jaun₂ né₃ ca₂ ñag₃ dsa₂ judíos:

—Né₃ gué'₄ dsón'₂ jag₂ jnia'₅₄ a₂ 'en₅₄ jan₂ je₂ na'₅₄ të₂ 'au'₂. Ia₁ ma₂ ca₂ jon₃ Abraham lia'₂ jma₃ quian'₅₄ dsa₂ i₂ qui₂ ca₂ 'é₂ jág₁ quián₅ Diú₄; 'ne₂ gué'₂ juá'₂: “Jui₁ lia'₂ i₂ tón'₂ jui₅ jág₁ quió₃, tsá₃ líg'₂ dsi₃ ñí'₅₄ 'mú₃.”⁵³ ¿O₃ bá₄ 'ñio₅ lín₃ gué'₄ juín'₂ 'ne₂ lia'₂ con'₂ gué'₄ Abraham 'lag₄ jmei₂ jnia'₅₄? Ca₂ jon₃ bá₄ 'éi₂, ján₃ bá₄ le₂ jaun₂ qui₂ ca₂ dsan₃ dsa₂ i₂ jme₁ 'é₂ jág₁ quián₅ Diú₄. ¿'Ein₂ lín'₂ 'ne₂ líng'₅?

⁵⁴ Jaun₂ ca₂ ñag₃ Jesús:

—Chi₂ jua'₂ 'ñio₃ jniá₂ jme₂ juíng'₂, tsá₃ 'e₂ quen₅ a₂ jaun₂. La₁ ia₁ jui₁ lia'₂ i₂ jme₂ juag'₂ jniá₂, Ne'₃ bá₄ jniá₂ 'éi₂, i₂ lín'₅ 'nia'₂ lín₅ Diú₄ quiáng'₂.⁵⁵ O₁ jnia'₅₄ tsá₃ cuín'₂ 'nia'₂ 'éi₂, la₁ cuín₅ bá₄ jniá₂ 'éi₂. Jua'₅₄ mei'₂ gué'₃ juá'₅ jniá₂ a₂ tsá₃ cuín₅, jme₁ lén₂ jniá₂ jan₂ i₂ të₂ jín₁ jui₁ lia'₂ lín₅ 'nia'₂. La₁ ia₁ dsón'₂ bá₄ cuín₅ jniá₂ 'éi₂, jaun₂ tón'₅ bá₄ jniá₂ jui₅ jág₁ quió'₅.⁵⁶ Ca₂ jmo₃ 'io'₂ Abraham, 'lag₄ ñéi'₅ 'nia'₂, ia₁ jme₁ 'ín₂ dsí₅ jág₃ jmig₄ i₁ guan₃ jniá₂; jaun₂ ca₂ jág₃, jaun₂ 'ñio₅ lín₃ 'io'₂ ca₂ jén'₃.

⁵⁷ Jaun₂ né₃ ca₂ juá'₂ dsa₂ judíos ca₂ tsí'₃ Jesús:

—Tsá₃ ma₂ 'eng'₅₄ bá₄ gué'₄ të₂ láu₃-guiá'₂ ñi₂. ¿'A₂ gué'₂ lia'₂ juá'₂ 'ne₂ a₂ ma₂ jing'₅₄ 'lag₄ Abraham?

⁵⁸ Jaun₂ ca₂ ñag₃ Jesús:

—A₂ dsi₂ jó'₃ jui₂ g₂ jniá₂ 'nia'₂, né'₃ gué'₄ a₂ le₃ chan₂ Abraham, jniá₂ líng₅.^q

⁵⁹ Jaun₂ né₃ qui₂ ca₂ ña'₃ cang₄ a₂ jme₁ qui'₃ quió'₅. La₁ ca₂ 'ma₃ bá₄ Jesús, jaun₂ o₂ 'ín₃ i₁ dsi₅ guá'₅ templo.”

^q58 Jág₁ “jniá₂ líng₅” co₂ 'nió'₄ jein₅ jág₁ lia'₂ chen₂ Jehová. 'Nio'₂ ja₁ ton₅ Éxodo 3:14.

Ca₂jme₃'lión₂ Jesús jan₂ dsa₂ i₂ten₄ ca₂rë₃chán₃

9¹ Jme₁ca₂ηii₅ jaun₂, ca₂jín₂ jan₂ dsa₂ i₂ten₄ ca₂rë₃chán₃.² Jaun₂ ca₂ηag₃ chi'₂ dsi₂guia₃-tín₂ quiáin₅:

—Të₅, ¿'ein₂ bá₄ ca₂'náu₂ dso₄? ¿Dsa₂ la₂, o₃ chog₅₄-jmei₂ 'e₂, a₂ca₂rë₃chán₃ tein₅₄?

³ Jaun₂ ca₂juá'₂ Jesús:

—On₃jua'₅₄ 'uig₅₄ dsáu₂ 'ηiog₅, on₃ guë'₂ 'uig₅₄ dsáu₁ chog₅₄-jmei₂; a₂jaun₂ bá₄ ca₂lë₃ ia₁jaun₂ le₃jniá₂ jui₅bí₂ quió'₅ Diú₄ ja₁coin₂.⁴ Ca₂tág₂ jniog₄ jmó₁ ta₁⁵ quió'₅ i₂ca₂chei₃ jniá₂ të₁lia'₂ jniá₂ guë'₄; ia₁ ma₂ja₂quián₃ néi₃, jë₁tsá₃ ma₃'ein₂ lé₂ le₃jmo₃ ta₁.⁵ Të₁lia'₂ 'en₅₄ jniá₂ mi₂güí₃ la₂, líng₅ si₂ a₂tág₅ ja₁con₂ dsa₂ mi₂güí₃.

⁶ Jme₁ca₂dsan₃ juá'₂ le₂në₅, jaun₂ ca₂'ηéi₃ 'uë₃, ca₂jmo₃ ca₂juig₄ jein₂ quian'₅₄ jmi₁'éi₅ quió'₅, jaun₂ ca₂tsáng₂ jme₁ne₁ dsa₂ ten₄.⁷ Jaun₂ ca₂juá'₂ ca₂tsí'₃ dsa₂ 'éi₂:

—Gua₂ o₂rang₂ quiáng'₂ Dsiog₅ Siloé —co₂'nió'₄ le₃jua'₅₄ jág₁, I₂chen₄, a₂chei₂ dsilog₅ jaun₂.

Jaun₂ ca₂ηó₃ i₁rang₂ quió'₅, jaun₂ jme₁guáin'₃ táng₃ jaun₂, ma₂jág₅ bá₄.

⁸ Jaun₂ qui₂ca₂ηag₃ dsa₂ i₂tián'₅ cau₅ quió'₅, quian'₅₄ dsa₂ i₂jme₁ma₂ca₂jág₂ mi₅ 'éi₂ cu₄ le₂jniá₅, ca₂juá'₂:

—¿On₁jua'₅₄ dsa₂ në₅ 'éi₂ i₂jme₁gua₂ mi₅ a₂jme₃'o₅₄ dsa₂ cu₄?

⁹ I₂lin₅₄ juá'₂:

—'Éi₂ bá₄ në₅.

I₂sián'₂ guë'₂ juá'₂:

—On₃jua'₅₄ 'éi₂ në₅, la₁ia₁ mei'₂ tsá₃ le₂jaun₂ jniái₂.

La₁ ca₂juá'₂ dsa₂ 'éi₂ 'ηiog₅:

—Jniá₂ bá₄ 'éi₂.

¹⁰ Jaun₂ në₃ ca₂ηag₃ dsa₂ ca₂ηí'₃ 'éi₂:

—¿'A₂ guë'₂ lia'₂ lë₃ ca₂jnióg₃ jme₁ne'₄ 'ne₂?

¹¹ Jaun₂ ca₂ηag₃ dsa₂ 'éi₂:

—Dsa₂ i₂të'₂ dsa₂ Jesús në₂jmo₃ ti₁jéin₃, jaun₂ në₂tsáng₂ jme₁ne₃ jniá₂, jaun₂ në₂juá'₂ tság₅ jniá₂: “Gua₂ Dsiog₅ Siloé, o₂rang₂ quiáng'₂.” Jaun₂ ηe₄ jniá₂, jaun₂ jme₁ca₂lë₃ rang₂₃ quió₃, co₂tan₅₄ lia'₂ në₂jág₃.

¹² Jaun₂ ca₂ηag₃ dsa₂ ca₂ηí'₃ dsa₂ i₂jme₁ten₄ 'éi₂:

—¿Na₅ dsa₂ 'éi₂?

Jaun₂ ca₂juá'₂:

—Tsá₃ guion₄ jniái₂.

¹59 A₂lin₅₄ chog₅₄ si₂ juá'₂ ján₃: “jaun₂ ca₂ηí'₃ jin₄ dsa₂ 'éi₂, ca₂ηái'₃.”

⁴4 A₂lin₅₄ chog₅₄ si₂: Ca₂tín₂ jniá₂ jmo₅₄ ta₁.

Ca₂ŋag₃ dsa₂ fariseos jág₁ dsau₅ ne₄ dsa₂ i₂jme₁ten₄ i₂ca₂jme₃'lió₂ Jesús

¹³ Jaun₂ ně₃ ca₂i₁ŋia₃ dsa₂ ne₄ dsa₂ fariseos dsa₂ i₂jme₁ten₄ 'éi₂.

¹⁴ La₁ jmi₄ lia₂' con₁' jme₁ca₂jmo₃ Jesús ti₁jéin₃ a₂ca₂tsáng₂ mi₂ne₄ dsa₂ i₂jme₁ten₄ 'éi₂, jaun₂ dé₄ jmi₄ sa₅₄ bá₄ jaun₂. ¹⁵ Jaun₂ ca₂ŋag₃ táng₃ dsa₂ fariseos ca₂ŋí₃' dsa₂ 'éi₂, 'a₂ bá₄ lia₂' jaun₂ ma₂lé₂ jág₃. Jaun₂ ca₂juá₂' dsa₂ i₂jme₁ten₄ 'éi₂:

—Ně₂tsáng₂ ti₁jéin₃ jme₁ne₃ jniá₂, jaun₂ ně₂rang₃ jniá₂ quió₃, jaun₂ lě₃ ma₂jág₅ jniá₂.

¹⁶ Jaun₂ ně₃ ca₂juá₂' i₂lin₅₄ dsa₂ fariseos:

—Dsa₂ i₂ně₂jmo₃ a₂ně₅, on₃jua₁'₅₄ dsa₂ quián₅ Diú₄ 'éi₂, ia₁ tsá₃ jme₂gó₃' jmi₄ sa₅₄.

La₁ i₂lin₅₄ guě₂' juá₂':

—č'A₂ lia₂' lé₂ le₃jmo₃ jan₂ dsa₂ i₂cha₂ dsáu₁ léi₄ juě₂' le₂ně₅?

Jaun₂ lě₃ ca₂lě₃ le₁dson₁'₅₄ dsa₂.

¹⁷ Jaun₂ ca₂ŋag₃ táng₃ dsa₂ ca₂ŋí₃' dsa₂ i₂jme₁ten₄ 'éi₂:

—č'E₂ guě₂' juá₂' 'ne₂ lín₅, ia₁ jme₁ne₄' 'ne₂ bá₄ ně₂niá₃?

Jaun₂ ca₂ŋag₃ dsa₂ 'éi₂:

—A₂lín₅ jan₂ dsa₂ i₂'ě₂ jág₁ quián₅ Diú₄ bá₄.

¹⁸ La₁ dsa₂ judíos ně₃, tsá₃ jme₁'éin₂ bá₄ guě₄ a₂dsón₂' jme₁ten₄ dsa₂ 'éi₂, ton₂' ca₂tín₃' jme₁ne₁₂, ca₂lia₂' ca₂tě₃ chog₅₄-jmei₂ dsa₂ 'éi₂.

¹⁹ Jaun₂ ca₂ŋag₃ dsa₂ fariseos ca₂ŋí₃' chog₅₄-jmei₂ 'éi₂:

—č'Chi₂' ja₂ŋí₂' 'nia₂' la₂, i₂juá₂' 'nia₂' i₂ten₄ ca₂rě₃chán₃? č'A₂ guě₂' lia₂' ma₂jág₅ ně₃?

²⁰ Jaun₂ ca₂ŋag₃ chog₅₄-jmei₂:

—Ne₄ bá₄ jnia₁'₅₄, chi₂' quián₂ bá₄ jnia₁'₅₄ ně₅, i₂ca₂rě₃chán₃ ten₄; ²¹ la₁ tsá₃ ne₄ jnia₁'₅₄ 'a₂ guě₂' lia₂' ně₃ ma₂lé₂ jág₃, on₃ guě₂' ne₄ jnia₁'₅₄ 'ein₂ ca₂jmo₃ ca₂ŋia₃ mi₂ne₅₄. Ŋag₄ caun₂ 'nia₂' guiong₁'₅₄; i₂ma₂juin₂' bá₄ ně₅, jaun₂ lé₂ bá₄ juá₂' 'ŋiog₅ 'a₂ lia₂' ca₂lě₃.

²² Ca₂juá₂' chog₅₄-jmei₂ le₂ně₅ 'uig₅₄ ia₁ a₂gó₅ gain₃ dsa₂ judíos, ia₁ jme₁ma₂ca₂jmo₃ 'éi₂ caun₂ jág₁ a₂'uág₂' 'uín₂' dsa₂ ja₁le₁toin₂₃ ne₄ si₂ guá₅ sinagoga jui₁'ein₂ guě₃ i₂juá₂', Jesús bá₄ lín₅ I₂rě₂'ín₁ quián₅ Diú₄.

²³ 'Uig₅₄ jaun₂ bá₄ ca₂juá₂' chog₅₄-jmei₂: “Ŋag₄ caun₂ 'nia₂' guiong₁'₅₄, i₂ma₂juin₂' bá₄ ně₅.”

²⁴ Jaun₂ bá₄ ca₂tě₃ táng₃ dsa₂ judíos ca₂tě₃' dsa₂ i₂jme₁ten₄ 'éi₂, jě₁ca₂tě₂ táng₃ ráun₂, jaun₂ ca₂juá₂':

—Jua₁'₅₄ jág₁ dsau₅ tě₃dsón₂' ne₄ Diú₄;^t ne₄ bá₄ jnia₁'₅₄ jan₂ dsa₂ i₂cha₂ dsáu₁ bá₄ 'éi₂.

²⁵ Jaun₂ ně₃ ca₂ŋag₃ dsa₂ 'éi₂:

^t24 lit. “jme₁juin₂' Diú₄”, co₂'nió₄ quian₁'₅₄ jág₁ ně₅ jme₁jmo₅ dsi₂tan₅₄ 'éi₃ ja₁con₂ dsa₂, a₂juá₂' tion₅₄ jág₁ tí₅ dsón₂'. 'Nio₂' ja₁ton₅ Josué 7:19, Mateo 26:63.

—Tsá₃ a₂jaun₂ guion₄ jniá₂ jua'₅₄ jan₂ dsa₂ cha₂ dsáu₁ 'éi₂, o₃ tsá₃ dsáu₁ cha₂ 'e₂. Jñia'₅₄ lia'₂ a₂jaun₂ bá₄ guion₅₄, a₂jme₁ten₄ bá₄ jniá₂, la₁ nē₃ ma₂lé₂ bá₄ jág₄.

²⁶ Jaun₂ ca₂ṇag₃ táng₃ dsa₂ fariseos:

—¿'E₂ ca₂jmo₃ quiáng'₂? ¿'A₂ lia'₂ ca₂jmo₃ dsa₂ 'éi₂ a₂ca₂jnia₃ mi₂ne'₅₄?

²⁷ Jaun₂ ca₂ṇag₃ dsa₂ 'éi₂:

—Ma₂nē₂juá'₃ guē'₂ jniá₂. Tsá₃ tón'₂ guē'₂ 'nia'₂ jui₅ 'e₂ juá'₅ jniá₂. ¿'E₂ lē₃ 'niog'₂ 'nia'₂ nág'₂ táng₃? ¿O₃ bá₄ ján₃ guē'₂ 'niog'₂ 'nia'₂ le₃'éng'₂ le₃quió'₅ 'éi₂?

²⁸ Jaun₂ qui₂ca₂jnaú'₂ dsa₂ jág₁ uig₅, jaun₂ ca₂juá'₂:

—'Ne₂ 'éng'₂ le₃quió'₅ dsa₂ 'éi₂, la₁ia₁ jnia'₅₄ guē'₂ 'éin₂ le₃quió'₅ Moisés. ²⁹ Ne₄ jnia'₅₄, a₂ca₂dsia₃ Diú₄ jág₁ quian'₅₄ Moisés, la₁ dsa₂ 'éi₂ guē'₂ nē₃, tsá₃ ne₄ a₂já'₄ jág₅.

³⁰ Jaun₂ ca₂ṇag₃ dsa₂ 'éi₂ nē₃ ca₂juá'₂:

—iDón'₂ bá₄ jaun₂ dsi₂gó'₃ dsi₅ a₂jaun₂: a₂tsá₃ ṇi'₅₄ 'nia'₂ a₂já'₄ jág₅, ton'₂ ca₂jme₃jnio₅₄ jme₁ne₃! ³¹ Ma₂ne₄ rē₂ bá₄ jniog₄ jaun₂, a₂tsá₃ nag₅ Diú₄ jág₁ quió'₅ dsa₂ i₂cha₂ dsáu₁; jmá'₃ lia'₂ jág₁ quió'₅ dsa₂ i₂jme₂gan₃ Diú₄, i₂qui₂jmo₅ a₂'ṇio₂ dsí₅ 'éi₂: quió'₅ 'éi₂ bá₄ nag₂₃. ³² Lia'₂ 'i₁cón'₂ tsá₃ 'ein₂ ma₂nág₂ ca₂le₂jñiá₅ jua'₅₄ chan₂ dsa₂ i₂lé₂ le₃jme₃'lión₂ jan₂ dsa₂ i₂ten₄ ca₂rē₃chán₃. ³³ Jua'₅₄ mei'₂ guē'₃ tsá₃ jág₅ dsa₂ 'éi₂ ja₁con₂ Diú₄, tsá₃ 'e₂ lé₂ jme₁jmo₃.

³⁴ Jaun₂ nē₃ ca₂ṇag₃ dsa₂ fariseos:

—Co₂ṇei'₅₄ bá₄ ne₄ dsáu'₂ ca₂rē₃cháng'₃. ¿I₂'ein₂ bá₄ lín'₅ 'ne₂ jaun₂ jme₁tag'₅ jnia'₅₄?

Jaun₂ ca₂dsei₅ dsa₂.

Jui₁lia'₂ dsa₂ ten₄ tē₂le₃ gu₂dsí₂

³⁵ Jaun₂ ca₂rē₃ṇi₅ Jesús jág₁ a₂ca₂dsen₅ dsa₂ ca₂dsein₂₃ dsa₂ i₂jme₁ten₄ 'éi₂. Jaun₂ jme₁ca₂jein'₂, ca₂juá'₂:

—¿'Én'₂ 'ne₂ tē₂le₃ quió'₅ Jaun₅ dsa₂ mi₂güí'₃?^u

³⁶ Jaun₂ ca₂juá'₂ dsa₂ 'éi₂:

—Gui'₅₄, ¿i₂'ein₂ bá₄ 'éi₂, ia₁jaun₂ lé₂ le₃'én₂ jniá₂ le₃quió'₅?

³⁷ Jaun₂ ca₂ṇag₃ Jesús:

—Ma₂nē₂jñin'₅₄ bá₄, jaun₂ jniá₂ bá₄ 'éi₂ i₂dsia'₂ jág₁ quiang'₅₄.

³⁸ Jaun₂ bá₄ ca₂chi₃jné₃ dsa₂ 'éi₂ ne₄ Jesús, jaun₂ ca₂juá'₂:

—'Én₂ bá₄ jniá₂, Te₁gui'₅₄.

³⁹ Jaun₂ ca₂juá'₂ Jesús:

—A₂qui₁dsi₅ 'éi'₃ bá₄ jniá₂ guio₃ mi₂güí'₃ la₂, ia₁jaun₂ jág₃ jui₁lia'₂ dsa₂ ten₄, ton'₂ ia₁jaun₂ le₃ten₄ jui₁lia'₂ dsa₂ i₂jág₅.

^u35 A₂lin₅₄ chog₅₄ si₂ juá'₂: “¿'Én'₂ 'ne₂ tē₂le₃ quió'₅ Ja₁ṇi'₅₄ Diú₄?”

⁴⁰ Jaun₂ qui₂ca₂nág₂ jág₁ jaun₂ i₂lin₅₄ dsa₂ fariseos i₂jme₁tion'₅₄
 quian'₅₄ Jesús, jaun₂ ca₂ṇag₃:

—¿O₃ bá₄ dsa₂ ten₄ lág₅ jnia'₅₄ ján₃?

⁴¹ Jaun₂ ca₂ṇag₃ Jesús:

—Jua'₅₄ mei'₂ gué₃ lín'₅ 'nia'₂ dsa₂ ten₄, tsá₃ dso₄ jme₁qui₂le₃cán'₂
 'nia'₂. La₁ia₁, 'uig₅₄ ia₁ a₂juá'₂ 'nia'₂, “ne₄ jnia'₅₄”, jaun₂ të₂'ñiá₄ dsáu'₂
 'nia'₂.

Jág₁ jáng'₅ léi₄ jui₁lia'₂ dsa₂ i₂jmo₅ 'í₁ já'₂ cha'₂

10 ¹ A₂dsi₂jó'₃ juíg₂ jniá₂ 'nia'₂, jui₁lia'₂ i₂tsá₃ tón'₅ të₂le₃ jui₅
 o₄'né₄ tsi₁jní₂ ja₁tion'₅₄ já'₂ cha'₂, a₂uíg₂ jui₅ siá'₂, dsa₂ 'ang₂
 bá₄ 'éi₂. ² La₁ia₁ jui₁lia'₂ i₂'í₂ të₂le₃ o₄'né₄, dsa₂ i₂jmo₅ 'í₁ já'₂ cha'₂ bá₄
 'éi₂. ³ O₄quió'₄ 'éi₂ bá₄ niá₅ dsa₂ i₂jmo₅ 'í₁ o₄'né₄, jaun₂ já'₂ cha'₂ né₃,
 rë₂cuí'₅ jág₁ quió'₅ 'éi₂. Jaun₂ të₂ já'₂ cha'₂ quiáin₅ 'ñiog₅ lia'₂ chein₂,
 jaun₂ 'uág'₂. ⁴ Jë₁ma₂ca₂lë₃ 'uín'₂ ca₂le₃jín₃ con'₂ i₂quiáin₅ 'ñiog₅, jaun₂
 cán₂ ne₄ jui₅, dsó₅ ne₄ já'₂ cha'₂. Já'₂ cha'₂ né₃ dsi₂lén₂ chi₁co'₅₄ quió'₅,
 ia₁ rë₂cuí'₅ bá₄ jág₁ quió'₅. ⁵ La₁ tsá₃ 'ein₂₃ jui₁lia'₂ dsa₂ i₂tsá₃ cuiin₂₃;
 të₂le₃ cuing₂₃ bá₄ ja₁con₂ 'éi₂, ia₁ tsá₃ cuí'₅ jág₁ quió'₅ dsa₂ sián'₂.

⁶ Ca₂juá'₂ Jesús jág₁ a₂jáng'₅ léi₄ në₅, la₁ tsá₃ ca₂rë₃ñí'₂ dsa₂, 'e₂ jein₅
 jág₁ jaun₂ a₂juá'₂.

Jan₂ Jesús i₂dsen₃ i₂jmo₅ 'í₁ já'₂ cha'₂

⁷ Jaun₂ né₃ ca₂juá'₂ táng₃ Jesús ca₂tsí'₃ dsa₂:

—A₂dsi₂jó'₃ juíg₂ jniá₂ 'nia'₂, jniá₂ bá₄ lín₅ o₄'né₄ jui₅ ja₁dsi₂ton'₅₄ já'₂
 cha'₂. ⁸ Ca₂le₃jín₃ i₂ma₂o₃lén₂ jñiá₅ gué₄ con'₂ gué₄ jniá₂, dsa₂ 'ang₂ bá₄
 'éi₂; la₁ já'₂ cha'₂ né₃, tsá₃ jui₅ ca₂ton'₂ quió'₅. ⁹ Jniá₂ lín₅ o₄'né₄; jui₁lia'₂
 i₂tón'₅ jui₅ le₃quió₃, tñin'₄ bá₄. Jaun₂ qui₃dsi₃toin'₅₄, qui₃'uín₃, jaun₂
 dsio'₂ bá₄ ñi₂ma'₂ a₂gué'₃.

¹⁰ Dsa₂ 'ang₂ né₃, jmá'₃ ta₁ jaun₂ bá₄ ja₂: a₂'ang₃, a₂jme₃dsiog₂₃,
 a₂qui₃'éin₂ né₃; jniá₂ né₃ guio₃ ia₁jaun₂ le₃chain₂, a₂le₃chain₂
 qui₂rë₂tsón₂. ¹¹ Jniá₂ bá₄ lín₅ juig₅₄ dsen₃ i₂jmo₅ 'í₁ já'₂ cha'₂.^v Guen₅
 'mú₃ juig₅₄ dsen₃ o₄quió'₄ já'₂ cha'₂; ¹² la₁ jui₁lia'₂ dsa₂ i₂jmo₅ ta₁
 a₂'liain'₅₄, jë₁ma₂ca₂jág₃ já₅ dsi₂jí'₅₄ náu₂, téin₂ bá₄ já'₂ cha'₂ jaun₂
 cuing₂₃ bá₄ 'ñiog₅, ia₁ on₃jua'₅₄ juig₅₄ i₂quián₅ já'₂ cha'₂ 'éi₂. Jaun₂
 dsi₂jí'₅₄ náu₂ né₃, tsáin'₂ já'₂ cha'₂, jaun₂ jmo₂₃ le₁jan₅₄ já'₂. ¹³ Dsa₂ 'éi₂
 né₃, cuing₂₃ ia₁ a₂'liain'₅₄ bá₄ jmo₂₃ 'í₁; tsá₃ dsan₂ dsí₅ já'₂. ¹⁴ Jniá₂ bá₄
 lín₅ juig₅₄ dsen₃; i₂cuín₅ bá₄ jniá₂ já'₂ cha'₂ quiáng₃; 'éi₂ né₃ cuig₂₃ jniá₂.
¹⁵ Le₂jaun₂ jui₁lia'₂ cuig₅ ñe'₃ jniá₂, ján₃ bá₄ cuín₅ jniá₂ 'éi₂ né₃. Guén₅
 jniá₂ 'mú₃ o₄quió'₄ já'₂ cha'₂ quiáng₃. ¹⁶ Ján₃ bá₄ tion'₅₄ já'₂ cha'₂ sián'₂
 quiáng₃ i₂tsá₃ tion'₅₄ 'ñió'₃ jñí₁ la₂; ján₃ bá₄ ca₂tín₂ jniá₂ i₁te₁ 'éi₂. Ján₃
 bá₄ le₃ne'₅₄ 'éi₂ jág₁ quió₃, jaun₂ co₂nió'₃ bá₄ lé₂, jan₂ gué'₂ juig₅₄.

^v11 'Í₂ Ezequiel 34.

¹⁷ 'Uig₅₄ jaun₂ bá₄ 'nio₃ Ne'₃ jniá₂: ia₁ jáng'₅ jme₂dsí₂ quió₃,^w ia₁jaun₂ títg'₄ táng₃. ¹⁸ Lia'₂ 'i₁jan₂ tsá₃ jniá'₂ jme₂dsí₂ a₂chan₂ jniá₂, ia₁ jáng'₅ bá₄ jniá₂ jme₂dsí₂ a₂chang₂ a₂'nio₂ dsi₃ 'ñio₃. Jniá₂ bá₄ 'o₂₃ bí₂ jáng'₅, jaun₂ 'o₂₃ bí₂ títg'₄ táng₃. 'Éi'₃ ně₅ ca₂ñig₂ ja₁con₂ Ne'₃.

¹⁹ Jaun₂ ca₂lě₃ le₁dson'₅₄ táng₃ dsa₂ judíos, jme₁ca₂nág₂ jág₁ ně₅.

²⁰ Juin₅ i₂'éi₂ juá'₂:

—I₂'en₅₄ jan₂ jme₂dsí₂ je₂na'₅₄ tē₂dsí₅ bá₄ ně₅, tē₂'i₂₃ a₂ñái₅ ně₃. ¿'E₂ lě₃ tón'₂ 'nia'₂ jui₅ jág₁ quió'₅?

²¹ La₁ i₂lin₅₄ guē'₂ juá'₂:

—On₃jua'₅₄ jág₁ quió'₅ jan₂ i₂'en₅₄ je₂na'₅₄ tē₂dsí₅ ně₅. ¿Lé₂ le₃jmo₃ je₂na'₅₄ a₂jág₃ jui₁lia'₂ dsa₂ ten₄?

Tsá₃ ca₂guen₃ dsa₂ judíos Jesús

²² Jmig₄ jaun₂, jme₁tion'₅₄ dsa₂ juig₂ Jerusalén jmo₂₃ Jmig₄ quió'₅ Si₂. Jein₂ güig₂ jme₁lě₄, ²³ jaun₂ jme₁i₂ñi₅₄ Jesús i₁dsi₅ guá'₅ templo ja₁lě₄ corredor a₂chei₂ Quió'₅ Salomón, ²⁴ jaun₂ qui₂ca₂o₃lio₃ dsa₂ judíos quió'₅, jaun₂ ca₂juá'₂:

—¿'A₂ con'₂ jmó'₂ 'ne₂ 'ag₃ guē'₄ caun₂-tin₃ dsi₅ jnia'₅₄? Chi₂jua'₂ dsón'₂ lín'₅ 'ne₂ I₂rē₂'ín₁ quián₅ Diú₄, co₂ñei'₅₄ jua'₅₄ rē₂jiá₃ jág₁.

²⁵ Jaun₂ ca₂ñag₃ Jesús:

—Ma₂ně₂juá'₃ bá₄ jniá₂, la₁ tsá₃ ca₂rē₃'én'₂ guē'₂ 'nia'₂. Qui₂jáng'₅ bá₄ jág₁ dsau₅ o₄quió₃, léi₄ a₂jmo₅ jniá₂; ²⁶ la₁ tsá₃ 'én'₂ 'nia'₂, ia₁ tsá₃ lín'₅ 'nia'₂ já'₂ cha'₂ quiáng₃. ²⁷ Ne'₅₄ bá₄ já'₂ cha'₂ quiáng₃ jág₁ quió₃; i₂cuig₅ bá₄ 'éi₂ jniá₂, jaun₂ ja₂'ein₂₃ chi₁co'₅₄ quió₃. ²⁸ Cué'₅ jniá₂ jme₂dsí₂ a₂le₃chain₂ co₂tan₅₄, jaun₂ lia'₂ o₁líg'₂ jmig₄ tsá₃ dsiáin₃, on₃ guē'₄ lia'₂ 'i₁jan₂ tsá₃ lé₂ le₃jñiá'₂ 'éi₂ o₄gu₃ jniá₂. ²⁹ Ne'₃ jniá₂, i₂ma₂cuag₃ 'éi₂, lín₅ i₂juin'₂ guē'₄ lia'₂ con'₂ guē'₄ ca₂le₃jín₃; jaun₂ lia'₂ 'i₁jan₂ tsá₃ lé₂ jñióg'₂ o₄gú₃ Ne'₃. ³⁰ Jniá₂ quian'₅₄ Ne'₃, ca₂ne₅₄ bá₄ lág₅ jnia'₅₄.

³¹ Jaun₂ ně₃ ca₂ñā'₃ táng₃ dsa₂ judíos ni₁cang₁ a₂qui'₃ quió'₅. ³² Jaun₂ ca₂juá'₂ Jesús:

—'Lióng₂ lín₃ léi₄ dse₃ ma₂'é₃ jniá₂ 'nia'₂ tē₂le₃ quian'₅₄ jui₅bí₂ quió'₅ Ne'₃; ¿o₄quió'₄ 'e₂ caun₂ a₂ma₂jmo₃ jniá₂ jaun₂, a₂qui₁jnau'₅₄ 'nia'₂ jniá₂ ni₁cang₁?

³³ Jaun₂ ca₂ñag₃ dsa₂ judíos:

—Tsá₃ o₄quió'₄ léi₄ dse₃ qui₁jna'₅₄ jnia'₅₄ 'ne₂ ni₁cang₁; a₂jaun₂ bá₄ ia₁ a₂'íng'₅ 'líg'₅₄ Diú₄, a₂jmo'₂ 'ne₂ a₂líg'₅ Diú₄, ton'₂ jan₂ dsa₂ mi₂güig₃ bá₄ líg'₅.

³⁴ Jaun₂ ně₃ ca₂juá'₂ Jesús tsí'₅ dsa₂ judíos:

—¿Tsa₁ chi₁ton₅ ne₄ Si₂ 'Éi'₂ quián'₂ 'nia'₂: “A₂ma₂juá'₃ jniá₂, a₂lín'₅ 'nia'₂ diú₄”?^x ³⁵ Chi₂jua'₂ ca₂tē'₃ “diú₄” dsa₂ i₂ca₂ñi₂ jág₁ quió'₅ Diú₄,

^w17 'Nio'₂ ja₁ton₅ Juan 19:30.

^x34 Salmo 82:6.

(jaun₂ tsá₃ lé₂ jua'₅₄ tsá₃ le₃ti₃ Si₂); ³⁶ 'ë₂ gué₄ bá₄ 'éi₂ i₂ca₂jmo₃ Diú₄ rē₂tson₄, i₂ca₂chein₃ mi₂güí₃. ¿'Nia'₂ juig'₂ 'íng'₅ 'lig'₅₄ Diú₄ ia₁ jniá₂ nē₂juá'₃ a₂líng₅ Ja₁ñi'₅₄ Diú₄? ³⁷ Chi₂jua'₂ tsá₃ jmo₅ jniá₂ ta₁ quió'₅ Ne'₃, tsá₃ jui₁le₂'én'₂ 'nia'₂ le₃quió₃ jniá₂. ³⁸ La₁ chi₂jua'₂ jmo₅ gué'₂ jniá₂, jui₁'a₂ gué₃ la₂ tsá₃ 'én'₂ 'nia'₂ tē₂le₃ quió₃ jniá₂, jui₁le₂'én'₂ bá₄ 'nia'₂ tē₂le₃ quió'₅ ta₁ a₂jmo₅ jniá₂, ia₁jaun₂ le₃ñi'₅₄ bá₄, ia₁jaun₂ le₃ñí'₂ 'au'₂ 'nia'₂,^y a₂'en₅₄ Ne'₃ ja₁cong₂, le₂jaun₂ gué'₂ táng₃, a₂'en₅₄ jniá₂ ja₁con₂ Ne'₃.

³⁹ Jaun₂ jme₁'nio₃ táng₃ dsa₂ jme₁tsáun'₂, la₁ ca₂lóin₂ bá₄ o₄gú₃ 'éi₂.

⁴⁰ Jaun₂ né₃, ñó₃ táng₃ Jesús tē₂le₃ quióng₄ Cuá₃ Jordán, jaun₂ ca₂jñia₃ ja₁jaun₂ ja₁jme₁'en₅₄ Juan₅₄ le₂jñiá₅ choin₂₃ jmig₂ dsa₂.^z ⁴¹ Juin₅ lin₃ dsa₂ ca₂i₁len₅₄ i₁jag₅₄, qui₂ca₂juá'₂:

—Tē₃dsón'₂ bá₄, o₁jñia'₅₄ tsá₃ 'e₂ léi₄ jué'₂ ca₂jmo₃ Juan₅₄, la₁ ca₂le₃jé₃ 'e₂ a₂ca₂juá'₂ a₂'iin₂₃ dsa₂ nē₅, dsau₅ bá₄.

⁴² Ja₁jaun₂ ca₂rē₃'én₂ juin₅ dsa₂ le₃quió'₅ Jesús.

Ca₂jon₃ Lázaro

11 ¹ Jme₁chan₂ jan₂ dsa₂ dso'₅₄ i₂jme₁chen₂ Lázaro, i₂jme₁chan₂ juig₂ Betania, juig₂ ja₁guá₄ María quian'₅₄ 'io₅₄ riin'₅₄ i₂chen₂ Marta.

² María nē₅ né₃ i₂rin'₅₄ Si₁Lia₁ dsa₂ dso'₅₄, 'éi₂ bá₄ i₂ca₂'ág₂ no'₅₄ mi₂juig₂ mi₂tag₄ Te₁gui'₅₄ jaun₂ ca₂chí₃, ca₂jme₃quéin₃ quian'₅₄ jñi₂ dsi₅₄.

³ Jaun₂ né₃, ca₂chen₃ le₃on₃ 'io₅₄ jág₁ ne₄ Jesús:

—Te₁gui'₅₄, a₂ron₅ dso'₅₄ dsa₂ i₂'nio₄ quiáng'₂.

⁴ Jaun₂ jme₁ca₂nág₂ Jesús, ca₂juá'₂:

—On₃jua'₅₄ dso₄ a₂jio₅ jui₅ 'mú₃ jaun₂; tē₂le₃ ia₁jaun₂ le₃juin'₂ Diú₄ bá₄, le₂jaun₂ gué'₂ Ja₁ñi'₅₄ Diú₄ ján₃ le₃juin'₂ tē₂le₃ quian'₅₄ dso₄ jaun₂.

⁵ Jesús né₃, jme₁'nioi₃ 'ñio₅ lin₃ Marta quian'₅₄ 'io₅₄ riin'₅₄, quian'₅₄ Si₁Lia₁. ⁶ Jaun₂ lē₃, jme₁ca₂juá'₂ dsa₂ a₂dso'₅₄ Si₁Lia₁, ca₂jñia₃ gué₄ tñ₃ jmig₄ ja₁jme₁'ein₅₄ jaun₂. ⁷ Cang₂ jaun₂, ca₂juá'₂ ca₂tsí'₃ chí'₂ dsi₂guia₃-tñ₂ quiáin₅:

—Ma₃dsau₅₄ táng₃ jui₅ Judea.

⁸ Jaun₂ né₃ ca₂juá'₂ chí'₂ dsi₂guia₃-tñ₂:

—Tē₅, i₁jáun₃ nē₅ cón'₅ jme₁'nio₃ dsa₂ judíos jme₁qui₃jñáu'₂ cang₄; ¿con'₂ gué'₂ lia'₂ 'niog'₂ gog'₅₄ táng₃ ja₁jaun₂?

⁹ Jaun₂ ca₂ñag₃ Jesús:

—¿On₁ dsón'₂ quian₅ guia₃-tñ₂ horas caun₂ jmig₄? Nē₁jua'₂ i₂nio₄ dsa₂ a₂jmi₂, tsá₃ qui₂niói₅, ia₁ jág₅ si₂ a₂tág₅ ja₁con₂ dsa₂ mi₂güí₃; ¹⁰ la₁ nē₁jua'₂ i₂nio₄ dsa₂ jē₄ qui₁né'₃ qui₂niói₅ ia₁ tsá₃ si₂ cha₂ ja₁coin₂.

¹¹ Cang₂ jme₁ma₂nē₂juá'₂ le₂nē₅, jaun₂ ca₂juá'₂:

^y38 A₂lin₅₄ chog₅₄ si₂ juá'₂: “ia₁jaun₂ le₃'én'₂ 'nia'₂.”

^z40 lit. “tiáin₂ dsa₂ jmig₂”

- Ma₂ca₂güin₂ bá₄ Si₁Lia₁ a₂mei₅₄ quián₂ jniog₄; la₁ nei₅₄ jniá₂ i₁nei₁₂.
¹² Jaun₂ né₃ ca₂juá'₂ chi'₂ dsi₂guia₃-tín₂:
 —Te₁gui'₅₄, chi₂jua'₂ ma₂ca₂güin₂, co₂'nió'₄ jñia₃ bá₄ quió'₅.
¹³ La₁ a₂jaun₂ bá₄ jme₁'nio₃ Jesús juá'₂ a₂jme₁ma₂jon₅ bá₄ 'éi₂; la₁ jaun₂ bá₄ lín₂ chi'₂ dsi₂guia₃-tín₂ a₂'ë₅ Jesús jui₁lia'₂ a₂güin₂ dsa₂ jë₁ma₂ca₂nei₂.
¹⁴ Jaun₂ né₃ ca₂juá'₂ Jesús lia'₂ rë₂jiá₃ jág₁:
 —Ma₂ca₂jon₃ bá₄ Si₁Lia₁. ¹⁵ Jéin₅ jniá₂ 'io'₂ o₄quián'₂ 'nia'₂, a₂tsá₃ jme₁'eng₅₄ ja₁jaun₂, ia₁jaun₂ le₃'én'₂ 'nia'₂. La₁ ma₃dsau₅₄ ma₃dsi₁jün₅₄.
¹⁶ Jaun₂ né₃ ca₂juá'₂ To₁má₄ i₂té'₂ dsa₂ Dsa₂ Tsin'₅₄, ca₂tsí'₃ chi'₂ dsi₂guia₃-tín₂ riin'₅₄:
 —Ján₃ guë'₂ dsau₅₄ jniog₄, ia₁jaun₂ dsióg₃ co₂lë₅ quian'₅₄ i₂në₅.

Jesús bá₄ i₂jmo₅ a₂jen'₅₄ dsa₂, i₂cuë₅ jme₂dsí₂ a₂le₃chan₂ dsa₂

- ¹⁷ Jme₁ma₂té₂ quén₂ jmig₄ 'en₅₄ Si₁Lia₁ tau₂ 'ñio₅, jme₁dsióg₃.
¹⁸ Juig₂ Betania jaun₂, jme₁niog₅ cau₅ ma₂quián₅ Jerusalén con'₂ tin₃ kilómetros të₂ ca₂jau₅₄.
¹⁹ Jaun₂ ca₂i₁len₅₄ juin₅ dsa₂ judíos ca₂i₁jün₁₂ Marta quian'₅₄ María riin'₅₄, ca₂i₁jmo₅₄ lián'₂ dsí₅ 'éi₂, ia₁ ca₂jon₃ Si₁Lia₁ riin'₅₄.
²⁰ Jaun₂ Marta né₃, jme₂ca₂rë₃ñi₅ a₂ma₂já₅ Jesús, jaun₂ ca₂o₃'íin₃ ca₂i₁jme₁jein'₂. La₁ María né₃ ca₂jñia₃ bá₄ dsi₂néi₂.
²¹ Jaun₂ ca₂juá'₂ Marta ca₂tsí'₃ Jesús:
 —Te₁gui'₅₄, jua'₅₄ mei'₂ bá₄ jme₁'eng'₅₄ ja₁lá₃, tsá₃ jme₁jón₂ dsó₂ ríng'₃. ²² La₁ia₁ guion₄ jniá₂, o₁jñia'₅₄ con'₂ lë₅ la₂, chi₂jua'₂ 'e₂ a₂mi'₂ 'ne₂ ja₁con₂ Diú₄, cuë₃ bá₄ 'éi₂.
²³ Jaun₂ ca₂juá'₂ Jesús:
 —Le₃chan₂ bá₄ táng₃ ríng'₂.
²⁴ Jaun₂ ca₂juá'₂ Marta:
 —Guion₄ bá₄ jniá₂ a₂le₃chain₂ táng₃ jë₁ma₂té₂ rë₁jein'₅₄ jin₄ 'lag₄, jmig₄ jë₁ca₂tó'₂.
²⁵ Jaun₂ né₃ ca₂juá'₂ Jesús:
 —Jniá₂ bá₄ lín₅ i₂jmo₅ a₂jen'₅₄ dsa₂, i₂cuë₅ jme₂dsí₂ a₂le₃chan₂ dsa₂ né₃. Jui₁lia'₂ i₂'én₂ të₂le₃ quió₃ jniá₂, o₁jñia'₅₄ ma₂join₂₃, le₃chain₂ bá₄;
²⁶ jaun₂ chi₂jua'₂ 'ein₂ i₂chan₂ guë₄, në₁jua'₂ ca₂rë₃'éin₂ të₂le₃ quió₃ jniá₂, lia'₂ o₁líg'₂ jmig₄ tsá₃ jóin₂. ¿'Éng'₂ jág₁ në₅?
²⁷ Jaun₂ ca₂juá'₂ Marta:
 —Ján₅, Te₁gui'₅₄. Ma₂ca₂rë₃'én₂ bá₄ jniá₂ a₂lín'₅ 'ne₂ Ja₁ñi'₅₄ Diú₄ I₂rë₂'ín₁ quiáin₅, i₂lë₅ jág₁ jiá₃ mi₂güig₃.

Ca₂'o₃ Jesús cau₅ tau₂ 'ñio₅ quió'₅ Si₁Lia₁

- ²⁸ Jme₁ca₂lë₃ juá'₂ Marta jág₁ në₅, ñái'₃ i₁te'₂ María riin'₅₄; jaun₂ ca₂juá'₂ jág₁ con'₂ të₃co'₅₄:
 —La₂ ma₂'en₅₄ të₅, jaun₂ 'ne₂ té'₂.

²⁹ Dsi₂jui₅ jme₁ca₂nág₂ María jág₁ në₅, ca₂nau₂, jaun₂ ŋó₃ i₁jīn₂₃ Jesús.

³⁰ Tsá₃ jme₁ma₂dsióg₃ gué₄ Jesús të₃jě₄ juig₂; jaun₂ bá₄ jme₁'ein₅₄ ja₁ca₂jein'₂ Marta.

³¹ Dsa₂ judíos i₂tion'₅₄ dsi₂néi₂ i₂cuē₅ lián'₂ dsi₅ né₃, jme₁ca₂jág₃ ca₂nau₂ María ca₂o₃'íin₃ co₂chi'₅₄, ca₂i₃lén₂ chi₁co'₅₄ quió'₅, ia₁ a₂lín₂ ŋó₅ 'éi₂ tau₂ 'ŋio₅ a₂i₂'áu₂ ja₁jaun₂.

³² Jaun₂ né₃, jme₁ca₂dsióg₃ María ja₁jme₁'en₅₄ Jesús, ca₂chi₃jnë₃ ne₄ 'éi₂,^a jaun₂ ca₂juá'₂:

—Te₁gui'₅₄, jua'₅₄ mei'₂ bá₄ jme₁'eng'₅₄ ja₁lá₃, tsá₃ jme₁jón₂ dsó₂ ríng'₃.

³³ Jme₁ca₂jág₃ Jesús 'a₂ lia'₂ jme₁'o₅ María, 'a₂ lia'₂ jme₁tion'₅₄ guē'₂ dsa₂ judíos 'o₂₃ né₃, i₂ja₂lén₂ quiain'₅₄, jaun₂ ca₂'ŋia₃ i₃mé'₂ dsí₅, ca₂'í₃ qui'₂ dsí₅ né₃.³⁴ Jaun₂ ca₂ŋag₃:

—¿A₂já'₄ ca₂i₁'óin'₄ 'nia'₂?

Jaun₂ ca₂juá'₂ dsa₂:

—Te₁gui'₅₄, ŋia₅ i₂jag₄.

³⁵ Jaun₂ ca₂'o₃ Jesús.

³⁶ Jaun₂ né₃ ca₂juá'₂ dsa₂ judíos:

—Jag₄ de'₂ 'a₂ lia'₂ jme₁'nioi₃ 'éi₂.

³⁷ La₁ ca₂juá'₂ i₂lin₅₄:

—¿Tsa₁ cha₂ lé₂ le₃jme₁jmo₃ i₂ně₅ i₂ca₂jme₃'lión₂ dsa₂ ten₄ 'éi₂, ia₁jaun₂ tsá₃ jme₁jón₂ guē'₂ dsó₂ rin'₅₄ 'io₅₄ në₅?

Ca₂jen'₅₄ Si₁Lia₁

³⁸ Con'₂ siá'₂ táng₃ ca₂'ŋia₃ Jesús a₂i₃mé'₂ dsí₅ lia'₂ con'₂ ca₂dsióg₃ ja₁dsi₅₄ tau₂ 'ŋio₅. Caun₂ tsi₁tě₂'lau₂ bá₄ jme₁lě₄ a₂jaun₂, jme₁chí'₄ ca₂míg₂ ni₁cang₁ a₂rě₂jlě₅ o₄'né₄.

³⁹ Jaun₂ ca₂juá'₂ Jesús:

—Ŋiá'₃ ni₁cang₁ në₅.

Jaun₂ ca₂juá'₂ Marta rin'₅₄ 'lag₄ ca₂tsí'₃ Jesús:

—Te₁gui'₅₄, mei'₂ tsá₃ ma₂ja₂ ma₂'lig'₅₄ quió'₅, ia₁ ma₂tě₂ quén₂ jmig₄ ca₂join₃.

⁴⁰ La₁ ca₂juá'₂ Jesús:

—¿Tsa₁ ně₂juá'₃ jniá₂, ně₁jua'₂ 'éng'₂, jag'₅₄ jui₅bí₂ jlá'₁ quió'₅ Diú₄?

⁴¹ Jaun₂ né₃ ca₂ŋiá'₂ dsa₂ ni₁cang₁. Jaun₂ ca₂chóg'₃ Jesús ne₅₄, ca₂juá'₂:

—Tia₅₄, cuē₅ jniá₂ ti₁'mag'₄ 'ne₂ ia₁ ma₂nei'₂ bá₄ jág₁ quió₃.⁴² A₂guion₄ bá₄ jniá₂, a₂nag'₂ co₂tan₅₄. La₁ ně₂juá'₃ le₂ně₅ o₄quió'₄ dsa₂ i₂tion'₅₄ ja₁lá₃, ia₁jaun₂ le₃'éin₂ a₂ca₂chei'₂ jniá₂.

⁴³ Jme₁ca₂lě₃ juá'₂ le₂ně₅, ca₂juá'₂ tiá₂:

—iLázaro! iJú₅ ja₁ně₅!

^a32 lit. “ca₂tóin₂ 'uě₃ cau₅ mi₂tag₄ 'éi₂.” 'Nio'₂ ja₁ton₅ Apocalipsis 4:10.

⁴⁴ Jaun₂ o₂'ín₃ 'lag₄ ja₁jaun₂ qui₂rē₂quein₅ gu₂-tag₅₄ quian'₅₄ 'nau₅₄ tsín'₅ tsi₁'mi'₂ jang₄. Dsi₂ne₅₄ nē₃ jme₁chi₁quein₅ quian'₅₄ tsi₁'mi'₂ tióg₃. Jaun₂ ca₂juá'₂ Jesús ca₂tsí'₃ dsa₂:

—Chi'₅₄ quió'₅, cuē₄ jmig₄ jui₁dsiain'₅₄.

Ca₂jmo₃ dsa₂ caun₂ jág₁ a₂tsáin'₂ Jesús
(Mateo 26:1-5; Marcos 14:1-2; Lucas 22:1-2)

⁴⁵ Jaun₂ nē₃, juin₅ dsa₂ judíos 'éi₂, i₂ca₂i₁len₅₄ quiaín'₅₄ María, i₂qui₂ca₂tē₂ ne₄ 'e₂ a₂ca₂jmo₃ Jesús jaun₂, ca₂rē₃'éin₂ tē₂le₃ quió'₅ 'éi₂.

⁴⁶ La₁ i₂lin₅₄ guē'₂ nē₃ ca₂i₁lein₅₄ ja₁con₂ dsa₂ fariseos, ca₂i₁jua'₄ 'e₂ a₂ca₂jmo₃ Jesús.

⁴⁷ Jaun₂ nē₃, ca₂ñi'₂ dsa₂ fariseos quiaín'₅₄ juig₅₄ jme₂dsa₂, quiaín'₅₄ dsi₂tan₅₄ quián₅ guá'₅, jaun₂ ca₂juá'₂:

—¿E₂ bá₄ jmó₁ jniog₄? Ia₁ nē₅ bá₄ ñi₅ dsa₂ 'éi₂ jmo₂₃ 'lióng₂ léi₄ juē'₂.

⁴⁸ Chi₂jua'₂ caun₂ cuē₂ jniog₄ jmig₄ jmo₃ lia'₂ ma₂jmo₂₃ nē₅, le₃'én₂ bá₄ ca₂le₃jín₃ dsa₂ tē₂le₃ quió'₅; jaun₂ qui₂ja₃lén₂ dsa₂ romanos qui₃'éin₂ ja₁jñió₅ quián₂ jniog₄ la₂, lia'₂ jma₃quian'₅₄ juig₂ nación quián₂ nē₃.

⁴⁹ La₁ jan₂ dsa₂ 'éi₂, i₂chen₂ Caifás, i₂jme₁lín₄ jme₂dsa₂ dsen₅₄ ñi₂ jaun₂, ca₂juá'₂:

—Tsá₃ 'e₂ cuín'₂ 'nia'₂ 'i₁caun₂, ⁵⁰ on₃ guē'₂ len'₅₄ 'nia'₂, a₂jmo₅ bá₄ quián₂ jniog₄,^b a₂jón₂ jan₂ dsa₂ o₄quió'₄ ca₂le₃jín₃, ia₁jaun₂ tsá₃ dsi₃'én₂ ta₁caun₂ juig₂.

⁵¹ La₁ on₃jua'₅₄ con'₂ tin₂ 'ñiog₅ Caifás ca₂juá'₂ le₂nē₅; a₂jaun₂ bá₄ ca₂juá'₂ le₂nē₅ ia₁ a₂jme₁lín₄ jme₂dsa₂ dsen₅₄ ñi₂ jaun₂: ca₂'é₂ jág₁ o₄quió'₄ Diú₄, a₂'i₄ 'éi'₃ jón₂ Jesús o₄quió'₄ dsa₂ juig₂ judíos.

⁵² La₁ on₃jua'₅₄ rē'₂ jmá'₃ o₄quió'₄ dsa₂ juig₂ judíos, ján₃ bá₄ ia₁jaun₂ chi₃loin'₃ jmói'₂ ca₂ne₅₄ ca₂le₃jín₃ chi'₂-guein₂ quián₅ Diú₄ i₂qui₂i₂nio₄ tsi₁rē₂jan₅₄ nē₃.

⁵³ Jaun₂ nē₃, ca₂le₃ jmig₄ jaun₂, ca₂jmo₃ jág₁ dsi₂tan₅₄ quián₅ dsa₂ judíos a₂jñi'₃ Jesús.

⁵⁴ 'Uig₅₄ jaun₂ tsá₃ ma₃jme₁ñi₅ Jesús dsi₁ne₁ jin₄ dsa₂ judíos, tē₂le₃ ca₂o₃'íin₃ bá₄ ja₁jaun₂. Jaun₂ ñó₃ caun₂ 'uē₃ ma₂quián₅ ja₁lé₄ 'uē₃ quein₂ co₂'ñiog₅, caun₂ juig₂ a₂chei₂ Efraín. Ja₁jaun₂ ca₂jñia₃ quiaín'₅₄ chi'₂ dsi₂guia₃-tín₂.

⁵⁵ Jme₁ma₂ja₂quián₃ Jmig₄ Tē₂'in₅₄ quió'₅ dsa₂ judíos. Jaun₂ juin₅ bá₄ dsa₂ ca₂'uiin₂ juig₂ gu'₂, qui₂ca₂uíg₂ jui₅ Jerusalén nē₃ a₂tē₅₄ Jmig₄ Tē₂'in₅₄, ia₁jaun₂ qui₃jmo₃ le₁jín₃.

⁵⁶ Jaun₂ jme₁i₂nio₄ dsa₂ 'nai'₂ Jesús, jaun₂ qui₂ñí'₂ riin'₅₄ tióin₂ i₁dsi₅ guá'₅ templo:

—¿A₂ lia'₂ lín'₂ 'nia'₂? ¿Jiá₃ jmig₄, o₃ bá₄ tsá₃ jiá₃ 'e₂?

^b50 A₂lin₅₄ chog₅₄ si₂ juá'₂: “a₂jmo₅ bá₄ quián₂ 'nia'₂.”

⁵⁷ Jme₁ma₂ca₂cuë₃ 'éi'₃ dsa₂ fariseos quiaín'₅₄ juig₅₄ jme₂dsa₂ né₃,
jme₁ma₂juá'₂, në₁juá'₂ 'ein₂ ca₂rë₃ñi₅ a₂já'₄ 'en₅₄ Jesús, jui₁jmo₁₂ jág₁
ia₁jaun₂ cuín₃ jmig₄ tsáun'₂.

Jan₂ 'io₅₄ ca₂tsíin₂ no'₅₄ mi₂juig₂ Jesús

(Mateo 26:6-13; Marcos 14:3-9)

12 ¹ Jñéi₂ jmig₄ né'₃ a₂të₅₄ Jmig₄ Të₂'in₅₄, ñó₃ Jesús jui₅ Betania
ja₁jme₁chan₂ Lázaro, dsa₂ i₂ca₂jme₃jen'₅₄ Jesús jme₁rë₂'lin₄
'éi₂.

² Ja₁jaun₂ ca₂jmo₃ dsa₂ caun₂ má₃ o₄quió'₄ Jesús, a₂jme₂juag'₂. Ca₂tia'₃
Marta má₃; Si₁Lia₁ guë'₂ jme₁lín₄ jan₂ dsa₂ i₂tián'₅ ne₄ mesa guë'₅ co₂lë₅
quiaín'₅₄ Jesús.

³ Jaun₂ né₃ ca₂can₃ María con'₂ mei'₂ tsá₃ ca₂'nau₅₄ litro no'₅₄ mi₂juig₂
nardo, a₂quen₅ 'mu'₅₄ 'ñio₅ lín₃, jaun₂ ca₂tsáng₂ mi₂tag₄ Jesús, jaun₂
ca₂chí₃ quian'₅₄ jñi₂ dsi₅₄. Ta₁caun₂ dsi₂néi₂ qui₂ca₂can'₂ dsió'₁ mi₂juig₂.

⁴ Jaun₂ né₃, ca₂juá'₂ Judas Iscariote,^c i₂jme₁lín₄ jan₂ dsa₂ guia₃-tín₂
quián₅ Jesús, i₂'éi₂ dé₄ i₂jáng'₂ quió'₅ Jesús, ca₂juá'₂.

⁵ —¿'E₂ 'uig₅₄ tsá₃ ca₂i₃'nag₄ co₂ñei'₅₄ no'₅₄ mi₂juig₂ në₅ quian'₅₄ 'ni₅
'ñiá₂-láu₂ 'éi'₃ cu₄ denario, a₂jme₁jme₁'on₁ dsa₂ te₂ñé₂?

⁶ La₁ on₃juá'₅₄ jaun₂ ca₂juá'₂ Judas le₂në₅ jua'₅₄ a₂dsón'₂ dsa₂ dsí₅
ja₁con₂ dsa₂ te₂ñé₂; a₂jaun₂ bá₄ ca₂juá'₂ le₂në₅ ia₁ a₂jme₁lín₄ jan₂ dsa₂
'ang₂ bá₄, ton'₂ jme₁nio₅ gu₂ tsi₁të₂lau₂ ja₁jme₁tó'₅ cu₄, jaun₂ jme₁cán₂
a₂jme₁tio'₅₄ 'ñi₃.

⁷ Jaun₂ né₃ ca₂juá'₂ Jesús ca₂tsí'₃ Judas:

—Tsá₃ lë₁lein'₅₄; ta₁ jaun₂ bá₄ ca₂'ma₃ a₂në₅, jaun₂ ma₂lé₅ co₂jñia₅₄
jmig₄ jë₁ma₂të₂ rë₁'on₃ jniá₂. ⁸ Ca₂le₃jé₃ jmig₄ bá₄ i₂nio₄ dsa₂ te₂ñé₂ jin'₄
'nia'₂, la₁ jniá₂ né₃ tsá₃ ma₃ué₂ 'en₅₄ jniá₂ quian'₅₄ 'nia'₂.

Ca₂jmo₃ dsa₂ caun₂ jág₁ a₂jñii'₃ Lázaro

⁹ Jaun₂ né₃, ca₂rë₃ñi₅ juín₅ dsa₂ judíos a₂'en₅₄ Jesús jë₄ juig₂ Betania,
jaun₂ i₁lein₅₄ ja₁jaun₂, on₃juá'₅₄ jmá'₃ ca₂ne₅₄ a₂i₁jñi₁₂ Jesús, ján₃ bá₄
ca₂i₁jñi₁₂ Si₁Lia₁ i₂ca₂jme₃jen'₅₄ Jesús jme₁rë₂'lin₅₄.

¹⁰ Jaun₂ né₃, ca₂jmo₃ juig₅₄ jme₂dsa₂ caun₂ jág₁ a₂jñii'₃ Si₁Lia₁ ján₃,
¹¹ ia₁ o₄quió'₄ 'éi₂ bá₄ juín₅ dsa₂ ma₂i₂uín₂ ja₁con₂ dsa₂ judíos, a₂rë₂'éin₂
të₂le₃ quió'₅ Jesús.

Ca₂dsióg₃ Jesús Jerusalén

(Mateo 21:1-11; Marcos 11:1-11; Lucas 19:28-40)

¹² Jme₁jñia₃ jaun₂, ca₂dsi₃lén₂ juín₅ lín₃ dsa₂ Jerusalén, ja₁nio₃ jmig₄.
Jaun₂ jme₁ca₂rë₃ñi₅ a₂dsióg₄ Jesús jë₄ juig₄ Jerusalén, ¹³ ca₂can₃ mog'₅₄
'ma₂tsín₅, jaun₂ ca₂'uín₂ ca₂i₁jñiai₅₄ Jesús, jaun₂ qui₂ca₂juá'₂ tiá₂:

^c 4 A₂lin₅₄ chog₅₄ si₂juá'₂ bá₄ ján₃: “ja₁ñi'₅₄ Si₂mu₅₄.”

—iJui₁le₂juin'₂ bá₄ i₂ně₅!^d iJui₁le₂ñi₃ó₃ i₂já₅ o₄qui₁ó'₄ Te₁gui'₅₄!^e
iJui₁le₂ñi₃ó₃ Rag₅₄ quián₅ Israel!

¹⁴ Ca₂dsán'₂ Jesús jan₂ i₂bú'₄ 'mí₂, jaun₂ ca₂co₃dsiin₅₄ já'₂, jui₁lia'₂
chi₁ton₅ ne₄ Si₂:

¹⁵ Tsá₃ lë₁jmo₂ gang'₃,
'nia'₂ dsa₂ chan₂ ciudad Sión:
jag₄, já₅ Rag₅₄ quiáng'₂,
co₂dsiin₅₄ jan₂ bú'₄.^f

¹⁶ Tsá₃ a₂jaun₂ ca₂rë₃ñi'₂ dsí₅ chi'₂ dsi₂guia₃-tín₂ le₂'uig₅₄; la₁ia₁ cang₂
jaun₂, jme₁ma₂ca₂lë₃ rë₂juin'₂ Jesús, jaun₂ bá₄ ca₂dsáu'₃ dsí₅ guioin₅₄
jág₁ ně₅ a₂tio'₅₄ ne₄ Si₂ a₂'iin₂₃ 'éi₂. Ca₂dsáu'₃ dsí₅ ján₃, dsau₅ bá₄ le₂jaun₂
ca₂jmo₃ dsa₂ juig₂ ja₁con₂ Jesús.

¹⁷ Qui₂ca₂jáng'₃ jág₁ dsau₅ dsa₂ juin₅ i₂jme₁quian'₅₄ Jesús lia'₂ con'₂
jme₁ca₂të'₃ Si₁Lia₁ né'₃ tau₂ 'ñio₅, jme₁ca₂jme₃jein'₅₄ 'éi₂ jme₁rë₂'liin₅₄.

¹⁸ 'Uig₅₄ jaun₂ bá₄ ca₂'uin₂ dsa₂ juin₅, a₂ca₂i₁ñiai₁₂ Jesús, ia₁ ca₂rë₃ñi₅
a₂ca₂jmo₃ 'éi₂ léi₄ juë'₂ jaun₂.

¹⁹ Jaun₂ ně₃ ca₂juá'₂ dsa₂ fariseos qui₂ca₂tsí'₃ riin'₅₄:
—Ně₅ bá₄ jág'₂ 'nia'₂, tsá₃ 'e₂ qui'₅₄ 'nia'₂ jmig₄ jmó'₂ 'i₁caun₂. Jag₄
de'₂ 'nia'₂, ma₂i₂lén₂ ta₁caun₂ mi₂güig₃ le₃qui₁ó'₅ i₂ně₅.

I₂lin₅₄ dsa₂ griegos 'nai'₂ Jesús

²⁰ Jin₄ dsa₂ i₂i₁len₅₄ Jerusalén i₂jme₂juin'₂ Diú₄ ja₁nio₅ jmig₄,
jme₁tion'₅₄ i₂lin₅₄ dsa₂ griegos. ²¹ Dsa₂ 'éi₂ ně₃, ca₂jme₃quiáin₃ ja₁con₂
Felipe i₂chan₂ juig₂ Betsaida, ja₁nio₅ 'uë₃ Galilea, jaun₂ ca₂mi₃ ne₄ 'éi₂,
ca₂juá'₂:

—Gui'₅₄, 'nio₅ jnia'₅₄ né₄ Jesús.

²² Jaun₂ ñe₄ Fe₂li₄ ca₂i₁chi'₄ Dré₄; jaun₂ le₂oin₃ ca₂i₁dsia₂ a₂ca₂i₁chi'₄
Jesús. ²³ Jaun₂ ně₃ ca₂ñag₃ Jesús:

—Ma₂ca₂të'₂ hora a₂le₃juin'₂ Jaun₅ dsa₂ mi₂güig₃. ²⁴ A₂dsi₂jó'₃ juíg₂
jniá₂ 'nia'₂, ně₁jua'₂ tsá₃ tiá'₃ né'₃ 'uë₃ jui₁lia'₂ ca₂míg₂ mi₂cuig₂,^g
a₂dsi₃'én₂ ně₃, a₂lë₁të₂ron₅₄ 'ñiog₅; la₁ia₁ ně₁jua'₂ ca₂jon₃ ně₃, 'lióng₂
rau₂. ²⁵ Jui₁lia'₂ i₂ñí₄ lë₃ 'nio₃ jme₂dsí₂ a₂chain₂, dsi₂'én₂ bá₄ jme₂dsí₂
jaun₂; la₁ia₁ jui₁lia'₂ i₂tén'₂ dsí₅ jme₂dsí₂ quió'₅ a₂chain₂ mi₂güig₃ la₂,
a₂lé₂ quió'₅ bá₄ co₂tan₅₄. ²⁶ Jui₁lia'₂ i₂jme₂ti₃ ta₁ ne₃ jniá₂, 'nió'₅ jiá₃
chi₁co'₅₄ quió₃ jniá₂, jaun₂ jui₁lia'₂ ja₁'en₅₄ jniá₂, ján₃ bá₄ ja₁jaun₂ 'en₅₄
guë'₂ i₂jme₂ti₃ ta₁ ne₃. Jaun₂ jui₁lia'₂ i₂jme₂ti₃ ta₁ ne₃, guéi'₂ bá₄ Ne'₃ rë₂.

^d13 lit. “Hosana”, co₂'nió'₄ le₃jua'₅₄: “iLio₄ jmig₄ ně₃!” A₂jme₁juá'₂ dsa₂ le₂ně₅ tsí'₅ Diú₄,
qui₂mi₂₃ a₂jiá₃ dsa₂ I₂rë₂'ñi₁ quiáin₅.

^e13 Salmo 118:25-26.

^f15 Zacarías 9:9.

^g24 lit. “trigo.”

Ca₂'é₂ Jesús jág₁ a₂jóin₂

²⁷ 'Nio₅ lin₃ quian₄ jniá₂ o₂i₁ dsi₅. ¿'E₂ bá₄ juá'₄ jniá₂? ¿Juá'₄ 'e₂:
 “Tia₅₄, lio₄ jniá₂ 'e₂ niog₅ a₂qui₂dsi₃ñí₂ jniá₂ hora la₂”? La₁ on₃jua'₅₄
 le₂jaun₂, ia₁ ta₁ jaun₂ guio₃ guè'₂ jniá₂ hora la₂. ²⁸ Tia₅₄ jme₁jnia₅ 'a₂ lia'₂
 jláng'₁.

Jaun₂ né₃ ca₂né'₂ caun₂ jág₁ guei'₅₄ mi₂güí₃ a₂ca₂juá'₂:
 —Ma₂ca₂jme₁jnia₅ bá₄ jniá₂, jaun₂ con'₂ siá'₂ jme₁jnia₅ táng₃.

²⁹ Jme₁ca₂nág₂ dsa₂ juin₅ i₂jme₁tió₂ cau₅ jaun₂, ca₂juá'₂:

—Ní'₃ bá₄ ně₂quiá'₃.

La₁ i₂sián'₂ guè'₂ juá'₂:

—Jan₂ ángel bá₄ ně₂juá'₂ jág₁ quió'₅.

³⁰ Jaun₂ né₃ ca₂juá'₂ Jesús ca₂tsí'₃ dsa₂:

—On₃jua'₅₄ o₄quió₃ jniá₂ a₂ca₂né'₂ jág₁ ně₅; o₄quián'₂ 'nia'₂ bá₄
 a₂ca₂né'₂. ³¹ Ně₃ gué₄ ně₃ ca₂té₂ jmi₄ a₂tě₃dsi₅₄ 'éi'₃ mi₂güí₃ la₂; ně₃
 gué₄ dsein₂₃ i₂gon₂ mi₂güí₃ la₂. ³² Jaun₂ jniá₂ ně₃, jě₁ma₂ca₂chó'₂ dsa₂
 guei'₅₄ gua'₅₄ 'uē₃, jme₁quián₄ jniá₂ ca₂le₃jín₃ ja₁cong₂.

³³ Ca₂juá'₂ le₂ně₅ a₂'ē₂₃ 'e₂ ne₅₄ 'mú₃ dsi₃ñí₂.

³⁴ Jaun₂ ca₂ṇag₃ dsa₂:

—Ma₂néi₂ jnia'₅₄ a₂'i₅ dsa₂ ne₄ Si₂ 'Éi'₃ a₂juá'₂ a₂le₃chan₂ I₂rě₂'ín₁
 quián₅ Diú₄ co₂tan₅₄. ¿'A₂ guè'₂ lia'₂ juá'₂ 'ne₂ tion₅₄ chón'₂ dsa₂ Jaun₅
 dsa₂ mi₂güí₃? ¿'Ein₂ 'éi₂ i₂lín₅ Jaun₅ dsa₂ mi₂güí₃?

³⁵ Jaun₂ né₃ ca₂juá'₂ Jesús:

—Jnia'₅₄ lia'₂ co₂'na₂ bá₄ tág₅ gué₄ si₂ jin'₄ 'nia'₂. La₁ i₂nio'₄ 'nia'₂
 tē₁lia'₂ tág₅ si₂, con'₂ tsá₃ ṇó₅ ně₁jua'₂ ca₂tó'₂ nei₂. Ia₁ jui₁lia'₂ dsa₂ i₂ñi₅
 jě₄ qui₁né'₃, tsá₃ ṇi₅ 'a₂ jui₅ dsó₃. ³⁶ Jui₁le₂'én'₂ 'nia'₂ le₃quió'₅ si₂, tē₁lia'₂
 cha₂ si₂ jin'₄ 'nia'₂, ia₁jaun₂ lén'₂ 'nia'₂ dsa₂ quián₅ si₂.

Jme₁ca₂dsan₃ juá'₂ Jesús le₂ně₅, ṇái'₃, jaun₂ ca₂'mai₃ ja₁con₂ dsa₂ 'éi₂.

'E₂ lě₃ tsá₃ jme₁'én₂ dsa₂ judíos le₃quió'₅ Jesús

³⁷ La₁ jui₁'a₂ gué₃ la₂ ca₂jmo₃ Jesús 'lióng₂ léi₄ ne₄ dsa₂ 'éi₂, tsá₃
 ca₂rě₃'én₂ bá₄ gué₄ dsa₂ 'éi₂ le₃quió'₅. ³⁸ Le₂ně₅ ca₂rě₃tí₃ jág₁ a₂ca₂'é₂
 Isaías o₄quió'₄ Diú₄, jme₁ca₂juá'₂:

Te₁gui'₅₄, ¿'ein₂ ma₂ca₂rě₃'én₂ jág₁ a₂'é₅ jniog₄?

¿Ja₁con₂ 'ein₂ ma₂ca₂jme₃jnia₅ Te₁gui'₅₄

jui₅bí₂ quió'₅?^h

³⁹ 'Uig₅₄ jaun₂ tsá₃ lé₂ le₃'én₂ dsa₂ 'éi₂, ia₁ con'₂ siá'₂ ca₂juá'₂ táng₃
 Isaías:

⁴⁰ “Ma₂ca₂jmo₃ Diú₄ a₂tén₂ dsa₂ 'éi₂,

a₂ca₂lě₃ cang₄ dsi₅₄ ně₃,

ia₁jaun₂ tsá₃ jág₃ quian'₅₄ mi₂ne₅₄,

^h38 Isaías 53:1.

on₃ guè'₂ le₂ñí'₂ të₂le₃ të₂dsí'₅,
 on₃ guè'₂ qui₃jéin'₃ dsí'₅,
 ia₁jaun₂ jme₁'lio₁₂ jniá'₂.ⁱ

⁴¹ Ca₂juá'₂ Isaías le₂ně₅ ia₁ ca₂jág₃ le₂ñiá'₅ jui₅bí'₂ jlá'₁ quió'₅ Jesús,
 jaun₂ ca₂dsia₃ 'iin₂₃ 'éi'₂.

⁴² La₁ia₁ tion₅₄ bá₄ ca₂rě₃'én₂ dsa₂, le₂jio₅ bá₄ i₂lin₅₄ dsa₂ can'₅₄. La₁
 tsá₃ ca₂jmo₃ jág₁, ia₁ a₂gó'₅ gain₃ dsa₂ fariseos, con'₂ tsá₃ ñó₅ ně₁jua'₂
 ca₂'uág'₂ dsa₂ quió'₅, ja₁le₁toin₂₃ ne₄ si₂ guá'₅ sinagoga.

⁴³ Ia₁ a₂'nio₃ gué'₄ të₃tsiin'₅₄ dse₃ quian'₅₄ dsa₂ mi₂güí'₃, lia'₂ con'₂ gué'₄
 a₂jme₁tě₃tsiin'₅₄ dse₃ quian'₅₄ Diú₄.

Jág₁ quió'₅ Jesús bá₄ a₂qui₃dsi₅ 'éi'₃ ja₁con₂ dsa₂ mi₂güí'₃

⁴⁴ Ca₂juá'₂ Jesús jág₁ tiá'₂:

—Jui₁lia'₂ i₂'én₂ të₂le₃ quió'₃ jniá'₂, on₃jua'₅₄ jmá'₃ le₃quió'₃ jniá'₂ 'éin₂;
 ján₃ bá₄ 'éin₂ le₃quió'₅ Ne'₃ i₂ca₂chei₃ jniá'₂.⁴⁵ Jui₁lia'₂ i₂jág₂ jniá'₂, jín₂
 i₂ca₂chei₃ jniá'₂.⁴⁶ Ma₂guan₅ jniá'₂ mi₂güí'₃ la₂, a₂lín₅ si₂, ia₁jaun₂ i₂'én₂
 të₂le₃ quió'₃ jniá'₂, tsá₃ të₃'ñiá'₄ jě₄ qui₁né'₃.⁴⁷ Jaun₂ chi₂jua'₂ 'ein₂ i₂nag₅
 jág₁ quió'₃, la₁ tsá₃ gué'₂ tón'₂ jui₅, on₃jua'₅₄ jniá'₂ qui₁dsi₅ 'éi'₃ quió'₅ 'éi'₂;
 ia₁ on₃jua'₅₄ ta₁ jaun₂ guio₃ jniá'₂ a₂qui₁dsi₅ 'éi'₃ ja₁con₂ dsa₂ mi₂güí'₃;
 të₂le₃ a₂loin₅₄ bá₄ jniá'₂.⁴⁸ Jui₁lia'₂ i₂tsá₃ jei₅₄ jniá'₂, on₃ gué'₂ tón'₂ jui₅
 jág₁ quió'₃, cha₂ bá₄ caun₂ a₂qui₃dsi₅ 'éi'₃ quió'₅. Jág₁ a₂ma₂qui₂ma₂juá'₃
 bá₄ jniá'₂, a₂jaun₂ bá₄ qui₃dsi₅ 'éi'₃ quió'₅, jmig₄ jě₁ca₂tó'₂.⁴⁹ Ia₁ on₃jua'₅₄
 o₄quió'₃ 'ñió'₃ ma₂qui₂ma₂juá'₃; Ne'₃ jniá'₂ i₂ca₂chei₃ bá₄ ma₂ca₂cuě₃ 'éi'₃
 jui₁'e₂ a₂juá'₅ jniá'₂ quian'₅₄ 'e₂ a₂jme₂tín₂ dsa₂.⁵⁰ Jaun₂ guion₄ jniá'₂,
 a₂jio₅ 'éi'₃ quió'₅ Ne'₃ jui₅ ja₁le₃chan₂ dsa₂ co₂tan₅₄; jaun₂ lě₃, jág₁
 a₂juá'₅ jniá'₂, juá'₅ lia'₂ con'₂ lě₅ 'éi'₃ ca₂cuě₃ Ne'₃.

Ca₂rín'₃ Jesús mi₂tag₄ chi'₂ dsi₂guia₃-tín₂ quiáin₅

13 ¹ Ca₂juig₄ jme₁'nió'₅ gué'₄ a₂tě₅₄ Jmíg₄ Tě₂'in₅₄. Jme₁ma₂ñi₅ bá₄
 Jesús a₂ma₂ca₂tě₂ hora a₂o₃'iin₅ mi₂güí'₃ la₂ a₂dsáin'₃ táng₃
 ja₁con₂ Jmei₂. Lia'₂ co₂tan₅₄ bá₄ ca₂jme₃'nio₃ 'éi'₂ dsa₂ quiáin₅
 i₂jme₁tion'₅₄ mi₂güí'₃; la₁ ně₃ ně₃, ca₂jme₃jniai₂₃ 'a₂ con'₂ ca₂dsióg₃
 ca₂rě₃'nioi₃ 'éi'₂.^j

² Jme₁ma₂lě₅ má₃ të₂le₃ ca₂nei₂, jaun₂ jme₁ma₂jmo₃ i₂sě₃dsen₃ a₂i₂jio₅
 dsí₅ Judas Iscariote, ja₁ñi'₅₄ Si₂mu₅₄, a₂jín'₂ Jesús. ³ Jme₁ma₂ñi₅ bá₄
 Jesús a₂ma₂ca₂dsia₃ Jmei₂ ca₂le₃jě₃ o₄gú₃; jme₁ma₂ñi₅ bá₄ ján₃ a₂já₅
 ja₁con₂ Diú₄, jaun₂ ja₁con₂ Diú₄ bá₄ dsáin'₃ táng₃. ⁴ Jaun₂ lě₃, lia'₂ con'₂
 jme₁tiáin'₄ gué'₅, ca₂nau₂ ja₁jme₁guá₄, jaun₂ ca₂dsia₃ cau₅ tsin'₅₄
 a₂jme₁qui'₂ të₂le₃ co'₅₄, jaun₂ ca₂jén'₃ caun₂ 'mi'₂ toalla o₄'ñei'₂.

ⁱ40 Isaías 6:10.

^j1 o₃, “ně₃ ně₃, ca₂rě₃'nioi₃ ca₂tě₂ jě₁ca₂tó'₂.”

⁵ Jaun₂ në₃ ca₂tia'₃ jmi₂g₂ 'ñió'₃ caun₂ ni₁'í₅, jaun₂ ca₂jme₃lióg₃ ca₂rang₃ mi₂tag₄ chi'₂ dsi₂guia₃-tín₂. Jaun₂ ca₂jme₃quén'₂ quian'₅₄ tsi₁'mi'₂ toalla a₂jme₁chi₁jén'₅ o₄'ñei'₂.

⁶ Jaun₂ jme₁ca₂dsióg₃ ja₁con₂ Si₂mu₅₄ Pe₄, ca₂juá'₂ 'éi₂ ca₂tsí'₃ Jesús: —Te₁gui'₅₄, ¿'ne₂ ráng'₂ tag₃ jniá'₂?

⁷ Jaun₂ ca₂ñag₃ Jesús:

—Tsá₃ ñí'₂ gué₄ 'au'₂ 'ne₂ 'e₂ a₂jmo₅ jniá'₂ në₃, la₁ cang₂ gué₄ le₃ñíg'₂.

⁸ La₁ ca₂juá'₂ Pe₄:

—Lia'₂ o₁líg'₂ co₂ñí'₂ tsá₃ ráng'₂ 'ne₂ tag₃ jniá'₂.

Jaun₂ ca₂juá'₂ Jesús:

—Në₁jua'₂ tsá₃ ca₂rang₃ jniá'₂ quiáng'₂, tsá₃ quen'₅₄ 'ne₂ ja₁con₂ jniá'₂.

⁹ Jaun₂ në₃ ca₂juá'₂ Si₂mu₅₄ Pe₄:

—Chi₂jua'₂ le₂jaun₂, Te₁gui'₅₄, on₃jua'₅₄ jmá'₃ mi₂tag₃ ráng'₂; ján₃ bá₄ rang₄ mi₂gu₃ quian'₅₄ mi₂dsi₃.

¹⁰ La₁ ca₂juá'₂ Jesús:

—Jui₁lia'₂ i₂lia'₂ ca₂lë₃ ló'₅, jmá'₃ mi₂tag₅₄ bá₄ 'nió'₅ rin'₂, ia₁ ma₂le₁jín₃ bá₄ ta₁jain₂. Ma₂le₁jín'₃ bá₄ 'nia'₂, la₁ia₁ on₃jua'₅₄ ca₂le₃jíng'₃.

¹¹ Ca₂juá'₂: “Tsá₃ le₁jín'₃ 'nia'₂ le₃jíng'₃”, ia₁ ma₂ñi₅ bá₄ i₂'ein₂ i₂jáng'₂ quió'₅.

¹² Jme₁ca₂lë₃ rang₅ Jesús mi₂tag₄ chi'₂ dsi₂guia₃-tín₂, jaun₂ ca₂quí'₂ táng₃ ni₁tsin'₅₄ le₃co'₅₄, jaun₂ ca₂guá'₂ táng₃ ne₄ mesa. Jaun₂ ca₂juá'₂ ca₂tsí'₃ chi'₂ dsi₂guia₃-tín₂:

—¿Ñí'₂ 'nia'₂ 'e₂ a₂në₂jmo₃ jniá'₂ quián'₂ 'nia'₂? ¹³ 'Ág'₅ 'nia'₂ jniá'₂ Të₅, quian'₅₄ Te₁gui'₅₄. Tí₅ bá₄ jág₁ quián'₂ 'nia'₂, ia₁ dsón'₂ bá₄ le₂jaun₂ líng₅.

¹⁴ Jaun₂ në₃, chi₂jua'₂ le₂në₅ jniá'₂ i₂líng₅ Të₅ quian'₅₄ Juig'₂ 'nia'₂, në₂rang₃ mi₂tag'₅₄ 'nia'₂, ján₃ bá₄ le₂jaun₂ 'nió'₅ jmó'₂ 'nia'₂: a₂qui₁ráng'₂ mi₂tag₄ ríng'₂ le₂jang'₂ le₂jang'₂. ¹⁵ Ia₁ ma₂në₂can₃ jniá'₂ caun₂ jui₅, ia₁jaun₂ jmó'₂ 'nia'₂ le₂jaun₂, jui₁lia'₂ ma₂në₂jmo₃ jniá'₂ ja₁con'₂ 'nia'₂.

¹⁶ A₂dsi₂jó'₃ juíg₂ jniá'₂ 'nia'₂, lia'₂ 'i₁jan₂ dsa₂ i₂jme₂ti₃ ta₁, tsá₃ juin'₂ gué₄ con'₂ gué₄ juig₅₄; ján₃ bá₄ lia'₂ 'i₁jan₂ dsa₂ i₂chen₄, tsá₃ juin'₅₄ gué₄ lia'₂ con'₂ gué₄ dsa₂ i₂chei₅. ¹⁷ Chi₂jua'₂ ñí'₂ 'au'₂ 'nia'₂ a₂në₅, 'e₂ bá₄ dsen'₃ 'nia'₂ chi₂jua'₂ le₂jaun₂ qui₂jmo'₂.

¹⁸ 'On₃jua'₅₄ ca₂le₃jín'₃ 'nia'₂ 'ín₅ jniá'₂; guion₄ bá₄ jniá'₂ i₂'ein₂ 'éi₂ i₂ma₂ca₂quiong'₅₄. La₁ia₁, 'nió'₅ le₃ti₃ lia'₂ con'₂ juá'₂ ne₄ Si₂: “Jui₁lia'₂ i₂gué'₅ co₂lë₅ quian'₅₄ jniá'₂, ca₂nau₂ quen₅ të₂le₃ ja₁con₂ jniá'₂.”^k ¹⁹ Jaun₂ juíg₂ jniá'₂ 'nia'₂ në₃, të₃jniá'₅, ia₁jaun₂ jë₁ma₂té₂ rë₁lé₂, le₃'én'₂ 'nia'₂, jniá'₂ bá₄ líng₅ 'éi₂.^l ²⁰ A₂dsi₂jó'₃ juíg₂ jniá'₂ 'nia'₂, jui₁lia'₂ i₂guen₅ dsa₂ i₂chen₄ quián₃ jniá'₂, guei₂₃ jniá'₂; jaun₂ jui₁lia'₂ i₂guei₅ jniá'₂ guein₂₃ i₂ca₂chei₃ jniá'₂.

^k18 Salmo 41:9.

^l19 o₃, “jniá'₂ líng₅” co₂'nió'₄ jein₅ jág₁ lia'₂ chen₂ Jehová. 'Nio'₂ ja₁ton₅ Éxodo 3:14, Isaías 43:10, Juan 8:58.

Ca₂juá'₂ Jesús a₂jáng'₂ Judas quió'₅
(Mateo 26:20-25; Marcos 14:17-21; Lucas 22:21-23)

- ²¹ Jme₁ca₂lë₃ juá'₂ jág₁ nē₅, ca₂can₃ o₂i₁ dsi₅ ca₂të₂ jme₂dsí'₂, jaun₂ ca₂jáng'₃ jág₁ dsau₅ lia'₂ rë₂jiá₃ jág₁, ca₂juá'₂:
—A₂dsi₂jó'₃ juíg₂ jniá'₂ 'nia'₂, jan₂ 'nia'₂ jáng'₂ jniá'₂.
- ²² Jaun₂ né₃ qui₂ca₂jín₂ chi'₂ dsi₂guia₃-tín₂ riin'₅₄ le₂jain₂ le₂jain₂, i₂gó'₃ dsí'₅ 'nio₃ le₃ñi₅ 'ein₂ bá₄ 'ín₅ Jesús.
- ²³ Jan₂ chi'₂ dsi₂guia₃-tín₂ i₂ñí'₄ lë₃ jme₁'nio₃ Jesús, jme₁guá'₄ le₃jén'₃ quió'₅. ²⁴ Jaun₂ ca₂jmo₃ Si₂mu₅₄ Pe₄ caun₂ léi'₄ ne₄ 'éi'₂, ca₂juá'₂:
—Chei'₅₄ 'ein₂ bá₄ 'iin₂₃.
- ²⁵ Jaun₂ né₃ ca₂jme₃quián₃ 'éi'₂ të₂cau₅ gué'₄ quió'₅ Jesús, jaun₂ ca₂ñag₃:
—Te₁gui'₅₄, ¿'ein₂ 'éi'₂?
²⁶ Jaun₂ ca₂ñag₃ Jesús:
—I₂'éi'₂ bá₄ i₂cué'₄ jniá'₂ ca₂jne₄ i₁ñí'₄ la₂, jë₁ma₂ca₂tiá'₃ ni₁uing₅.
Jaun₂ né₃, jme₁ma₂në₂tiá'₂ i₁ñí'₄, jaun₂ ca₂cué'₃ Judas Iscariote, ja₁ñi'₅₄ Si₂mu₅₄.
- ²⁷ Jaun₂ dsi₂jui₅ le₂jaun₂ jme₁ca₂gue₃ Judas i₁ñí'₄ jaun₂, ca₂í'₃ i₂së₃dsen₃ të₂dsí'₅. Jaun₂ né₃ ca₂juá'₂ Jesús:
—A₂jaun₂ a₂nio₅ 'au'₂ jmó'₂, jmo₄ nē₃ cón'₅.
- ²⁸ La₁ lia'₂ 'i₁jan₂ i₂tián'₅ gué'₅ ne₄ mesa tsá₃ ca₂rë₃ñí'₂ 'e₂ 'uig₅₄ ca₂juá'₂ Jesús ca₂tsí'₃ Judas le₂jaun₂.
- ²⁹ Ia₁ jme₁nio₅ gu₂ Judas 'éi'₂ ni₁lau₂ tio'₅₄ cu₄; jaun₂ ca₂lin₃ i₂lin₅₄, a₂ca₂juá'₂ Jesús tsí'₅ 'éi'₂ a₂cha₂ jme₁lá₃ quió'₅ jmig₄, o₃ jme₃oin₅₄ ca₂la₂ cu₄ dsa₂ te₂ñé'₂ 'e₂.
- ³⁰ Jaun₂ dsi₂jui₅ jme₁ma₂në₂gue₃ 'éi'₂ i₁ñí'₄, o₂'ín₃. Jme₁ma₂ca₂nei₂ bá₄ le₂jaun₂.

Caun₂ 'éi'₃ 'mí'₂

- ³¹ Jme₁ma₂o₂'ín₃ Judas jaun₂, ca₂juá'₂ Jesús:
—Në₃ né₃, jë₁ma₂le₃jniá'₂ jui₅bí'₂ jlá'₁ quió'₅ Jaun₅ dsa₂ mi₂güí'₃; ján₃ bá₄ le₃jniá'₂ jui₅bí'₂ quió'₅ Diú₄, ja₁con₂ 'éi'₂. ³² Chi₂jua'₂ le₃jnia₅ jui₅bí'₂ quió'₅ Diú₄ ja₁con₂ 'éi'₂,^m Diú₄ né₃, jme₃jnia₅ jui₅bí'₂ jlá'₁ quió'₅ Ja₁ñi'₅₄ ja₁con₂ 'ñiog₅, ton'₂ jme₃jniai₂₃ ñi'₅₄ ta₁. ³³ 'Nia'₂ chi'₂-guein₂ quiáng₃, tsá₃ ma₂ué'₂ 'en₅₄ jniá'₂ jin'₄ 'nia'₂. Qui₁'nau'₅₄ 'nia'₂ jniá'₂; la₁ jui₁lia'₂ ma₂ca₂juíg₂ jniá'₂ dsa₂ judíos, ján₃ bá₄ le₂jaun₂ juíg₂ jniá'₂ 'nia'₂ né₃: tsá₃ lé₂ o₁nó'₅ 'nia'₂ ja₁né'₄ jniá'₂. ³⁴ Caun₂ 'éi'₃ 'mí'₂ la₂ cué'₄ jniá'₂ 'nia'₂: a₂jme₁'nió'₄ 'nia'₂ ríng'₂ le₂jang'₂ le₂jang'₂. Jui₁lia'₂ ca₂jme₁'nió'₄ jniá'₂ 'nia'₂, 'nia'₂ né₃ 'nió'₅ jme₁'nió'₄ 'nia'₂ ríng'₂. ³⁵ Le₂në₅ bá₄ le₃ñi₅

^m32 A₂lin₅₄ chog₅₄ si₂, tsá₃ juá'₂ con'₂ táng₃: “chi₂jua'₂ le₃jnia₅ jui₅bí'₂ quió'₅ Diú₄ ja₁con₂ 'éi'₂.”

ca₂le₃jín₃ dsa₂ a₂lín₅ 'nia'₂ dsa₂ i₂ma₂ca₂rë₃tín₃ quiáng₃: në₁jua'₂ caun₂
qui₂ca₂jme₁'nió'₄ 'nia'₂ ríng'₂ le₂jang'₂ le₂jang'₂.

Ca₂juá'₂ Jesús a₂tsá₃ tion₃ Pe₄ a₂cuig₂₃

(Mateo 26:31-35; Marcos 14:27-31; Lucas 22:31-34)

³⁶ Jaun₂ ca₂ṇag₃ Si₂mu₅₄ Pe₄ ca₂ṇí'₃ Jesús:

—Te₁gui'₅₄, í₂a₂já'₄ guang'₅₄?

Jaun₂ ca₂ṇag₃ Jesús:

—Ja₁né'₄ jniá₂, tsá₃ lé₂ le₃'éin'₄. La₁ 'éin'₄ bá₄ 'nia'₂ cang₂.

³⁷ Jaun₂ né₃ ca₂juá'₂ Pe₄ ca₂tsí'₃ Jesús:

—Te₁gui'₅₄, í'e₂ lë₃ tsá₃ lé₂ le₃'éin'₄ jniá₂ tē₂nē₃? Ma₂chan₂ co₂jñia₅₄
bá₄ jniá₂ a₂gue₅₄ 'mú₃ o₄quián'₂ 'ne₂.

³⁸ Jaun₂ ca₂ṇag₃ Jesús:

—íDsón'₂ ma₂'ei₅ caun₂ 'au'₂ a₂gue'₂ 'mú₃ o₄quió₃ jniá₂? A₂dsi₂jó'₃
juíg₂ jniá₂ 'ne₂, né₃ gué₄ a₂'o₃ tē₁guí₄ dsó₂, hora jaun₂ dé₄ tsá₃ tón'₄ 'ne₂
a₂cuig'₂ jniá₂, ta₁'ni₅ ráun₂.

Jesús bá₄ lín₅ jui₅ a₂dsi₁len₃ dsa₂ ja₁con₂ Jmei₂

14 ¹ Tsá₃ lë₁can₂ 'nia'₂ o₂i₁ 'au'₂. Jui₁lia'₂ 'én'₂ 'nia'₂ tē₂le₃ quió'₅
Diú₄, ján₃ bá₄ le₂jaun₂ jui₁le₂'én'₂ 'nia'₂ tē₂le₃ quió₃ jniá₂.

² Ja₁quió'₄ Ñe'₃, 'líong₂ dsi₂néi₂ cha₂ a₂jo₂; jua'₅₄ mei'₂ gué₃ tsá₃ le₂jaun₂
né₃, ílín'₂ 'nia'₂ a₂jme₁juig₅₄ jniá₂ 'nia'₂ a₂nég'₄ i₁jmo₃ co₂jñia₅₄ dsi₂néi₂
quián'₂ 'nia'₂?ⁿ ³ Cang₂ jë₁ma₂dsián'₃ jniá₂, jë₁ma₂ca₂lë₃ jmo₂₃ co₂jñia₅₄
ja₁o₁tión'₂ 'nia'₂, jaun₂ bá₄ guio₅₄ táng₃ a₂i₁te₁₂ 'nia'₂ ja₁cong₂, ia₁jaun₂
ja₁i₁'ú₃ jniá₂, ján₃ bá₄ lé₂ o₁tión'₂ 'nia'₂. ⁴ Ñi'₅₄ bá₄ 'nia'₂ a₂já'₄ né₄ jniá₂;
cuin'₂ bá₄ 'nia'₂ jui₅ né₃.

⁵ Jaun₂ ca₂juá'₂ To₁má₄:

—Te₁gui'₅₄, tsá₃ ne₄ jnia'₅₄ a₂já'₄ guang'₅₄; í'a₂ gué'₂ lia'₂ le₃cuag₅
jniá'₅₄ jui₅?

⁶ Jaun₂ ca₂ṇag₃ Jesús:

—Jniá₂ bá₄ líng₅ jui₅, ján₃ bá₄ líng₅ jág₁ dsau₅, ján₃ bá₄ líng₅ i₂jmo₅
a₂le₃chan₂ dsa₂. 'I₁jan₂ tsá₃ dsió₄ ja₁con₂ Ñe'₃ jua'₅₄ tsá₃ tē₂le₃ quian'₅₄
jniá₂. ⁷ Jua'₅₄ mei'₂ gué₃ dsón'₂ ñi'₅₄ 'nia'₂ 'ein₂ lín₅ jniá₂, ján₃ bá₄
jme₁le₃cuin'₂ 'nia'₂ Ñe'₃ ján₃; ⁸ jaun₂ në₃ né₃, tē₂le₃ ne₄ jui₅, le₃cuin'₂
'nia'₂, ton'₂ ma₂jñin'₅₄ 'nia'₂.

⁸ Jaun₂ né₃ ca₂juá'₂ Fe₂li₄ ca₂tsí'₃ Jesús:

—Te₁gui'₅₄, cuë₄ jmig₄ a₂jñin'₄ jnia'₅₄ Ñéi'₅, jaun₂ co₂jaun₂ gué₄ dsáu₅
dsi₅ jnia'₅₄.

⁹ Jaun₂ ca₂ṇag₃ Jesús:

ⁿ2 o₃, “jua'₅₄ mei'₂ gué₃ tsá₃ le₂jaun₂ né₃, jme₁juig₅₄ gué'₂ jniá₂ 'nia'₂. Né₄ i₁jmo₃ co₂jñia₅₄
dsi₂néi₂ quián'₂ 'nia'₂.”

^o7 A₂lín₅₄ chog₅₄ si₂ juá'₂: “chì₂jua'₂ dsón'₂ ma₂cuig'₂ 'nia'₂ jniá₂, le₃cuin'₂ 'nia'₂ Ñe'₃ ján₃.”

—¿Tsa₁ cuig'₂ 'ne₂ jniá₂ Fe₂li₄, o₁jnia'₅₄ ma₂ño₅ jmig₄ 'en₅₄ jniá₂ quian'₅₄ 'nia'₂? Chi₂jua'₂ 'ein₂ dsa₂ ma₂jág₂ jniá₂, ján₃ bá₄ ma₂jín₂ Ne'₃. ¿'A₂ bá₄ lia'₂ juá'₂ 'ne₂: “Cuë₄ jmig₄ a₂jín₄ jnia'₅₄ Néi'₅”? ¹⁰ ¿Tsa₁ 'én'₂ 'ne₂ a₂'en₅₄ jniá₂ ja₁con₂ Ne'₃, ton'₂ 'en₅₄ guë'₂ Ne'₃ táng₃ ja₁con₂ jniá₂? Jui₁lia'₂ jág₁ a₂juí₂g₂ jniá₂ 'nia'₂, tsá₃ juá'₅ jniá₂ o₄quíó₃ 'ñió₃. Të₂le₃, Ne'₃ jniá₂ i₂të₁'ñiá₄ ja₁con₂ jniá₂, i₂'éi₂ bá₄ jmo₅ ta₁ quió'₅. ¹¹ Jui₁le₂'én'₂ bá₄ 'nia'₂ a₂juá'₅ jniá₂, a₂'eng₅₄ ja₁con₂ Ne'₃, a₂'en₅₄ guë'₂ Ne'₃ ja₁con₂ jniá₂; o₃ në₁jua'₂ tsá₃ le₂jaun₂, jmá'₃ lia'₂ të₂le₃ quian'₅₄ léi₄ a₂jmo₂₃, jui₁le₂'én'₂ 'nia'₂. ¹² A₂dsi₂jó'₃ juí₂g₂ jniá₂ 'nia'₂, jui₁lia'₂ i₂'én₂ le₃quíó₃ jniá₂, ján₃ bá₄ jmo₃ jui₁lia'₂ a₂jmo₅ jniá₂; jaun₂ të₂le₃ 'ñio₅ guë'₄ juë'₂ a₂jmo₃, ia₁ nég'₄ ja₁con₂ Ne'₃. ¹³ Jaun₂ chi₂jua'₂ 'e₂ a₂mi'₂ 'nia'₂ lia'₂ con'₂ lé₅ 'éi'₃ quió₃ jniá₂, jmo₅₄ bá₄ jniá₂, ia₁jaun₂ le₃juin'₂ Jmei₂ o₄quíó'₄ Ja₁ñi'₅₄. ¹⁴ Lé₂ bá₄ mí'₁ 'nia'₂ lia'₂ con'₂ lé₅ 'éi'₃ quió₃ jniá₂, chi₂jua'₂ 'e₂ caun₂ a₂'niog'₂ 'nia'₂, jaun₂ jmo₅₄ bá₄ jniá₂.

Ca₂cuë₃ Jesús jág₁ quió'₅ a₂chein₃ Jme₂dsí₂ Jñió₅

¹⁵ 'Chi₂jua'₂ 'nióg'₃ 'nia'₂ jniá₂, nei₂ gau₂ 'éi'₃ quió₃. ¹⁶ Jaun₂ mi₅₄ jniá₂ ne₄ Ne'₃ a₂cuin₃ jan₂ i₂sián'₂ i₂cué'₃ bí₂ 'au'₂ 'nia'₂, ia₁jaun₂ 'í₂ 'éi₂ co₂tan₅₄ quian'₅₄ 'nia'₂. ¹⁷ Jme₂dsí₂ quió'₅ jág₁ tí₅ bá₄ 'éi₂. Tsá₃ lé₂ le₃guei₃ dsa₂ mi₂güí₃g₃, ia₁ tsá₃ jág₂, on₃ guë'₂ cuig₂₃ cuin₂₃ 'éi₂. La₁ 'nia'₂ né₃, ma₂cuin'₂ bá₄ 'nia'₂, ia₁ guá₅ ja₁con'₂ 'nia'₂, ton'₂ të₃'ñiá₄ le₃quián'₂ 'nia'₂. ¹⁸ On₃jua'₅₄ a₂tén₄ jniá₂ 'nia'₂ co₂ñei'₅₄ në₂jag₄ bá₄ chi'₂ 'nág₂. Guio₅₄ bá₄ táng₃ ja₁con'₂ 'nia'₂. ¹⁹ Tsá₃ ma₃uë'₂ jág₂ dsa₂ mi₂güí₃g₃ jniá₂, la₁ia₁ jag'₅₄ bá₄ 'nia'₂. 'Uig₅₄ ia₁ a₂chan₂ jniá₂, le₃chang'₂ bá₄ 'nia'₂. ²⁰ Jmig₄ jaun₂ le₃len'₅₄ 'nia'₂ a₂'en₅₄ jniá₂ ja₁con₂ Ne'₃, 'nia'₂ guë'₂ tiong'₅₄ ja₁con₂ jniá₂, jaun₂ jniá₂ guë'₂ në₃ 'eng₅₄ ja₁con'₂ 'nia'₂. ²¹ Jui₁lia'₂ i₂gue₅, i₂né'₂ 'éi'₃ quió₃, 'éi₂ bá₄ i₂të₃dsón'₂ 'nio₃ jniá₂. Jui₁lia'₂ i₂'nio₃ jniá₂ në₃, jme₃'nio₃ Ne'₃. Ján₃ bá₄ le₂jaun₂ jniá₂ jme₁'nió₄, jaun₂ jme₁jnia₅ jniá₂ ja₁coin₂.

²² Jaun₂ ca₂juá'₂ Judas, (on₃jua'₅₄ Iscariote):

—Te₁gui'₅₄, ¿'e₂ lë₃ ja₁con₂ jnia'₅₄ jme₁jnag'₅, on₃jua'₅₄ rë'₂ ja₁con₂ dsa₂ mi₂güí₃g₃?

²³ Jaun₂ ca₂ñag₃ Jesús:

—Jui₁lia'₂ i₂'nio₃ jniá₂, tón'₂ bá₄ jui₅ jág₁ quió₃; jaun₂ jme₃'nio₃ Ne'₃ jme₃'nioi₃ 'éi₂, jaun₂ qui₂ja₁náu₄ jnia'₅₄ ja₁coin₂ ja₁'io₁ quian'₅₄ 'éi₂.

²⁴ Jui₁lia'₂ i₂tsá₃ 'nio₃ jniá₂, tsá₃ tón'₂ jui₅ jág₁ quió₃. Jág₁ a₂nag'₂ 'nia'₂ la₂, on₃jua'₅₄ a₂quíó₃, a₂quíó'₅ Ne'₃ i₂ca₂chei₃ bá₄.

²⁵ 'Ca₂le₃jé₃ a₂la₂ juá'₅ jniá₂ juí₂g₂ 'nia'₂ të₁lia'₂ 'eng₅₄ guë'₄ quian'₅₄ 'nia'₂; ²⁶ la₁ia₁ i₂cuë₃ bí₂ 'au'₂ 'nia'₂ 'éi₂, i₂lín₅ Jme₂dsí₂ Jñió₅, i₂chen₃ Ne'₃ o₄quíó₃ jniá₂, 'éi₂ bá₄ jme₃tag₅ jme₃tiin₂₃ 'nia'₂, jaun₂ jmo₃ a₂qui₃dsiog'₂ 'au'₂ 'nia'₂ ca₂le₃jé₃ 'e₂ a₂ma₂qui₂ma₂juí₂g₂ jniá₂ 'nia'₂.

²⁷ 'Ág'₅ jniá₂ jág₁ a₂jmo₃ 'ag₃ tei₄ ja₁con'₂ 'nia'₃. A₂tei₄ a₂'ei₅ ja₁con₂ jniá₂, a₂jaun₂ bá₄ cuë'₅ jniá₂ 'nia'₂. La₁ on₃jua'₅₄ lia'₂ cuë'₅ dsa₂ mi₂güí₃g₃,

cué₅ jniá₂ 'nia'₂. Tsá₃ lē₁can₂ 'nia'₂ o₂i₁ dsi₅, on₃ guē₂ jmó'₂ 'nia'₂ gang'₃.
²⁸ Ma₂qui₂ma₂nei'₂ 'nia'₂ a₂juá'₅ jniá₂: a₂nég'₄, jaun₂ guio₅₄ táng₃ ja₁con'₂ 'nia'₂. Nē₁jua'₂ tē₃dsón'₂ 'nióg'₃ 'nia'₂ jniá₂, jme₁jmó'₂ 'nia'₂ 'io'₂ jme₁ca₂rē₃ñi'₅₄ 'nia'₂ a₂né'₄ jniá₂ ja₁con₂ Ñe'₃, ia₁ i₂juin'₂ gué₄ 'éi'₂ lia'₂ con'₂ gué₄ jniá₂. ²⁹ Jaun₂ ma₂juíg₂ jniá₂ 'nia'₂ a₂la₂ tē₃ñiá₅, ia₁jaun₂ le₃én'₂ 'nia'₂ jē₁ma₂tē₂ rē₁lé₂ a₂jaun₂.

³⁰ Tsá₃ ma₂'lióng₂ jág₁ dsia₅₄ jniá₂ quian'₅₄ 'nia'₂; ia₁ ma₂já₅ i₂gon₂ mi₂güí₃ la₂, o₁jñia'₅₄ tsá₃ 'e₂ jui₅bí₂ 'io₅ 'éi'₂ ja₁con₂ jniá₂. ³¹ La₁ia₁ 'nió'₅ le₃ñi₅ dsa₂ mi₂güí₃, a₂'nió₃ jniá₂ Ñe'₃, jaun₂ lia'₂ con'₂ lē₅ 'éi'₃ a₂ma₂cuē₃ Ñe'₃ jniá₂, a₂jaun₂ bá₄ jmo₅ jniá₂.

'Nau₂ 'nia'₂. Ma₃dsau'₅₄ jniog₄ ja₁lá₃.

Cho'₅₄ chi₁uíng₃ uvas, quian'₅₄ gu'₂ nei'₅₄ quió'₅

15 ¹ 'Jniá₂ líng₅ cho'₅₄ ni₁uíng₂ uvas, ja₁já₅ bí₂ dsón'₂. Ñe'₃ guē'₂ lín₅ i₂jmo₅ 'í₁ ja₁nau₂. ² Jñiá'₂ 'éi'₂ ca₂le₃jé₃ ni₁gu'₂ quió'₃ a₂tsá₃ míg₂ 'ag₅; la₁ia₁ qui₂jí'₅ qui₂uíñ₂₃ ni₁gu'₂ a₂'ag₅ míg₂, ia₁jaun₂ ráu₃ gué₄ 'lióng₂. ³ Ma₂le₁jín'₃ bá₄ 'nia'₂ tē₂le₃ quian'₅₄ jág₁ a₂qui₂ma₂juíg₂ jniá₂ 'nia'₂. ⁴ Caun₂ jui₁tē₂'ñiá'₄ bá₄ 'nia'₂ ja₁con₂ jniá₂, jui₁lia'₂ tē₂'ñiá₄ jniá₂ ja₁con'₂ 'nia'₂. 'I₁caun₂ ni₁gu'₂ tsá₃ lé₂ le₃'ag₃ míg₂ con'₂ 'ñiog₅ le₂jaun₂, nē₁jua'₂ tsá₃ rē₂tsán'₂ quian'₅₄ cho'₅₄; ján₃ bá₄ le₂jaun₂ jui₁lia'₂ 'nia'₂ nē₃, tsá₃ 'e₂ lé₂ le₃ráu₃ quián'₂ 'nia'₂ nē₁jua'₂ tsá₃ tē₂'ñiág'₄ ja₁con₂ jniá₂.

⁵ 'Jniá₂ líng₅ cho'₅₄; 'nia'₂ guē'₂ líng'₅ gu'₂ nei'₅₄. Jui₁lia'₂ dsa₂ i₂tē₂'ñiá₄ rē₂tsán'₂ quian'₅₄ jniá₂, jui₁lia'₂ tē₂'ñiá₄ jniá₂ ja₁con₂ 'éi'₂, 'lióng₂ ráu₃ quió'₅. Ia₁ 'i₁caun₂ tsá₃ 'e₂ lé₂ le₃jmó'₂ 'nia'₂ jua'₅₄ tsá₃ quiong'₅₄ jniá₂. ⁶ Jui₁lia'₂ i₂tsá₃ tē₂'ñiá₄ ja₁con₂ jniá₂, lín₅ nē₂jag₄ bá₄ caun₂ ni₁gu'₂ a₂dsi₂guia'₂ dsa₂ cau₅, jaun₂ rē₂quein₂. Ni₁gu'₂ le₂nē₅ qui₂cág'₅ dsa₂, qui₂tó'₅ dsa₂ dsi₂si₂, jaun₂ cau₂.

⁷ 'Chi₂jua'₂ tē₂'ñiá'₄ 'nia'₂ ja₁con₂ jniá₂, ton'₂ tē₂'ñiá₄ jág₁ quió'₃ ja₁con'₂ 'nia'₂, jaun₂ mi₄ 'nia'₂ chi₂jua'₂ 'e₂ caun₂ 'niog'₂, jaun₂ gué'₁ bá₄ 'nia'₂.

⁸ Le₂la₂ bá₄ rē₂juin'₂ Ñe'₃: a₂qui₂ráu₂ 'lióng₂ 'e₂ a₂jmo'₂ 'nia'₂.^p Le₂nē₅ jme₂jniá'₂ 'nia'₂ a₂lín'₅ dsa₂ i₂ca₂rē₃tín₃ quián₃ jniá₂. ⁹ Jui₁lia'₂ 'nio₃ Ñe'₃ jniá₂, ján₃ bá₄ le₂jaun₂ 'nió₃ jniá₂ 'nia'₂; caun₂ jui₁i₂nio₄ bá₄ 'nia'₂ jui₅ a₂'nió₃ jniá₂ 'nia'₂. ¹⁰ Nē₁jua'₂ caun₂ né'₂ 'nia'₂ gau₂ 'éi'₃ quió'₃, le₂nē₅ tē₃'ñiá'₄ 'nia'₂ jui₅ a₂'nió₃ jniá₂ 'nia'₂, jui₁lia'₂ caun₂ nag₅ jniá₂ gau₂ 'éi'₃ quió'₅ Ñe'₃, ton'₂ tē₂'ñiá₄ jniá₂ jui₅ a₂'nio₃ 'éi'₂ jniá₂.

¹¹ 'Jág₁ nē₅ ma₂nē₂juíg₂ jniá₂ 'nia'₂ ia₁jaun₂ a₂ñí₄ lē₃ jéin₅ jniá₂ 'io'₂, cué₄ jniá₂ 'nia'₂, ia₁jaun₂ le₃'ñia₅ bá₄ a₂jén'₂ 'nia'₂ 'io'₂. ¹² A₂la₂ bá₄ 'éi'₃ quió'₃: a₂jme₁'nió'₄ 'nia'₂ ríng'₂ le₂jang'₂ le₂jang'₂, jui₁lia'₂ ma₂ca₂jme₁'nió₄ jniá₂ 'nia'₂. ¹³ 'I₁jan₂ tsá₃ lé₂ le₃'nio₃ gué₄ lín₃ riin'₅₄, lia'₂ con'₂ gué₄ i₂guein₅ 'mú₃ o₄quió'₄ a₂mei₅₄ quiáin₅. ¹⁴ 'Nia'₂ bá₄ lín'₅ dsa₂ a₂mei₅₄ quiáng₃ chi₂jua'₂ jmo'₂ 'nia'₂ 'e₂ te₂nei'₄ jniá₂. ¹⁵ Tsá₃ ma₃tē₅

^p8 'Nio'₂ ja₁ton₅ Isaías 61:3.

jniá₂ 'nia'₂ dsa₂ i₂jme₂ti₃ ne₃, ia₁ tsá₃ ŋi₅ jui₁lia'₂ jan₂ dsa₂ i₂jme₂ti₃ ta₁,
'e₂ a₂jmo₅ juig₅₄. Té₅ jniá₂ a₂mei₅₄ quiáng₃ bá₄ 'nia'₂, ia₁ ma₂ca₂jme₁jnia₅
bá₄ jniá₂ ja₁con'₂ 'nia'₂, ca₂le₃jé₃ 'e₂ a₂ma₂ca₂juá'₂ Ne'₃. ¹⁶ On₃jua'₅₄ 'nia'₂
ca₂quio'₅₄ jniá₂; jniá₂ bá₄ ma₂quion'₄ 'nia'₂, jaun₂ ma₂ca₂dsia₃ jniá₂ gog'₂
'nia'₂ a₂o₁nó'₅ 'nia'₂ a₂qui₂rau₂ 'lióng₂ quián'₂ 'nia'₂ a₂jio₃ ué₂. Jaun₂
le₂nē₅ cuē₃ Ne'₃ jniá₂ cué'₃ 'nia'₂ chi₂'e₂ caun₂ a₂mí'₁ 'nia'₂ lia'₂ con'₂ lé₅
'éi'₃ quió₃ jniá₂. ¹⁷ A₂la₂ bá₄ 'éi'₃ quió₃ jaun₂ né₃; a₂jme₁'nió'₄ 'nia'₂ ríng'₂
le₂jang'₂ le₂jang'₂.

'Iog₅₄ dsa₂ mi₂güí₃ 'ñiai₅₄ Jesús quian'₅₄ dsa₂ quiáin₅

¹⁸ Chi₂jua'₂ 'iog₅₄ dsa₂ mi₂güí₃ quián'₂ 'nia'₂, jui₁le₂ŋi'₅₄ 'nia'₂, jniá₂
bá₄ ca₂rē₃'iog₅₄ dsa₂ le₂'uig₅₄. ¹⁹ Jua'₅₄ mei'₂ gué₃ lín'₅ 'nia'₂ dsa₂ i₂tén₅
mi₂güí₃, jme₁jme₃'nio₃ bá₄ dsa₂ mi₂güí₃ jui₁lia'₂ 'nioi₃ dsa₂ quiáin₅. La₁
'uig₅₄ ia₁ a₂tsá₃ tén'₅ 'nia'₂ mi₂güí₃, ton'₂ ma₂quion'₄ jniá₂ 'nia'₂ jin₄
dsa₂ mi₂güí₃; 'uig₅₄ jaun₂ né₃, 'ñiai₅₄ 'nia'₂. ²⁰ Dsá₂ 'au'₂ 'nia'₂ jmo₄, jág₁
a₂ma₂juí₂ jniá₂ 'nia'₂: “Lia'₂ i₁jan₂ dsa₂ i₂jme₂ti₃ ta₁, tsá₃ juiin'₂ gué₄
con'₂ gué₄ juig₅₄”. Chi₂jua'₂ ma₂qui₂ca₂co₃'ein₃ dsa₂ jniá₂, ján₃ bá₄
le₂jaun₂ qui₃co₃'en₃ dsa₂ 'nia'₂; chi₂jua'₂ ma₂tón'₂ dsa₂ jui₅ jág₁
a₂ma₂ca₂jme₁tiin₅ jniá₂, ján₃ bá₄ le₂jaun₂ qui₃tón'₂ dsa₂ jui₅ jág₁ quián'₂
'nia'₂. ²¹ La₁ ca₂le₃jé₃ a₂nē₅ dsi₃ŋi'₂ 'nia'₂ qui₃co₃jmóg'₂ dsa₂ 'uig₅₄ quió₃
jniá₂, ia₁ tsá₃ cuiin₂₃ i₂ca₂chei₃ jniá₂.

²² Tsá₃ jme₁le₃cáin'₄ jua'₅₄ mei'₂ gué₃ tsá₃ guan₃ jniá₂ a₂o₂juá'₃ ja₁con₂
'éi₂; la₁ nē₃ né₃, tsá₃ ma₃'e₂ lé₂ le₃juá'₂ jua'₅₄ tsá₃ ŋi₅. ²³ Ia₁ jui₁lia'₂
i₂'iog₅₄ jniá₂, ján₃ bá₄ 'ñiai₅₄ Ne'₃ jniá₂. ²⁴ Tsá₃ jme₁le₃cáin'₄ jua'₅₄ mei'₂
tsá₃ léi₄ jaun₂ ca₂jmo₃ jniá₂ jin₄ dsa₂ 'éi₂ a₂tsá₃ 'ein₂ sián'₂ ma₂jmo₃;
la₁ia₁ o₁jñia'₅₄ la₂ ma₂ca₂jág₃ bá₄ léi₄ jaun₂, tion₅₄ bá₄ 'iog₅₄ dsa₂ jniá₂,
lia'₂ Ne'₃ né₃, 'ñiai₅₄. ²⁵ La₁ia₁ qui₂lé₂ ia₁jaun₂ le₃ti₃ jág₁ a₂tio'₅₄ ne₄ Si₂
'Éi'₃ quió'₅ a₂juá'₂: “Ca₂rē₃'iog₅₄ dsa₂ tē₃ tsá₃ 'e₂ cha₂ lē₃.”^q

²⁶ La₁ia₁ jē₁ma₂tē₂ rē₁jiá₃ i₂cuē₃ bí₂ 'au'₂ 'nia'₂, i₂tsin₅₄ jniá₂ ja₁con'₂
'nia'₂ i₂jiá₃ tē₂le₃ ja₁guá₄ Ne'₃: Jme₂dsí₂ tí₅ dsón'₂ i₂o₂'in₅ ja₁con₂ Ne'₃,
i₂'éi₂ bá₄ jáng'₃ jág₁ dsau₅ tē₂le₃ quió₃ jniá₂. ²⁷ Ján₃ bá₄ le₂jaun₂ 'nió'₅
jang'₅₄ 'nia'₂ jág₁ dsau₅, ia₁ ca₂le₃'uig₅₄ bá₄ ma₂qui₂ma₂tión'₂ 'nia'₂
quian'₅₄ jniá₂.

16 ¹ Le₂nē₅ juí₂ jniá₂ 'nia'₂ ia₁jaun₂ tsá₃ qui₃dsi₃uín'₂ 'nia'₂
a₂'éng'₂. ² Qui₃'uág'₂ dsa₂ 'uín'₂ 'nia'₂ ja₁lē₁tong'₂ ne₄ si₂ guá'₅
sinagoga, ca₂le₃jé₃ já₅ caun₂ jmi₄, lín₂ jui₁lia'₂ i₂jme₃dsiog₅ 'nia'₂,
a₂jén'₃ ta₁ jaun₂ quió'₅ ne₄ Diú₄. ³ Ca₂le₃jé₃ a₂nē₅ jmo₃' ia₁ tsá₃
ma₂ca₂rē₃cuiin₂₃ Ne'₃, on₃ gué'₂ jniá₂ ma₂ca₂rē₃cui₂₃. ⁴ Jaun₂ juí₂ jniá₂
'nia'₂ le₂nē₅ ia₁jaun₂ jē₁ma₂tē₂ rē₁tē₅₄ jmi₄ jaun₂, dsiog'₂ 'au'₂ 'nia'₂
a₂ca₂juí₂ jniá₂ 'nia'₂ jág₁ la₂.

^q25 Salmo 35:19; 69:4.

^r3 A₂lin₅₄ chog₅₄ si₂: “jmo₃ jmái'₂ 'nia'₂.”

Ta₁ a₂jmo₅ Jme₂dsí₂ Jñi₃ó₅

'Tsá₃ ca₂juá'₃ jniá'₂ le₂ně₅ lia'₂ con'₂ le₂'uig₅₄, ia₁ jme₁'en₅₄ bá₄ jniá'₂ quian'₅₄ 'nia'₂.⁵ La₁ia₁ ně₃ ně₃, ma₂nég'₄ i₁'ú₃ quiang'₅₄ i₂ca₂chei₃; jaun₂ lia'₂ 'i₁jan'₂ 'nia'₂ tsá₃ 'ein₂ ñag₅: “¿A₂já'₄ guang'₅₄?”⁶ La₁ qui₂ca₂tá'₂ qui'₂ 'au'₂ 'nia'₂ 'uig₅₄ ia₁ a₂ně₂juí'₂ jniá'₂ 'nia'₂ a₂ně₅.⁷ La₁ jág₁ dsau₅ bá₄ juí'₂ jniá'₂ 'nia'₂; tē₂le₃ a₂dse₃ quián'₂ 'nia'₂ bá₄ a₂né'₄ jniá'₂. Ia₁ ně₁lua'₂ tsá₃ ca₂ñá'₃ jniá'₂, tsá₃ jiá'₃ i₂cuē₃ bí₂ 'au'₂ 'nia'₂; la₁ia₁ chi₂lua'₂ né'₄ jniá'₂ ně₃, tsin₅₄ jniá'₂ 'éi₂ ja₁con'₂ 'nia'₂.⁸ Jē₁ma₂tē₂ rē₁jiá'₃ 'éi₂, jme₃ñiai₂₃ a₂rē₂gan₂ dsa₂ mi₂güí'₃ cuente quió'₅ dsáu₁, quió'₅ jui₅ dse₃, quió'₅ a₂jáu'₅ 'í₁ ja₁coin₂ ně₃.⁹ Cuente quió'₅ dsáu₁, 'uig₅₄ ia₁ a₂tsá₃ 'ein₂ le₃quió₃ jniá'₂; ¹⁰ cuente quió'₅ jui₅ dse₃, ia₁ a₂nég'₄ ja₁con₂ Ñe'₃, jaun₂ tsá₃ ma₃ñiá'₂ jag'₅₄ 'nia'₂; ¹¹ ján₃ bá₄ cuente quió'₅ a₂jáu'₅ 'í₁, ia₁ ma₂jáu'₅ 'í₁ ja₁con₂ i₂'éi₂ i₂gon₂ mi₂güí'₃ la₂.

¹² 'Lióng₂ bá₄ jág₁ cha₂ gué'₄ a₂juig₅₄ jniá'₂ 'nia'₂, la₁ia₁ tsá₃ qui'₅₄ 'nia'₂ jmig₄ le₃ñí'₂ jē₂ ně₃.¹³ La₁ jē₁ma₂tē₂ rē₁jiá'₃ Jme₂dsí₂ tí₅ dsón'₂, i₂'éi₂ bá₄ jiog₃ 'nia'₂ jui₅ a₂tí₅ jág₁; ia₁ tsá₃ a₂jaun₂ juá'₂ 'éi₂ o₄quió'₄ 'ñiog₅; a₂jaun₂ bá₄ juá'₂ ca₂le₃jé₃ a₂nag₃, ton'₂ 'é₂ jág₁ jui₁lia'₂ 'e₂ niog₅ lé₂.¹⁴ Jme₃juag'₂ 'éi₂ jniá'₂, ia₁ ñei₂ jui₁lia'₂ a₂lé₅ quió₃ jniá'₂, jaun₂ 'éi₂ ně₃, jmo₃ jág₁ ja₁con'₂ 'nia'₂.¹⁵ Ca₂le₃jé₃ a₂cha₂ quió'₅ Ñe'₃, ján₃ bá₄ lé₅ quió₃ jniá'₂; jaun₂ bá₄ lē₃ ně₂juá'₃ jniá'₂ a₂ñe₂ 'éi₂ jui₁lia'₂ a₂lé₅ quió₃ jniá'₂, jaun₂ jmo₃ jág₁ ja₁con'₂ 'nia'₂.

Jui₁lia'₂ a₂'lia'₂ dsí₅ dsa₂ le₃tsín₃ a₂lé₂ a₂qui₃jmo₃ 'io'₂

¹⁶ 'Ñi'₅₄ ta₁, tsá₃ ma₃jag'₅₄ gué'₄ 'nia'₂ jniá'₂; la₁ ñi'₅₄ ta₁ bá₄, jag'₅₄ táng₃ jniá'₂, ia₁ né'₄ jniá'₂ ja₁con₂ Ñe'₃.^s

¹⁷ Jaun₂ ně₃, qui₂ca₂ñag₃ i₂lín₅₄ chi'₂ dsi₂guia₃-tín₂ quiáin₅ ca₂ñí'₃ riin'₅₄ le₂jain₂ le₂jain₂:

—¿I₂'e₂ 'nio₃ juá'₂ a₂juá'₂ tság₅ jniog₄ le₂ně₅: “Ñi'₅₄ ta₁, tsá₃ ma₃jag'₅₄ gué'₄ 'nia'₂ jniá'₂; la₁ ñi'₅₄ ta₁ bá₄, jag'₅₄ táng₃ jniá'₂, ia₁ né'₄ jniá'₂ ja₁con₂ Ñe'₃”? ¹⁸ ¿I₂'e₂ 'nio₃ juá'₂: “Ñi'₅₄ ta₁”? Tsá₃ ne₄ i₂'e₂ jaun₂ 'ē₂₃.

¹⁹ Jaun₂ ca₂rē₃lí'₄ Jesús i₂'e₂ 'nio₃ ñag₃ tioen'₅₄, jaun₂ ca₂juá'₂:

—¿A₁qui₂ñi'₄ 'nia'₂ ríng'₂ 'uig₅₄ ia₁ a₂ně₂juá'₃ jniá'₂: “Ñi'₅₄ ta₁, tsá₃ ma₃jag'₅₄ gué'₄ 'nia'₂ jniá'₂; la₁ ñi'₅₄ ta₁ bá₄, jag'₅₄ táng₃ jniá'₂”?

²⁰ A₂dsi₂jó'₃ juí'₂ jniá'₂ 'nia'₂, a₂tóng'₂ 'nia'₂ qui₁'áu'₂, a₂'lia'₂ 'au'₂ ně₃, tē₁lia'₂ jmo₃ dsa₂ mi₂güí'₃ 'io'₂. La₁ia₁ le₃tsín₃ bá₄ a₂'lia'₂ 'au'₂ 'nia'₂ jaun₂ a₂qui₃jmo'₂ táng₃ 'io'₂.²¹ Jui₁lia'₂ lín₅ jan₂ 'io₅₄ jē₁rē₂chan₂ guein₂ quiáin₅, 'lia'₂ dsí₅ ia₁ ma₂ca₂tē₂ hora quió'₅; la₁ cang₂ jē₁ma₂ca₂rē₃chán₃ guein₂ quiáin₅, tsá₃ ma₃dsau'₂ dsí₅ a₂ca₂rē₃quí'₃ quió'₅, ia₁ a₂ñí'₄ lē₃ 'io'₂ jén'₅, ia₁ a₂ca₂rē₃chán₃ jan₂ guein₂ mi₂güí'₃ la₂.²² Jáñ₃ bá₄ le₂jaun₂ 'nia'₂ ně₃; 'lia'₂ 'au'₂ 'nia'₂ rē₂ně₃, la₁ jing₅₄ bá₄ táng₃ 'nia'₂, jaun₂ gué'₄ ně₃

^s16 A₂lín₅₄ chog₅₄ si₂ tsá₃ le₁ton₅ jág₁: “ia₁ né'₄ jniá'₂ ja₁con₂ Ñe'₃.”

jmó'₂ 'nia'₂ 'io'₂ tē₂'au'₂, a₂'lio'₂ jén'₂ 'nia'₂ jaun₂ ca₂lia'₂ 'i₁jan₂ tsá₃ 'ein₂ lé₂ le₃jñiá'₂.

²³ 'Jmīg₄ jaun₂ tsá₃ ma₃'e₂ qui₁nag'₁ 'nia'₂ jniá₂ 'i₁caun₂. A₂dsi₂jó'₃ juíg₂ jniá₂ 'nia'₂, chi₂jua'₂ 'e₂ a₂mi'₂ 'nia'₂ lia'₂ con'₂ lé₅ 'éi'₃ quió₃ jniá₂, cuē₃ bá₄ Nē'₃. ²⁴ Ca₂lia'₂ jñiό₄ jmīg₄ nē₃, tsá₃ 'e₂ ma₂mi'₅₄ 'nia'₂ 'i₁caun₂ lia'₂ con'₂ lé₅ 'éi'₃ quió₃. Mi₄ 'nia'₂, jaun₂ guéi'₁ 'nia'₂, ia₁jaun₂ le₃'ñia₅ a₂o₂'ñiό₃ o₂ñia₃ 'au'₂.

Jesucristo bá₄ ca₂tiό'₃ mi₂güí₃ la₂

²⁵ 'Jág₁ la₂ ma₂nē₂juíg₂ jniá₂ 'nia'₂ quian'₅₄ jág₁ a₂jáng'₅ léi₄. La₁ jiá₃ hora a₂tsá₃ ma₃juíg₅₄ jniá₂ 'nia'₂ quian'₅₄ jág₁ a₂jáng'₅ léi₄; lia'₂ rē₂jiá₃ jág₁ bá₄ juá'₄ jniá₂ juíg₅₄ 'nia'₂ a₂'íng₄ Nē'₃. ²⁶ Jmīg₄ jaun₂ mí'₁ 'nia'₂ ne₄ Nē'₃ lia'₂ con'₂ lé₅ 'éi'₃ quió₃ jniá₂. Tsá₃ ma₃tion₅₄ juá'₄ jniá₂ a₂mi₅₄ jniá₂ ne₄ Nē'₃ o₄quián'₂ 'nia'₂, ²⁷ ia₁ ñiog₅ bá₄ Nē'₃ 'nioi₃ 'nia'₂, ia₁ 'niόg'₃ 'nia'₂ jniá₂, ia₁ ma₂ca₂rē₃'én'₂ 'nia'₂ a₂guio₃ jniá₂ ja₁con₂ Diú₄. ²⁸ Ca₂o₃'ín₃ jniá₂ ja₁con₂ Nē'₃ a₂ca₂guang₃ mi₂güí₃ la₂; la₁ia₁ nē₃ nē₃ o₃'íng₅ mi₂güí₃ la₂, jaun₂ nég'₄ táng₃ ja₁con₂ Nē'₃.

²⁹ Jaun₂ ca₂juá'₂ chi'₂ dsi₂guia₃-tín₂ quiáin₅:

—Nē₃ gué₄ nē₃ juá'₂ 'ne₂ lia'₂ rē₂jiá₃ jág₁; on₃jua'₅₄ quian'₅₄ jág₁ a₂jáng'₅ léi₄. ³⁰ Nē₃ gué₄ nē₃ ma₂ne₄ jnia'₅₄ a₂ñi'₅₄ bá₄ 'ne₂ ca₂le₃jé₃, jaun₂ tsá₃ 'e₂ 'niό'₅ quiáng'₂ jua'₅₄ tsá₃ ñi'₅₄ 'e₂ qui₁nag₃ dsa₂ qui₃ñí'₃ 'ne₂. 'Uig₅₄ jaun₂ 'éin₂ jnia'₅₄ a₂ñe'₃ 'ne₂ ja₁con₂ Diú₄.

³¹ Jaun₂ ca₂ñag₃ Jesús:

—¿Dsón'₂ jua'₅₄, nē₃ gué₄ 'én'₂ 'nia'₂? ³² iJag₄ 'nia'₂! Ma₂ja₂quián₃ hora, ton'₂ tē₂nē₃ dsón'₂ bá₄, a₂cuíng'₂ 'nia'₂ lé₂, a₂o₁nog'₄ tsi₁rē₂jang'₅₄ le₂jang'₂ le₂jang'₂ o₁nog'₄ jma₃quén₅ quiáng'₂; jaun₂ téi'₄ 'nia'₂ jniá₂ tē₃tsing'₅₄ 'ñiό₃ lé₂. La₁ia₁ tsá₃ 'ñiό₃ jniá₂ tē₃tsing'₅₄, ia₁ quiong'₅₄ bá₄ Nē'₃ jniá₂. ³³ Juíg₂ jniá₂ 'nia'₂ le₃jé₃ a₂la₂, ia₁jaun₂ 'ag₃ tei₄ 'au'₂ 'nia'₂ le₃quiό₃ jniá₂. Mi₂güí₃ la₂ tion₅₄ rē₂ qui₁cán'₂ 'nia'₂ qui'₂ 'au'₂; la₁ia₁ tiá₂ dsia₄ 'nia'₂ 'au'₂, ia₁ ma₂ca₂tiό₃ bá₄ jniá₂ ja₁con₂ mi₂güí₃ la₂.

Ca₂chi₃lén'₂ Jesús Diú₄ Jmei₂ o₄quiό'₄ chi'₂ dsi₂guia₃-tín₂ quiáin₅

17 ¹ Jme₁ma₂ca₂juá'₂ Jesús le₂nē₅, ca₂chóg'₃ ne₅₄ guei'₅₄ i₂juíg₃, jaun₂ ca₂juá'₂:

—Tia₅₄, ma₂té₂ hora quió₃. Jme₁jnia₅ 'a₂ lia'₂ jlán'₁ ja₂ñí'₂, ia₁jaun₂ jme₃jnia₅ ja₂ñí'₂ 'a₂ lia'₂ jlán'₁ 'ne₂. ² Ia₁ ma₂ca₂cuē'₅₄ 'éi₂ 'éi'₃ ne₄ quiό'₅ ca₂le₃jín₃ dsa₂, ia₁jaun₂ jmo₃ a₂le₃chan₂ co₂tan₅₄ ca₂le₃jín₃ i₂ma₂cuin'₅₄. ³ A₂la₂ lé₅ a₂chan₂ dsa₂ co₂tan₅₄: a₂le₃cuin₅ dsa₂ 'ne₂ i₂lín'₅ i₂jan₂ tan₅₄ Diú₄ tē₃dsón'₂, a₂le₃cuin₂₃ Jesucristo nē₃ i₂ca₂chen'₂ 'ne₂.

⁴ 'Ma₂ca₂jme₁jnia₅ jniá₂ ne₄ gua'₅₄ 'uē₃ la₂ 'a₂ lia'₂ jlán'₁ 'ne₂, ia₁ ma₂ca₂jme₁'ñia₅ jniá₂ ta₁ a₂ca₂cuē'₅₄ jmo₅₄. ⁵ Nē₃ nē₃, jaun₂, Tia₅₄, jmo₄ jlán'₁ jniá₂ ja₁cong'₂, jui₁lia'₂ jme₁lín₄ jniá₂ ja₁cong'₂ lia'₂ con'₂ nē₃ gué₄ a₂nio₃ mi₂güí₃.

⁶ 'Ma₂ca₂jme₁jnia₅jniá₂ ne₄ dsa₂ i₂ca₂cuag'₅₄ jniá₂ jin₄ dsa₂ mi₂güí₃, i₂'ein₂ lín'₅ 'ne₂. I₂quiáng'₂ bá₄ jme₁lín₄, jaun₂ ma₂ca₂cuag'₅₄ jniá₂; ma₂qui₂ca₂'í₃ tē₂dsí₅ 'éi₂ jág₁ quiáng'₂. ⁷ Ma₂ca₂rē₃ñi₅ 'éi₂, ca₂le₃jé₃ a₂ca₂cuē'₅₄ jniá₂ já₅ ja₁con'₂ 'ne₂; ⁸ ia₁ ma₂ca₂cué₃ bá₄ jniá₂ jág₁ jaun₂ a₂ca₂cuē'₅₄ 'ne₂ jniá₂, jaun₂ ca₂gue₃ bá₄ 'éi₂ né₃. Ma₂ca₂rē₃ñi₅ lia'₂ con'₂ tí₅ jág₁, ja₁con'₂ 'ne₂ bá₄ o₂'ín₃ jniá₂, ton'₂ ca₂rē₃'éin₂ a₂ca₂chei'₂ 'ne₂ jniá₂.

⁹ 'O₄quió'₄ 'éi₂ bá₄ mi₅ jniá₂, on₃jua'₅₄ o₄quió'₄ dsa₂ mi₂güí₃. O₄quió'₄ dsa₂ i₂ca₂cuag'₅₄ bá₄ mi₅ jniá₂, ia₁ i₂quiáng'₂ 'ne₂ bá₄ 'éi₂. ¹⁰ Ia₁ ca₂le₃jín₃ dsa₂ quiáng₃, ján₃ bá₄ quiáng'₂ 'éi₂; ton'₂ ca₂le₃jín₃ dsa₂ quiáng'₂ né₃, i₂quiáng₃ bá₄ 'éi₂ ján₃, jaun₂ rē₂jniá₂ a₂jlán'₁ jniá₂ tē₂le₃ quian'₅₄ 'éi₂.

¹¹ 'Tsá₃ ma₃jan₄ jniá₂ mi₂güí₃ la₂; la₁ia₁ 'éi₂ né₃ tē₂'ñiá₄ mi₂güí₃, jaun₂ nég'₄ ja₁con'₂ 'ne₂. Tia₅₄ Jñi₅, jmo₄ 'í₁ 'éi₂ i₂ma₂cuag'₅₄ quian'₅₄ jui₅bí₂ a₂lín₃'₅,^t ia₁jaun₂ ca₂ne₅₄ bá₄ léin₂ co₂tan₅₄, jui₁lia'₂ lág₅ jniog₄.

¹² Lia'₂ con'₂ jme₁'en₅₄ jniá₂ quiang'₅₄ 'éi₂ mi₂güí₃ la₂,^u ma₂qui₂ma₂jmo₃ jniá₂ 'í₁ i₂ma₂cuag'₅₄ quian'₅₄ jui₅bí₂ a₂lín₃'₅.^v Ma₂qui₂ma₂jmo₃ jniá₂ 'í₁, jaun₂ lia'₂ 'i₁jan₂ 'éi₂ tsá₃ ca₂i₃cón'₅, jñia'₅₄ lia'₂ jan₂ bá₄ i₂'i₄ 'éi'₃ dsi₃'én₂, ia₁jaun₂ le₃ti₃ Si₂.

¹³ 'Nē₃ né₃, nég'₄ ja₁cong'₂; la₁ia₁ tē₂lia'₂ 'eng₅₄ gué₄ mi₂güí₃, juá'₅ jniá₂ jág₁ la₂ ia₁jaun₂ le₃'ñia₅ ja₁con₂ 'éi₂ a₂'io'₂ jéin₅ jniá₂. ¹⁴ Ma₂ca₂cué₃ bá₄ jniá₂ jág₁ quiáng'₂, la₁ia₁ dsa₂ mi₂güí₃ né₃, 'iog₅₄ quió'₅, ia₁ tsá₃ tén₅ 'éi₂ mi₂güí₃, jui₁lia'₂ jniá₂ né₃, tsá₃ téng₅ mi₂güí₃. ¹⁵ On₃jua'₅₄ rē₂ mi₅ jniá₂ jua'₅₄ a₂'uiin'₅₄ mi₂güí₃, a₂jaun₂ bá₄ mi₅ jniá₂ a₂jmo'₂ 'í₁ ia₁jaun₂ tsá₃ jo₃ i₂sē₃dsen₃. ¹⁶ Tsá₃ mi₂güí₃ téin₅, jui₁lia'₂ jniá₂ né₃, tsá₃ téng₅ mi₂güí₃. ¹⁷ Chon₄ dsa₂ 'éi₂ tē₂le₃ quian'₅₄ jág₁ tí₅; ia₁ jág₁ quiáng'₂ bá₄ lé₅ jág₁ tí₅. ¹⁸ Jui₁lia'₂ ca₂chei'₂ 'ne₂ jniá₂ jin₄ dsa₂ mi₂güí₃, ján₃ bá₄ le₂jaun₂ tsin₅₄ jniá₂ 'éi₂ jin₄ dsa₂ mi₂güí₃.^w ¹⁹ O₄quió'₄ 'éi₂ bá₄ tsón₄ jniá₂ 'ñio₃, ia₁jaun₂ ján₃ bá₄ le₂jaun₂ 'éi₂ né₃, lé₂ rē₂tsoin₅₄ le₃quió'₅ jág₁ tí₅.

²⁰ 'La₁ia₁ on₃jua'₅₄ jmá'₃ o₄quió'₄ 'éi₂ mi₅ jniá₂; ján₃ bá₄ le₂jio₅ o₄quió'₄ i₂le₃'én₂ le₃quió₃, tē₂le₃ quian'₅₄ jág₁ quió'₅,²¹ ia₁jaun₂ léin₂ ca₂ne₅₄ ca₂le₃jín₃, jui₁lia'₂ 'ne₂, Tia₅₄, 'eng'₅₄ ja₁con₂ jniá₂, ton'₂ 'en₅₄ gué'₂ jniá₂ ja₁con'₂ 'ne₂, ia₁jaun₂ 'éi₂ né₃, dsi₃toin'₅₄ ja₁con₂ jniog₄, ia₁jaun₂ qui₃le₃'én₂ dsa₂ mi₂güí₃ a₂ca₂chei'₂ jniá₂.²² Ma₂ca₂cué₃ jniá₂ 'éi₂ a₂jlá'₁ quió₃ a₂ca₂cuē'₅₄ 'ne₂ jniá₂, ia₁jaun₂ lén₂ 'éi₂ ca₂ne₅₄, jui₁lia'₂ lág₅ jniog₄ ca₂ne₅₄ ján₃.²³ Jniá₂ le₃quió'₅ 'éi₂, 'ne₂ gué'₂ le₃quió₃ jniá₂,

^t11 A₂lin₅₄ chog₅₄ si₂: “jmo₄ 'í₁ 'éi₂ quian'₅₄ jui₅bí₂ a₂lín₃'₅, a₂ma₂jmo'₅₄ a₂lín₅ jniá₂ ján₃.”
'Nio'₂ jaiton₅ Apéndice A.

^u12 A₂lin₅₄ chog₅₄ si₂ tsá₃ chi₁ton₅: “mi₂güí₃ la₂.”

^v12 A₂lin₅₄ chog₅₄ si₂: “ma₂qui₂ma₂jmo₃ jniá₂ 'í₁ quian'₅₄ jui₅bí₂ a₂lín₃'₅, a₂ma₂jmo'₅₄ a₂lín₅ jniá₂ ján₃.”

^w18 'Nio'₂ ja₁ton₅ Juan 20:21.

ia₁jaun₂ le₃'ña₅ 'éi₂ a₂léin₂ ca₂ne₅₄, ia₁jaun₂ le₃ñi₅ dsa₂ mi₂güí₃
a₂ca₂chei'₂ jniá₂, ton'₂ ca₂jme₁'nióg'₄ 'éi₂ jui₁lia'₂ ca₂jme₁'nióg'₄ jniá₂.
²⁴ Tia₅₄, 'nio₃ jniá₂ a₂dsi₃ton'₅₄ 'éi₂ i₂ca₂cuag'₅₄ ja₁cong₂, ia₁jaun₂ tē₃
ne₅₄ a₂jlá'₁ quió₃ a₂ca₂cuē'₅₄ 'ne₂, ia₁ ca₂jme₁'nió'₄ 'ne₂ jniá₂, né'₃ gué'₄
a₂nio₃ mi₂güí₃. ²⁵ Tia₅₄ i₂dsen₃ gué'₄ lin₃, tsá₃ cuín₅ dsa₂ mi₂güí₃ 'ne₂,
la₁ia₁ jniá₂ cuíng₅ 'ne₂, jaun₂ ma₂ñi₅ bá₄ dsa₂ la₂ quiáng'₂ a₂ca₂chei'₂ 'ne₂
jniá₂. ²⁶ Ma₂ca₂jme₁jnia₅ jniá₂ ja₁con₂ 'éi₂ 'ein₂ lín'₅ 'ne₂, jaun₂ caun₂
jme₁jnia₅ bá₄ jniá₂ 'ne₂, ia₁jaun₂ jui₁lia'₂ a₂'nióg'₃ 'ne₂ jniá₂ tē₃'ñiá₄
ja₁con₂ 'éi₂, ton'₂ 'ú₄ jniá₂ ja₁coin₂.

Ca₂ñja'₃ dsa₂ Jesús

(Mateo 26:47-56; Marcos 14:43-50; Lucas 22:47-53)

18 ¹ Jme₁ma₂ca₂dsan₃ juá'₂ Jesús le₂nē₅, ca₂o₃ 'ín₃ quiaín'₅₄ chi'₂
dsi₂guia₃-tín₂, qui₂ca₂'ain₃ Jí'₅₄ Jma₃ Cedrón. Le₂quióng₄
ja₁jaun₂, jme₁cha₂ caun₂ ja₁jme₁cha₂ ni₁'ma₂ 'ag₅ míg₂, ja₁ca₂'í₃ Jesús
quiaín'₅₄ chi'₂ dsi₂guia₃-tín₂ quiáin₅. ² Ján₃ bá₄ le₂jaun₂ Judas
i₂jme₁ma₂'en₅₄ jui₅ jáng'₂ quió'₅, jme₁ma₂cuí'₅ bá₄ ja₁jaun₂, ia₁ 'líong₂
ráun₂ ca₂ñi'₂ Jesús ja₁jaun₂ quiaín'₅₄ chi'₂ dsi₂guia₃-tín₂ quiáin₅. ³ Jaun₂
lē₃ ca₂dsióg₃ Judas ja₁jaun₂ quiaín'₅₄ co₂nió'₃ 'lióg₂, quiaín'₅₄ co₂nió'₃
gué'₂ chi'₂ 'i'₅₄ quián₅ guá'₅, i₂chen₄ quián₅ jui₅g₅₄ jme₂dsa₂ quian'₅₄ dsa₂
fariseos né₃. Ca₂dsi₃lén₂ dsa₂ 'éi₂ qui₂le₁quian₅ ñi₁tág₂, ni₁'ma₂, quian'₅₄
si₂ ni₁tsí₅, ni₁qui₂ a₂le₁guí'₃ si₂ né₃. ⁴ La₁ia₁ Jesús né₃, jme₁ma₂ñi₅ bá₄
ca₂le₃jé₃ 'e₂ a₂dsi₃ñí₂, jaun₂ o₂'ín₃ ja₁jaun₂ ca₂i₁jme₁jeín'₂ dsa₂, jaun₂
ca₂ñí'₃ dsa₂ 'éi₂:

—¿I₂'ein₂ 'nag'₂ 'nia'₂?

⁵ Jaun₂ ca₂ñag₃ dsa₂ 'éi₂:

—Jesús i₂chan₂ Nazaret bá₄ 'nia'₂ jnia'₅₄.

Jaun₂ ca₂ñag₃ Jesús:

—Jniá₂ bá₄ 'éi₂.

Jaun₂ bá₄ jme₁chén'₄ Judas i₂jáng'₂ quió'₅, quiaín'₅₄ dsa₂ 'éi₂.

⁶ Jaun₂ jme₁ca₂juá'₂ Jesús ca₂tsí'₃ dsa₂: “Jniá₂ bá₄ 'éi₂”, jaun₂ i₃léin₂
le₃ca'₃ i₃gain'₅₄ 'uē₃.

⁷ Jaun₂ né₃ ca₂ñag₃ táng₃ Jesús ca₂ñí'₃ dsa₂ 'éi₂:

—¿I₂'ein₂ 'nag'₂ 'nia'₂?

Jaun₂ ca₂ñag₃ táng₃ dsa₂:

—Jesús i₂chan₂ Nazaret bá₄.

⁸ Jaun₂ ca₂ñag₃ táng₃ Jesús:

—Ma₂nē₂juí₂ jniá₂ 'nia'₂, jniá₂ bá₄ líng₅ 'éi₂.^x Chi₂jua'₂ jniá₂ 'nau'₂
'nia'₂, cuē₄ jmíg₄ jui₁dsi₂len₅ bá₄ i₂la₂.

⁹ A₂la₂ ca₂lē₃ ia₁jaun₂ le₃ti₃ lia'₂ con'₂ lé₅ a₂jme₁ca₂juá'₂ Jesús tsí'₅
Jmei₂: “Jui₁lia'₂ i₂ca₂cuag'₅₄ 'ne₂ jniá₂, tsá₃ 'ein₂ ca₂i₃cón'₅ 'i₁jan₂.”

^x5,6,8 lit. “Jniá₂ líng₅”, co₂'nió'₄ jeín₅ jág₁ lia'₂ chen₂ Jehová. 'Nio'₂ ja₁ton₅ Éxodo 3:14.

¹⁰ Jaun₂ né₃ jme₁quian₅ Si₂mu₅₄ Pe₄ ŋi₁tág₂, jaun₂ ca₂dsí₃ ca₂quí₃ rē₂gua₄ ne₁ quió'₅ jan₂ dsa₂ i₂jme₁chen₂ Malco, i₂jme₂ti₃ ta₁ ne₄ jme₂dsa₂ dsen₅₄.

¹¹ La₁ ca₂juá'₂ Jesús ca₂tsí'₃ Pe₄:
—Tio'₂ táng₃ ŋi₁tág₂ ja₁jme₁'i₄. ¿'E₂ lín'₂ 'ne₂ a₂tsá₃ ca₂tín₂ jniá₂ dsi₃ŋíg₂ a₂ma₂juá'₂ Ne'₃?^y

Ŋó₃ Jesús ne₄ jme₂dsa₂ dsen₅₄

(Mateo 26:57-58; Marcos 14:53-54; Lucas 22:54)

¹² Jaun₂ né₃ ca₂ŋau'₃ co₂nió'₃ 'lióg₂ lia'₂ jma₃quian'₅₄ juig₅₄, quian'₅₄ chi'₂ 'i'₅₄ quián₅ guá'₅ né₃, ca₂ŋai'₃ Jesús, jaun₂ qui₂ca₂'nei'₂ né₃.

¹³ Jaun₂ ca₂i₁jio₃ le₂'uig₅₄ ja₁quió'₄ Anás. Anás 'éi₂ né₃ jme₁lín₄ dsi₂jmei₂ Caifás, i₂jme₁lín₄ ta₁ jme₂dsa₂ dsen₅₄ ŋi₂ jaun₂.

¹⁴ Caifás 'éi₂ né₃ i₂jme₁ca₂juá'₂ ca₂tsí'₃ dsa₂ judíos, a₂jmo₅ jón₂ jan₂ dsa₂ o₄quió'₄ dsa₂ juig₂.^z

Tsá₃ ca₂tion₃ Pe₄ a₂cuiin₂₃ Jesús

(Mateo 26:69-70; Marcos 14:66-68; Lucas 22:55-57)

¹⁵ Jaun₂ ca₂ŋó₃ Si₂mu₅₄ Pe₄ quian'₅₄ gué₄ jan₂ dsa₂ i₂guia₃-tín₂ sián'₂ né₃, chi₁co'₅₄ quió'₅ Jesús. Dsa₂ guia₃-tín₂ jan₂ 'éi₂ né₃ jme₁cui₅ bá₄ jme₂dsa₂ dsen₅₄ quió'₅, jaun₂ bá₄ ca₂'í₃ co₂lě₅ quian'₅₄ Jesús i₁dsi₅ quió'₅ jme₂dsa₂ dsen₅₄. ¹⁶ La₁ Pe₄ né₃, jaun₂ bá₄ ca₂nau₂ o₄'né₄ tē₂le₃ ca₁'né₄. 'Uig₅₄ jaun₂ ca₂o₃'ín₃ dsa₂ guia₃-tín₂ i₂ma₂cui₅ jme₂dsa₂ dsen₅₄ quió'₅, jaun₂ ca₂juá'₂ ca₂tsí'₃ 'io₅₄ i₂niog₅ ne₄ o₄'né₄, jaun₂ ca₂ŋí₂ Pe₄ tē₂le₃ dsi₂néi₂.

¹⁷ Jaun₂ né₃ ca₂ŋag₃ 'io₅₄ i₂jmo₅ 'í₁ o₄'né₄ ca₂ŋí'₃ Pe₄:

—On₃jua'₅₄ 'ne₂ líng'₅ jan₂ i₂ca₂rē₃tín₃ quián₅ dsa₂ nē₅, ¿lia'₅₄?

Jaun₂ ca₂juá'₂:

—Jan₂'ón₄, on₃jua'₅₄ jniá₂ 'éi₂.

¹⁸ Ja₁jaun₂ jme₁tión₂ dsa₂ i₂jme₂ti₃ ta₁, quian'₅₄ chi'₂ 'i'₅₄ quián₅ guá'₅. Jme₁ma₂ca₂dsia₃ ca₂jo'₅₄ si₂, ia₁ a₂jme₁güí₂, jaun₂ tióin₂ qui₂jme₂dsioin'₂. Ján₃ bá₄ jē₄ jaun₂ jme₁chén'₄ Pe₄ jme₂dsioin'₂.

Chén'₅ Jesús ne₄ jme₂dsa₂ dsen₅₄

(Mateo 26:59-66; Marcos 14:55-64; Lucas 22:66-71)

¹⁹ Jaun₂ ca₂ŋag₃ jme₂dsa₂ dsen₅₄ ca₂ŋí'₃ Jesús cuente quió'₅ chi'₂ dsi₂guia₃-tín₂ quián₅, cuente quió'₅ jui₁lia'₂ jág₁ a₂jme₂tag₂₃ né₃.

²⁰ Jaun₂ ca₂ŋag₃ Jesús:

—Ma₂qui₂ma₂juá'₃ bá₄ jniá₂ lia'₂ rē₂jiá₃ jág₁ tē₃ne₄ ca₂le₃jín₃ dsa₂; jme₁qui₂jme₁tín₂ jniá₂ tián₂ dsa₂ dsi₂néi₂ guá'₅ sinagoga quian'₅₄ i₁dsi₅

^y11 lit. “¿'E₂ lín'₂ 'ne₂ a₂tsá₃ gui'₅₄ jniá₂ tion₅₄ jmi₂g₂ dsi'₃ a₂ma₂cuē₃ Ne'₃?”

^z14 Juan 11:50.

guá'₅ templo né'₃, ja₁qui₂ni'₂ ca₂le₃jín₃ dsa₂ judíos. Tsá'₃ 'e₂ jág₁ ma₂juá'₃ jniá'₂ 'i₁caun₂ tē₃ chi₁'ma₁. ²¹ ¿'E₂ 'uig₅₄ ñag'₅₄ 'ne₂ jniá'₂ jaun₂? Nĩ'₅₄ jui₁lia'₂ dsa₂ i₂qui₂ma₂nág₂ jág₁ quió'₃, 'e₂ ma₂juíg₂ jniá'₂. Jag₄ de'₂, i₂ni₅ bá'₄ 'éi₂ jui₁lia'₂ i₂'e₂ jág₁ a₂ma₂juá'₃ jniá'₂.

²² Jme₁ca₂juá'₂ Jesús le₂nē₅, jan₂ chi'₂ 'i'₅₄ quián₅ guá'₅ i₂jme₁chén'₄ cau₅, ca₂quein₃ dsi₂ne₄ Jesús, jaun₂ ca₂juá'₂:

—¿Le₁nē₅ bá'₄ ñag'₅₄ 'ne₂ ne₄ jme₂dsa₂ dsen₅₄?

²³ Jaun₂ ca₂ñag₃ Jesús:

—Chi₂jua'₂ 'lig'₅₄ nē₂juá'₃ jniá'₂, jua'₅₄, jme₁jnia₅ chi₂jua'₂ já'₄ ca₂'lian'₂ jniá'₂ jaun₂. La₁ chi₂jua'₂ dsau₅ bá'₄ jág₁ a₂nē₂juá'₃, ¿'e₂ guē'₂ lē₃ quein'₂ quió'₃?

²⁴ Jaun₂ né'₃ ca₂chei₃ Anás ca₂chein₃ Jesús chi₁'ñei'₅₄ ne₄ Caifás, i₂lín₅ jme₂dsa₂ dsen₅₄.

Con'₂ siá'₂ táng₃ tsá'₃ ca₂tion₃ Pe₄ a₂cuin₂₃ Jesús

(Mateo 26:71-75; Marcos 14:69-72; Lucas 22:58-62)

²⁵ Tē₁lia'₂ jaun₂ né'₃, jaun₂ bá'₄ chén'₅ Pe₄ jme₂dsioin'₂ cau₅ si₂, jaun₂ ca₂ñag₃ dsa₂ ca₂ñí'₃ Pe₄:

—¿On₁jua'₅₄ 'ne₂ líng'₅ jan₂ i₂ca₂rē₃tín₃ quián₅ dsa₂ nē₅?

Tsá'₃ ca₂tion₃ Pe₄ jaun₂, ca₂juá'₂:

—Jan₂'ón₄. On₃jua'₅₄ jniá'₂ 'éi₂.

²⁶ Jaun₂ né'₃ ca₂ñag₃ jan₂ i₂jme₂ti₃ ta₁ ne₄ jme₂dsa₂ dsen₅₄, i₂lín₅ jan₂ o₁rín'₅₄ dsa₂ i₂ca₂quí'₃ Pe₄ rē₂gua₄, ca₂juá'₂:

—¿Tsa₁ nē₂jín₄ jniá'₂ 'ne₂ ja₁cha₂ ni₁'ma₂ jaun₂, co₂lē₅ quian'₅₄ 'éi₂?

²⁷ Jaun₂ con'₂ siá'₂ táng₃ tsá'₃ ca₂tion₃ Pe₄ a₂cuin₂₃ Jesús. Jaun₂ lia'₂ ma₂tē₂dsi₅₄ jaun₂, ca₂'o₃ tē₁guí'₄ dsó₂.

Chén'₅ Jesús ne₄ Dsi₄má'₂ Pilato

(Mateo 27:1-2, 11-14; Marcos 15:1-5; Lucas 23:1-5)

²⁸ Jaun₂ né'₃ ca₂dsen₅ dsa₂ Jesús ja₁quió'₄ Caifás ca₂i₁jio₃g₃ tē₂ ne₄ta₁ quió'₅ dsi₄má'₂. Jme₁ma₂jnia₃ mi₂güí₃g₃, jaun₂ tsá'₃ ca₂tón'₂ dsa₂ judíos dsi₂néi₂ ne₄ta₁ quió'₅ dsi₄má'₂, ia₁jaun₂ tsá'₃ le₃'iog₅ quió'₅, ia₁'nio₃ jme₁gué'₃ má₃ quió'₅ Jmíg₄ Tē₂'in₅₄.

²⁹ 'Uig₅₄ jaun₂ né'₃ ca₂o₃'ín₃ Pilato 'ñiog₅ ja₁tion'₅₄ 'éi₂, jaun₂ ca₂juá'₂:

—¿'E₂ dso₄ bon'₄ 'nia'₂ dsa₂ la₂?

³⁰ Jaun₂ ca₂ñag₃ dsa₂:

—Jua'₅₄ mei'₂ gué'₃ tsá'₃ rin₅ dsa₂ nē₅ dso₄, tsá'₃ o₄gog'₂ 'ne₂ jme₁jñin'₅₄ jnia'₅₄.

³¹ Jaun₂ né'₃ ca₂juá'₂ Pilato ca₂tsí'₃ dsa₂:

—Te₅₄ 'nia'₂ jaun₂, qui₂dsi₅ 'nia'₂ 'éi'₃ quió'₅ lia'₂ con'₂ lē₅ 'Éi'₃ quián'₂ 'nia'₂ guiong'₅₄.

Jaun₂ ca₂ñag₃ dsa₂ judíos:

—La₁ia₁ tsá'₃ 'i₄ 'éi'₃ a₂jñí'₄ jnia'₅₄ jan₂ dsa₂.

- ³² Le₂ně₅ ca₂rě₃ti₃ jág₁ a₂ca₂juá'₂ Jesús 'e₂ ne₅₄ 'mú₃ a₂dsi₃ñí₂.
³³ Jaun₂ ca₂í₃ táng₃ Pilato tē₂le₃ dsi₂néi₂ ne₄ta₁ quió'₅, jaun₂ ca₂tē'₃
 Jesús jaun₂ ca₂ñí'₃ 'éi₂:
 —¿Lín'₅ 'ne₂ Rag₅₄ quián₅ dsa₂ judíos?
³⁴ Jaun₂ ca₂ñag₃ Jesús:
 —¿A₂ñag'₅₄ 'a₂ con'₂ dsi₂jio₅ 'au'₂ 'ñiag'₂ a₂juá'₂ ně₅, o₃ chan₂ i₂sián'₂
 a₂ma₂juá'₂ 'ag₂₃ jniá'₂?
³⁵ Jaun₂ ca₂ñag₃ Pilato:
 —¿O₃ bá₄ dsa₂ judío lín₅ jniá'₂? Dsa₂ juig₂ quiáng'₂, quian'₅₄ juig₅₄
 jme₂dsa₂ bá₄ ně₂jáng'₂ quiáng'₂ o₄gu₃ jniá'₂. ¿'E₂ ma₂jmo'₅₄?
³⁶ Jaun₂ ně₃ ca₂ñag₃ Jesús:
 —On₃jua'₅₄ mi₂güí₃ la₂ ja₁gon₂ jniá'₂. Jua'₅₄ mei'₂ gué₃ mi₂güí₃ la₂
 ja₁gon₂ jniá'₂, jme₁náu₃ 'nei₂ bá₄ dsa₂ i₂quiong'₅₄ jniá'₂ ia₁jaun₂ tsá₃
 jme₁jáng'₂ dsa₂ ne₄ dsa₂ judíos. La₁ on₃jua'₅₄ ja₁lá₃ ja₁gon₂ jniá'₂.
³⁷ Jaun₂ ně₃ ca₂juá'₂ Pilato ca₂tsí'₃ Jesús:
 —¿Dsón'₂ bá₄ lín'₅ 'ne₂ rag₅₄ jaun₂ ně₃?
 Jaun₂ ca₂ñag₃ Jesús:
 —Dsau₅ bá₄ juá'₂ 'ne₂, a₂lín₅ jniá'₂ rag₅₄. Ta₁ jaun₂ ca₂rě₃cháng₃, ta₁
 jaun₂ guang₃ mi₂güí₃, ia₁jaun₂ jáng'₄ jág₁ dsau₅ o₄quió'₄ jág₁ tí₅.
 Ca₂le₃jín₃ i₂tión₂ le₃quió'₅ jág₁ tí₅, nag₂₃ jág₁ quió₃.
³⁸ Jaun₂ ca₂juá'₂ Pilato ca₂tsí'₃ Jesús:
 —¿I₂'e₂ jaun₂ jág₁ tí₅?

Ca₂o₃'ág₃ 'éi'₃ a₂jón₂ Jesús

(Mateo 27:15-31; Marcos 15:6-20; Lucas 23:13-25)

- Jme₁ca₂dsan₃ juá'₂ Pilato le₂ně₅, ca₂o₃'íin₃ táng₃, ca₂dsia₃ táng₃ jág₁
 quian'₅₄ dsa₂ judíos. Jaun₂ ca₂juá'₂:
 —Tsá₃ dso₄ dso'₂ jniá'₂ ja₁con₂ dsa₂ la₂. ³⁹ La₁ chí'₅ caun₂ tag₄ quián'₂
 'nia'₂ a₂tén₅ jniá'₂ jan₂ dsa₂ ja₁con'₂ 'nia'₂ jme₁tē₅ Jmíg₄ Tē₂'in₅₄. ¿'Niog'₂
 'nia'₂ jaun₂ a₂tén₄ jniá'₂ Rag₅₄ quián₅ dsa₂ judíos?
⁴⁰ Jaun₂ ně₃, ca₂tóin'₂ co₂mi'₅₄ ca₂juá'₂:
 —iOn₃jua'₅₄ i₂ně₅! iBarrabás bá₄ tén₃!
 Barrabás 'éi₂ ně₃, jme₁lín₄ jan₂ dsa₂ 'ang₂ i₂ca₂nau₂ 'nei₂.^a
19 ¹ Jaun₂ ně₃ ca₂jmo₃ Pilato 'éi'₃ a₂ca₂i₁ban₅ dsa₂ Jesús quian'₅₄
 tsi₁'nei₅₄ a₂co₂taun₅. ² Jaun₂ ca₂jmo₃ 'lióg₂ caun₂ ni₁tsag₂
 corona a₂lé₅ jméi₁ ni₁uিং₂ taun₅, jaun₂ ca₂tó'₂ mi₂dsi₄ Jesús. Jaun₂
 ca₂quen'₃ dsa₂ Jesús caun₂ tsi₁'mi'₂ chen'₅₄ a₂jniá'₂ 'ui'₃ guéin₂. ³ Jaun₂
 ně₃ qui₂ca₂jme₃quiáin₃ ja₁con₂ 'éi₂, a₂juá'₂:
 —iSian'₃ 'ne₂, Rag₅₄ quián₅ dsa₂ judíos!
 Jaun₂ qui₂ca₂quein₃ dsi₂ne₄ Jesús.
⁴ Jaun₂ ně₃ o₂'ín₃ táng₃ Pilato, jaun₂ ca₂juá'₂ ca₂tsí'₃ dsa₂:

^a40 'Nio'₂ ja₁ton₅ Marcos 15:7.

—Nei₂ 'nia'₂, dséin₄ jniá₂ ja₁lá₃ le₃ja₁con'₂ 'nia'₂, ia₁jaun₂ le₃len'₅₄ 'nia'₂ ca₂lia'₂ 'i₁caun₂ dso₄ tsá₃ dso'₂ jniá₂ ja₁coin₂.

⁵ Jaun₂ o₂'ín₃ Jesús, 'i₄ dsi₅₄ corona lé₅ ni₁uing₂ taun₅, ján₃ bá₄ qui'₂ tsi₁'mí'₂ chen'₅₄ 'ui'₃ jaun₂. Jaun₂ né₃ ca₂juá'₂ Pilato ca₂tsí'₃ dsa₂:

—iJin₄ 'nia'₂ dsa₂!

⁶ Jaun₂ jme₁qui₂ca₂jág₂ juig₅₄ jme₂dsa₂ quian'₅₄ chi'₂ 'i'₅₄ quián₅ guá'₅ né₃, jaun₂ ca₂jme₃lióg₃ qui₂ca₂tóin'₂ co₂mí'₅₄, ca₂juá'₂:

—iTióin₃ cróg₄! iTióin₃ cróg₄!

Jaun₂ ca₂juá'₂ Pilato:

—Te₅₄ 'nia'₂ jaun₂, tióin₃ 'nia'₂ cróg₄ guiong'₅₄, ia₁ jniá₂ né₃, 'i₁caun₂ dso₄ tsá₃ dso'₂ jniá₂ ja₁coin₂.

⁷ La₁ia₁ ca₂ηag₃ dsa₂ judíos:

—Ron₅ caun₂ 'éi'₃ quián₂ jnia'₅₄, jaun₂ lia'₂ con'₂ lé₅ juá'₂ 'éi'₃ jaun₂, a₂'nió'₅ jóin₂ bá₄; ia₁ a₂jmo₂₃ a₂lín₅ Ja₁ηi'₅₄ Diú₄.

⁸ Jme₁ca₂nág₂ Pilato jág₁ ně₅, 'ηio₅ lín₃ gué₄ ca₂i₃gó'₃ dsí₅. ⁹ Jaun₂ ca₂'í₃ táng₃ tē₂le₃ dsi₂néi₂ ne₄ta₁ quió'₅, jaun₂ ca₂ηag₃ ca₂ηí'₃ Jesús:

—¿A₂já'₄ chan'₂ 'ne₂?

La₁ tsá₃ 'e₂ ca₂ηag₃ Jesús, 'i₁caun₂. ¹⁰ Jaun₂ né₃, ca₂juá'₂ Pilato:

—¿Tsa₁ ηag'₅₄ 'ne₂ jág₁ quió₃ jniá₂? ¿Tsa₁ ηi'₅₄ 'ne₂ jaun₂ a₂'o₂ jniá₂ jui₅bí₂ a₂jmo₅₄ 'éi'₃ a₂tion₃ dsa₂ cróg₄ 'ne₂, ján₃ bá₄ le₂jaun₂ gué'₂ ján₃, a₂'o₂ jniá₂ jui₅bí₂ a₂long₅₄ 'ne₂?

¹¹ Jaun₂ ca₂ηag₃ Jesús:

—Ca₂lia'₂ 'i₁caun₂ jui₅bí₂ tsá₃ 'au'₂ 'ne₂ ja₁con₂ jniá₂, jua'₅₄ tsá₃ Diú₄ ca₂cuē₃. 'Uig₅₄ jaun₂, jui₁lia'₂ i₂nē₂jáng'₂ jniá₂ ne'₅₄ 'ne₂, 'ηio₅ lín₃ gué₄ juē'₂ dso₄ rē₂cáin'₄ con'₂ gué₄ 'ne₂.

¹² Ca₂le₃ jaun₂ ca₂'náu'₃ dsí₅ Pilato 'a₂ lia'₂ cuin₅ jmig₄ a₂jme₁lióin₂ Jesús; la₁ dsa₂ judíos né₃ qui₂ca₂tóin'₂ co₂mí'₅₄ ca₂juá'₂:

—iNē₁jua'₂ ca₂lioin'₅₄, tsá₃ líng'₅ a₂mei₅₄ quián₅ dsi₂tan₅₄ emperador! iIa₁ nē₁jua'₂ 'ein₂ jmo₅ lín₅ rag₅₄, lín₅ jan₂ dsa₂ i₂'ηia₅₄ emperador!

¹³ Jaun₂ né₃ jme₁ca₂nág₂ Pilato jág₁ jaun₂, ca₂dsein₂₃ Jesús. Jaun₂ ca₂guá₂ ne₄ta₁ ja₁qui₂dsi₂₃ 'éi'₃; ja₁jaun₂ ja₁chei₂ Gabata quian'₅₄ jág₁ jmei₅ hebreo, co₂'nió'₄ a₂juá'₂, ja₁lé₄ 'uē₃ cang₄. ¹⁴ Jme₁lé₄ jmig₄ a₂jmo₅ dsa₂ co₂jñia₅₄ Jmig₄ Tē₂'in₅₄; jme₁ma₂tē₂ con'₂ dsi₂ηí'₃; jaun₂ ca₂juá'₂ Pilato ca₂tsí'₃ dsa₂ judíos:

—iJin₄ 'nia'₂ rag₅₄ quiáng'₂!

¹⁵ La₁ ca₂tóin'₂ co₂mí'₅₄ ca₂juá'₂:

—iCau₅ jñiai'₃! iCau₅ jñiai'₃! iTióin₃ cróg₄!

Jaun₂ ca₂juá'₂ Pilato:

—¿A₁'niog'₂ 'nia'₂ tóng₄ cróg₄ rag₅₄ quián'₂ 'nia'₂?

La₁ qui₂ca₂ηag₃ juig₅₄ jme₂dsa₂ ca₂juá'₂:

—Tsá₃ rag₅₄ sián'₂ chan₂ quián₂ jnia'₅₄, jñia'₅₄ lia'₂ jan₂ emperador bá₄.

¹⁶ Jaun₂ bá₄ ca₂jáng'₂ Pilato ca₂jín'₂ Jesús ia₁jaun₂ tio₃ dsa₂ ne₄ cróg₄.
Jaun₂ ca₂tág₃ dsa₂.

Ca₂tion₃ dsa₂ cróg₄ Jesús

(Mateo 27:32-44; Marcos 15:21-32; Lucas 23:26-43)

¹⁷ O₂'ín₃ Jesús jaun₂, quian₅ cróg₄ quió'₅, a₂ñó₃ jui₅ ja₁té'₂ dsa₂
Dsi₂con'₂ Ni₁mu₅ Mi₂dsi₄ 'Lag₄. Quian'₅₄ jág₁ jmei₅ arameo guë'₂, chei₂
Gólgota. ¹⁸ Ja₁jaun₂ ca₂tion₃ dsa₂ ne₄ cróg₄, ján₃ bá₄ ca₂tion₃ guë'₄ dsa₂
on₃ dsa₂ sián'₂ co₂lë₅ quian'₅₄ Jesús, jma₃jan₂ lia'₂ ca₂ton₂ quió'₅; 'ñiog₅
guë'₂ Jesús të₁toin₅₄ dsi₂jo₂.

¹⁹ Jaun₂ ca₂tióng₃ Pilato letras dsi₄ cróg₄ co₂'nió'₄ a₂juá'₂: “JESÚS
CHAN₂ NAZARET, RAG₅₄ QUIÁN₅ DSA₂ JUDÍOS.”

²⁰ Jaun₂ juin₅ dsa₂ judíos ca₂'í₂ letras jaun₂, ia₁ ma₂quián₅ chei'₅₄ juig₂
ciudad bá₄ ja₁ca₂tion₃ dsa₂ cróg₄ Jesús jaun₂. Jme₁chi₁ton₅ letras jaun₂
quian'₅₄ jág₁ jmei₅ hebreo, griego, quian'₅₄ jág₁ jmei₅ latín né₃. ²¹ 'Uig₅₄
jaun₂, ca₂juá'₂ juig₅₄ jme₂dsa₂ quian'₅₄ dsa₂ judíos, ca₂tsí'₃ Pilato:

—Tsá₃ lë₁taun₂ “Rag₅₄ quián₅ dsa₂ judíos”; ja₂lín₃ guë'₄ dse₃
taun'₅₄ “I₂juá'₂ a₂lín₅ Rag₅₄ quián₅ dsa₂ judíos.”

²² La₁ ca₂ñag₃ Pilato:

—Jui₁lia'₂ a₂ma₂në₂táun₂ jniá₂, co₂në₅ ma₂në₂táun₂.

²³ Jme₁ma₂ca₂lë₃ tion₅ 'lióg₂ Jesús ne₄ cróg₄, jaun₂ ca₂can₃ tsi₁'mí'₂
quió'₅ Jesús, jaun₂ ca₂jmo₃ quén₂ dso'₅₄, jma₃jan₂ 'lióg₂ lia'₂ ca₂dso'₅₄.
Ján₃ bá₄ le₂jaun₂ ca₂can₃ ni₁tsin'₅₄ Jesús. La₁ ni₁tsin'₅₄ né₃, tsá₃
jme₁rë₂'me₅; jme₁lé₄ caun₂ 'mí'₂ con'₂ lé₅ ca₂ta₃ dsa₂, ta₁caun₂.

²⁴ Jaun₂ ca₂juá'₂ 'lióg₂ ca₂tsí'₃ riin'₅₄:

—Co₂ñei'₅₄ tió'₅ tsá₃ guéi₃. Në₃ i₁cáu₂ co₂ñei'₅₄ dsí₂ suerte, o₁ne₄ 'ein₂
tín₅₄.

Jaun₂ le₂në₅ ca₂rë₃ti₃ jág₁ a₂rë₂ton₅ ne₄ Si₂ a₂juá'₂:

Qui₂ca₂dsión'₂ dsa₂ tsín'₅ jniá₂ quian'₅₄ riin'₅₄,

ca₂co₃ ca₂dsi₂ suerte o₁ne₄ 'ein₂ tín₅₄.^b

Le₂në₅ bá₄ ca₂jmo₃ 'lióg₂ 'éi₂ tioin'₅₄.

²⁵ La₁ chog₅₄ Jesús né₃, jaun₂ bá₄ jme₁chéin'₄ cau₅ cróg₄, lia'₂
jma₃quian'₅₄ 'io₅₄ riin'₅₄, quian'₅₄ María quián₅ Cleofas, quian'₅₄ María
chan₂ Magdala né₃. ²⁶ Jme₁ca₂jín₂ Jesús chog₅₄, quian'₅₄ chi'₂ dsi₂guia₃-
tín₂ i₂ñí₄ lë₃ jme₁'nioi₃ 'éi₂, chéin'₅ cau₅, jaun₂ ca₂juá'₂ ca₂tsí'₃ chog₅₄:

—'Io₅₄, në₅ chén'₅ ja₂ñí'₂.

²⁷ Jaun₂ guë'₄ ca₂juá'₂ ca₂tsí'₃ dsi₂guia₃-tín₂ 'éi₂:

—Në₅ chén'₅ chog'₂.

Ca₂le₃ jmig₄ jaun₂, ca₂guei₃ chi'₂ dsi₂guia₃-tín₂ 'éi₂ ca₂guein₃ María
dsi₂néi₂ quió'₅.

^b24 Salmo 22:18.

Ca₂jon₃ Jesús

(Mateo 27:45-56; Marcos 15:33-41; Lucas 23:44-49)

²⁸ Cang₂ gué₄ jaun₂ né₃, ia₁ jme₁ma₂ñi₅ bá₄ Jesús a₂ma₂ca₂rë₃'ñia₅ ca₂le₃jé₃, ia₁jaun₂ le₃ti₃ jág₁ tio'₅₄ ne₄ Si₂, ca₂juá'₂:

—Jmig₂ i₁gui'₁ jniá₂.

²⁹ Jë₄ jaun₂ jme₁chí'₄ caun₂ ni₁dsig₁ a₂'a₄ jmig₂ dsi'₃, jaun₂ ca₂tiá₂ dsa₂ caun₂ ni₁jau₂ 'ñi₃, ca₂guioin₃ quian'₅₄ jmig₂ dsi'₃ jaun₂. Jaun₂ ca₂chi₃dsí₂ dsa₂ nei'₅₄ caun₂ ni₁'ma₂ hisopo jaun₂ ca₂chóg'₃ dsa₂ të₂ mi₂'o₄ Jesús. ³⁰ Jme₁ma₂në₂'én'₂ jmig₂ dsi'₃ jaun₂, jaun₂ ca₂juá'₂:

—Ma₂ca₂lë₃.

Jaun₂ né₃ ca₂sióg₂ mi₂dsi₅₄, ca₂jáng'₃ jme₂dsí₂ quió'₅.

Ca₂'ág'₂ 'lióg₂ ñi₁chen'₂ quió'₅ mi₂dsi₂con₂ Jesús

³¹ Jme₁lé₄ jmig₄ a₂jmo₅ dsa₂ co₂jñia₅₄ Jmig₄ Të₂'in₅₄, jaun₂ tsá₃ 'nio₃ dsa₂ judíos jua'₅₄ lia'₂ ma₂le₁ton₅ jaun₂ ni₁ñi₁₂ dso'₂ cróg₄ jmig₄ sa₅₄, ia₁ jmig₄ juë'₂ lin₃ bá₄ sa₅₄ jaun₂. 'Uig₅₄ jaun₂ né₃ ca₂mi₃ ne₄ Pilato a₂chein₃ 'lióg₂ a₂qui₂dsi₃jio₅₄ dsi₂tag₄ 'éi₂, jaun₂ gué₄ të₂. ³² Jaun₂ né₃ ca₂i₁len₅₄ 'lióg₂ ca₂i₁jio₂ dsi₂tag₄ i₂le₂'uig₅₄; ján₃ bá₄ le₂jaun₂ ca₂jmo₃ quian'₅₄ i₂jan₂ i₂chi₁ton₅ cróg₄ con₂ Jesús. ³³ La₁ jme₁ca₂jme₃quiáin₃ con₂ Jesús, ca₂jág₃ jme₁ma₂join₂₃ bá₄; 'uig₅₄ jaun₂ né₃ tsá₃ ma₂ca₂jio₃ dsi₂tag₄ 'éi₂. ³⁴ La₁ ca₂'ág'₂ jan₂ 'lióg₂ mi₂dsi₁con₂ Jesús quian'₅₄ ñi₁chen'₂ quió'₅, jaun₂ dsi₂jui₅ le₂jaun₂ ca₂'io₂ jmi₂ quian'₅₄ jmig₂. ³⁵ Jan₂ dsa₂ i₂ca₂të₂ ne₄ i₂jáng'₅ jág₁ dsau₅ la₂; ton'₂ tí₅ bá₄ jág₁ dsau₅ a₂jáng'₅. Ján₃ bá₄ ñi₅ dsa₂ 'éi₂ a₂juá'₂ jág₁ tí₅ të₃dsón'₂, ia₁jaun₂ le₃'én'₂ 'nia'₂ ján₃. ³⁶ Ia₁ a₂ca₂lë₃ la₂, ca₂lë₃ ia₁jaun₂ le₃ti₃ jág₁ a₂rë₂ton₅ ne₄ Si₂ a₂juá'₂: “Lia'₂ 'i₁caun₂ mu₄ 'éi₂ tsá₃ qui₃jio₃ dsa₂.”^c ³⁷ Le₂jaun₂ guë'₂ táng₃ juá'₂ ne₄ Si₂ ja₁siá'₂: “Jág₂ dsa₂ jíin₂ 'éi₂ i₂ca₂'ág'₂ dsa₂ quió'₅.”^d

Ca₂'on₃ Jesús

(Mateo 27:57-61; Marcos 15:42-47; Lucas 23:50-56)

³⁸ Cang₂ gué₄ jaun₂ né₃, ca₂mi₃ jan₂ dsa₂ i₂chen₂ José, i₂chan₂ juig₂ Arimatea, i₂jme₁lín₄ jan₂ dsa₂ i₂quián₅ Jesús, la₁ia₁ jme₁'éin₂ con'₂ të₃co'₅₄ bá₄, ia₁ a₂gain₃ dsa₂ judíos; ca₂mi₃ Sé₄ 'éi₂ ne₄ Dsi₄má'₂ Pilato a₂con₂ ni₁ñi₁ 'lag₄ Jesús. Ca₂cuë₃ bá₄ Pilato jmig₄, jaun₂ ñe₄ Sé₄ ca₂i₁sioin₅ 'lag₄, jaun₂ ca₂tág₃. ³⁹ Ján₃ bá₄ ca₂dsióg₃ Nicodemo i₂jme₁ca₂i₁dsia₂ jág₁ le₂jñiá₅ quian'₅₄ Jesús a₂'uë₂. Jme₁quian₅ 'éi₂ con'₂ guióg₂-guiá₂ kilos mirra quian'₅₄ áloes a₂ma₂rë₂güín₅. ⁴⁰ Jaun₂ ca₂tág₃ Sé₄ quian'₅₄ Nicodemo ca₂tág₃ 'lag₄ ca₂lio₃ quian'₅₄ tsi₁'mi'₂ tióg₃ lia'₂ jma₃quian'₅₄ mi₂ro₂ jaun₂, lia'₂ jme₁lé₄ tag₄ chí'₅ quió'₅ dsa₂ judíos

^c36 Éxodo 12:46; Números 9:12; Salmo 34:20.

^d37 Zacarías 12:10.

a₂jme₁'óin₂ 'lag₄. ⁴¹ Cau₅ ja₁ca₂tion₃ dsa₂ cróg₄ Jesús, jme₁lé₄ caun₂ ja₁cha₂ ni₁'ma₂ a₂'ag₅ míg₂. Jaun₂ jë₄ jaun₂ jme₁dsi₅₄ caun₂ tau₂ 'ñio₅ 'mí₂ ja₁tsá₃ 'ein₂ jme₁ma₂ton₂' dsa₂ 'i₁jan₂ 'lag₄. ⁴² Jaun₂ 'uig₅₄ ia₁ a₂jme₁lé₄ jmig₄ a₂jmo₃ dsa₂ judíos co₂jñia₅₄ quió₅, ton₂' 'uig₅₄ ia₁ a₂jme₁lé₄ ma₂quián₅ jaun₂ tau₂ 'ñio₅, jaun₂ ja₁jaun₂ ca₂quio₅ Sé₄ quian₅₄ Nicodemo ca₂quioin₂₃ Jesús.

Ca₂jen₅₄ Jesús

(Mateo 28:1-10; Marcos 16:1-8; Lucas 24:1-12)

20 ¹ Jë₁le₂'uig₅₄ jmig₄ semana, ñe₄ María chan₂ Magdala ja₁dsi₅₄ tau₂ 'ñio₅, të₂ o₃'iog₂ të₃ qui₁né₃ gué₄ le₂jaun₂. Jaun₂ ca₂jág₃, jme₁ma₂rë₃jñia₅₄ bá₄ ni₁cang₁ 'o₄ tau₂ 'ñio₅ jme₁dsióg₃. ² Jaun₂ në₃ ca₂ñái₃ co₂chi₅₄ ja₁jme₁'en₅₄ Si₂mu₅₄ Pe₄ quian₅ chi₂ dsi₂guia₃-tín₂ jan₂ i₂ñí₄ lë₃ jme₁'nio₃ Jesús 'éi₂, jaun₂ ca₂juá₂:

—Ma₂në₂dsen₅ dsa₂ Te₁gui₅₄ dsi₂néi₂ tau₂ 'ñio₅ ja₁jme₁roin₂₃, jaun₂ tsá₃ ne₄ a₂já₄ në₂quio₅ dsa₂.

³ Jaun₂ në₃ Pe₄ quian₅₄ chi₂ dsi₂guia₃-tín₂ jan₂ 'éi₂ ca₂'uñin₂ jaun₂ i₃lén₂ ja₁dsi₅₄ tau₂ 'ñio₅. ⁴ Le₃oin₃ bá₄ i₃lén₂ co₂lë₅ co₂'ei₅; la₁ i₂jan₂ 'éi₂ ca₂ñi₃ gué₄ co₂chi₅₄ con₂' gué₄ Pe₄, jaun₂ jñiái₅ bá₄ ca₂dsióg₃ ja₁dsi₅₄ tau₂ 'ñio₅. ⁵ Jaun₂ ca₂jmo₃ i₁jñin₂ ca₂ñéi₃ ne₅₄, jaun₂ ca₂jág₃, jaun₂ bá₄ jme₁nio₅ tsi₁'mí₂ tióg₃, la₁ia₁ tsá₃ ca₂'í₃ dsi₂néi₂. ⁶ Jaun₂ gué₄ ca₂dsióg₃ Si₂mu₅₄ Pe₄ chi₁co₅₄ quió₅, jaun₂ ca₂'í₃ dsi₂néi₂ tau₂ 'ñio₅. Jaun₂ ca₂jág₃ 'éi₂ tsi₁'mí₂ tióg₃: jaun₂ bá₄ jme₁nio₅ ja₁jaun₂; ⁷ ján₃ bá₄ ca₂jág₃ pe₁guí₄ a₂ca₂lio₃ mi₂dsi₄ Jesús. La₁ tsá₃ jme₁ron₅ co₂lë₅ quian₅₄ tsi₁'mí₂ tióg₃ jaun₂; cau₅ bá₄ jme₁ron₅ jme₁rë₂jon₅. ⁸ Jaun₂ bá₄ ca₂'í₃ chi₂ dsi₂guia₃-tín₂ jan₂ 'éi₂, i₂dsióg₃ le₂'uig₅₄; ca₂të₂ ne₅₄, jaun₂ ca₂rë₃'éin₂. ⁹ (Ia₁ tsá₃ jme₁ma₂ñí₂ gué₄ dsí₅ jág₁ a₂chi₁ton₅ ne₄ Si₂, a₂tion₅₄ niog₅ jen₅₄ Jesús jin₄ 'lag₄.)

¹⁰ Jaun₂ në₃, i₂len₃ bá₄ táng₃ chi₂ dsi₂guia₃-tín₂ 'éi₂ quió₅.

Ca₂jme₃jñia₅ Jesús ne₄ María chan₂ Magdala

(Marcos 16:9-11)

¹¹ La₁ jaun₂ bá₄ jme₁chén₄ María ca₁'né₄ tau₂ 'ñio₅, 'o₂₃. Të₁lia₂ 'o₂₃ jaun₂, ca₂jmo₃ i₁jñin₂ a₂ca₂jág₃ të₂le₃ 'ñi₃'o₃ tau₂ 'ñio₅, ¹² jaun₂ ca₂jñin₂ on₃ ángeles i₂le₁qui₂ 'mí₂ tiog₂, tiáin₅ jë₄ jme₁ron₅ ni₁ñi₁ Jesús; jan₂ jme₁guá₄ të₂le₃ ja₁lé₄ chi₁gui₂, i₂jan₂ guë₂ ja₁jme₁lé₄ a₃tag₅.

¹³ Jaun₂ ca₂ñag₃ ángeles ca₂ñí₃ María:

—'Io₅₄, é₂le₃ 'au₂?

Jaun₂ ca₂ñag₃:

—Ia₁ ma₂në₂te₃ bá₄ dsa₂ Te₁gui₅₄ quiáng₃, jaun₂ tsá₃ guion₄ jniá₂ a₂já₄ në₂quio₅ dsa₂.

¹⁴ Jë₂ bá₄ ca₂'ñiai₂ jág₁ në₅, jme₁ca₂jéin₃, jaun₂ ca₂jñin₂ Jesús jme₁chén₄; la₁ tsá₃ jaun₂ jme₁ñi₅, Jesús bá₄ 'éi₂.

- ¹⁵ Jaun₂ né₃ ca₂ɲag₃ Jesús:
 —Io₅₄, ɛ'e₂ lë₃ 'au'₂ 'ne'₂? ɛ'I₂'ein₂ 'nag'₂?
 Jaun₂, ia₁ a₂lín₂ María a₂lín₅ 'éi₂ dsa₂ i₂jmo₅ 'í₁ 'uë₃ jaun₂, jaun₂
 ca₂juá'₂:
 —Gui'₅₄, chi₂jua'₂ 'ne₂ ne₂te'₅₄, jua'₅₄ a₂já'₄ nē₂quoin'₂, ia₁jaun₂ tē₅₄
 jniá₂.
¹⁶ Jaun₂ ca₂juá'₂ Jesús:
 —iMaría!
 Jaun₂ ca₂jén'₃ María jaun₂ ca₂juá'₂ quian'₅₄ jág₁ jmei₅ hebreo:
 —iRaboni! —co₂'nió'₄ a₂juá'₂: Tē₅ quiáng₃.
¹⁷ Jaun₂ ca₂juá'₂ Jesús:
 —Tsá₃ lë₁jma'₂ quió₃, ia₁ tsá₃ ma₂uíg₂ gué₄ jniá₂ ja₁con₂ Ne'₃. La₁
 guan'₂ o₂chei'₅₄ rín'₃ jniá₂, a₂uíg₂ jniá₂ ja₁con₂ Ne'₃, ja₁con₂ Néi'₅ 'nia'₂
 né₃, ja₁con₂ Diú₄ quiáng₃, ja₁con₂ Diú₄ quián'₂ 'nia'₂ né₃.
¹⁸ Jaun₂ bá₄ ɲó₃ María chan₂ Magdala 'éi₂ ca₂i₁chi'₄ chi'₂ dsi₂guia₃-tín₂
 a₂jme₁ma₂nē₂jín₂ Te₁gui'₅₄, a₂jme₁ma₂nē₂juá'₂ 'éi₂ jág₁ jaun₂.

Ca₂jme₃jnia₅ Jesús ne₄ chi'₂ dsi₂guia₃-tín₂
 (Mateo 28:16-20; Marcos 16:14-18; Lucas 24:36-49)

- ¹⁹ Jme₁ca₂nei₂ jë₁le₂'uig₅₄ jmi₄ semana jaun₂ né₃, jme₁tion'₅₄ chi'₂
 dsi₂guia₃-tín₂ le₁ɲii'₂, qui₂le₁jnág₅ 'né₅ ja₁tioin'₅₄, ia₁ a₂gain₃ dsa₂ judíos.
 Jaun₂ ca₂'í₃ Jesús, jaun₂ ca₂nau₂ dsi₂jo₂ quió'₅ 'éi₂, jaun₂ ca₂juá'₂:
 —Ju₁'ei₅ tei₄ 'au'₂ 'nia'₂.
²⁰ Jme₁ma₂ca₂juá'₂ le₂nē₅, ca₂'ë₃ mi₂gu₂ quian'₅₄ mi₂dsi₁coin₂. Jaun₂
 ca₂jmo₃ 'io'₂ chi'₂ dsi₂guia₃-tín₂ jme₁ca₂jín₂ Te₁gui'₅₄.
²¹ Jaun₂ ca₂juá'₂ táng₃ Jesús:
 —Ju₁'ei₅ tei₄ 'au'₂ 'nia'₂. Ju₁lia'₂ ca₂chei₃ Ne'₃ jniá₂, ján₃ bá₄ le₂jaun₂
 tsin₅₄ jniá₂ 'nia'₂.^e
²² Jaun₂ né₃ ca₂jéi₂ dsí₂ ne₄ quió'₅ dsa₂ 'éi₂, jaun₂ ca₂juá'₂:
 —Guen'₅₄ 'nia'₂ Jme₂dsí₂ Jɲiós.²³ Chi₂jua'₂ 'ein₂ i₂ca₂'én'₃ 'nia'₂ dsáu₁,
 ma₂qui₂ca₂i₃'én₂ bá₄ dsáu₁ 'éi₂; chi₂jua'₂ 'ein₂ tsá₃ ca₂'én'₃ 'nia'₂ dsáu₁,
 tē₃'ɲiá₄ dsáu₁ ja₁coin₂.

Jág₅ To₁má₄ jín₂ Te₁gui'₅₄ a₂ma₂ca₂jein'₅₄

- ²⁴ La₁ To₁má₄ né₃, jan₂ chi'₂ dsi₂guia₃-tín₂ i₂tē'₂ dsa₂ Dsa₂ Tsin'₅₄, tsá₃
 jme₁'ein₅₄ jë₄ quió'₅ riin'₅₄ lia'₂ con'₂ jme₁dsióg₃ Jesús. ²⁵ Jaun₂ lë₃,
 jme₁ca₂juá'₂ chi'₂ dsi₂guia₃-tín₂ riin'₅₄:
 —Ma₂nē₂jín₄ jnia'₅₄ Te₁gui'₅₄.
 La₁ To₁má₄ né₃ ca₂juá'₂:

^e21 'Nio'₂ ja₁ton₅ Juan 17:18.

—Ně₁jua'₂ tsá₃ ca₂jág₃ jniá'₂ léi₄ mi₂gu₂ ja₁ca₂i₃ba₅₄ mi₂ñí'₁, ca₂lia'₂ ca₂tiá'₃ chi₁gu₃ tau₂ a₂ca₂lě₃ quian'₅₄ mi₂ñí'₁, ca₂lia'₂ ca₂tiá'₃ mi₂gu₃ mi₂dsi₁coin₂, tsá₃ le₃'éng₂.

²⁶ Jñia₃ jmi₄g₄ can₂g₄ gué₄ jaun₂, jme₁le₁ñi'₂ táng₃ chi'₂ dsi₂guia₃-tín₂ quiáin₅ caun₂ dsi₂néi₂, le₂jaun₂ gué₄ né₃ jme₁'en₅₄ To₁má₄ jë₄ quió'₅ 'éi₂. Jaun₂ né₃, o₁jñia'₅₄ qui₂le₁jnág₅ 'né₅ ja₁tioin'₅₄, ca₂'í₃ Jesús, ca₂nau₂ dsi₂jo₂ quió'₅ 'éi₂, jaun₂ ca₂juá'₂:

—Jui₁'ei₅ tei₄ 'au'₂ 'nia'₂.

²⁷ Jaun₂ né₃ ca₂juá'₂ ca₂tsí'₃ To₁má₄:

—'Ñia₅ i₂tio'₂ chi₁gog'₂ ja₁lá₃, jag₄ mi₂gu₃; i₂tio'₂ gog'₂ mi₂dsi₁cong₂. Tsá₃ lě₁jmo₂ a₂tsá₃ 'éng'₂, jui₁le₂'éng'₂ bá₄.

²⁸ Jaun₂ né₃ ca₂ñag₃ To₁má₄:

—iTe₁gui'₅₄ quiáng₃, Diú₄ quiáng₃ né₃!

²⁹ Jaun₂ ca₂juá'₂ Jesús:

—Ně₃ gué₄ 'éng'₂ 'uig₅₄ ia₁ a₂ně₂jag'₅₄ jniá'₂. 'E₂ gué₄ dsen₃ jui₁lia'₂ dsa₂ i₂tsá₃ ca₂jág₂, la₁ 'éin₂ bá₄.

Ta₁ a₂quí'₅ si₂ la₂

³⁰ Jaun₂ né₃, 'líong₂ bá₄ léi₄ jué'₂ siá'₂ ca₂jmo₃ Jesús ne₄ chi'₂ dsi₂guia₃-tín₂ quiáin₅ a₂tsá₃ tio'₅₄ ne₄ si₂ la₂. ³¹ La₁ia₁ qui₂rě₂ton₅ a₂la₂, ia₁jaun₂ le₃'én'₂ 'nia'₂ a₂lín₅ Jesús I₂rě₂'ín₁ quián₅ Diú₄, ton'₂ lín₅ Ja₁ñi'₅₄ Diú₄, ia₁jaun₂ jë₁ma₂qui₂ca₂rě₃'én'₂ 'nia'₂, le₃chan'₂ bá₄ 'nia'₂ co₂tan₅₄ le₃quió'₅ 'éi₂.

Ca₂jme₃jñia₅ Jesús ne₄ guion₃ chi'₂ dsi₂guia₃-tín₂ quiáin₅

21 ¹ Cang₂ gué₄ jaun₂, ca₂jme₃jñia₅ táng₃ Jesús ne₄ chi'₂ dsi₂guia₃-tín₂ quiáin₅ chei'₅₄ Jmi₁ñí'₄ Tiberias.^f Le₂la₂ bá₄ ca₂lě₃:

² Jme₁tion'₅₄ co₂lě₅ Si₂mu₅₄ Pe₄; To₁má₄, i₂tě'₂ dsa₂ Dsa₂ Tsin'₅₄; Natanael i₂chan₂ juig₂ Caná ja₁tén₄ 'uě₃ Galilea; le₃on₃ ja₁ñi'₅₄ Zebedeo né₃; quiaín₅₄ on₃ gué₄ chi'₂ dsi₂guia₃-tín₂ sián'₂ quián₅ Jesús. ³ Jaun₂ ca₂juá'₂ Si₂mu₅₄ Pe₄:

—Nei₅₄ i₁cháng'₃ ju₄.

Jaun₂ ca₂ñag₃ 'éi₂:

—Ján₃ bá₄ dsau₅₄ jñia'₅₄ quian'₅₄ 'ne₂.

Jaun₂ i₃lén₂, ca₂uíg₂ 'ñió'₃ caun₂ tsi₁mu₅, la₁ a₂'uě₂ jaun₂ tsá₃ ju₄ ca₂join₃ 'i₁jan₂.

⁴ Jme₁ca₂jñia₃ táng₃ jaun₂, jaun₂ jme₁chén'₄ Jesús chei'₅₄ jmi₁ñí'₄, la₁ tsá₃ jaun₂ ñi₅ chi'₂ dsi₂guia₃-tín₂ jñia'₅₄ Jesús bá₄ 'éi₂. ⁵ Jaun₂ né₃ ca₂juá'₂ Jesús:

^f 1o₃, Jmi₁ñí'₄ Galilea.

—'Nia'₂ chi'₂, tsa₁ ju₄ chan₂ quián'₂ 'nia'₂?

Jaun₂ ca₂ŋag₃ 'éi₂:

—Lia'₂ 'i₁jan₂.

⁶ Jaun₂ ně₃ ca₂juá'₂ Jesús:

—Tiong₂ 'nia'₂ 'má₅ quiáng'₂ tē₂le₃ gu₂ ne₁ tsi₁mu₅, jaun₂ join'₅₄ 'nia'₂.

Jaun₂ le₂jaun₂ bá₄ ca₂jmo₃. Jme₁co₂lág₂ jaun₂ tioen'₅₄ tsá₃ lé₂ dsí₃ tsi₁ 'má₅ dsi₂jmi₂g₂, ia₁ a₂ŋí₄ lē₃ juin₅ i₁ju₁ jme₁tion'₅₄ 'ŋió'₃.

⁷ Jaun₂ ně₃ ca₂juá'₂ chi'₂ dsi₂guia₃-tín₂ i₂jme₁'nio₃ Jesús gué₄ lin₃, ca₂tsí'₃ Pe₄:

—iTe₁gui'₅₄ bá₄ ó₃!

Jē₂ bá₄ con'₂ ca₂nág₂ Si₂mu₅₄ Pe₄, Te₁gui'₅₄ bá₄ 'éi₂, ca₂quí'₂ tsin'₅₄ jang₄ le₃co'₅₄ (ia₁ jme₁ma₂nē₂ŋiá'₂ a₂jme₁jmo₃ ta₁) jaun₂ ca₂tián₂ dsi₂jmi₂g₂. ⁸ Chi'₂ dsi₂guia₃-tín₂ riin'₅₄ guē'₂ ně₃, ca₂dsi₃lein₃ bá₄ tē₂ chei'₅₄ jmi₁ŋí'₄ quian'₅₄ tsi₁mu₅ qui₂tsi₂cuín'₅ tsi₁ 'má₅, ca₂lia'₂ rē₂can'₂ ju₄. Ia₁ tsá₃ uíng₂ jme₁tióin'₅₄ ja₁lé₄ chei'₅₄ jmi₁ŋí'₄: con'₂ caun₂ 'ŋiá₂-láu₂ metros bá₄ jme₁tí₄. ⁹ Jme₁ca₂sióin₃ 'uē₃ ně₃, ca₂jág₃ a₂ma₂nio₅ si₂ tá₃, ján₃ bá₄ jme₁ma₂dsín₂ jan₂ ju₄ ne₄ si₂; ján₃ bá₄ jme₁te₁'i₁ i₁ŋí'₄ ně₃.

¹⁰ Jaun₂ ca₂juá'₂ Jesús:

—ŋia₅ jan₂-on₃ ju₄ i₂lia'₂ nē₂chan'₂ 'nia'₂.

¹¹ Jaun₂ ca₂uíg₂ Si₂mu₅₄ Pe₄ guei'₅₄ tsi₁mu₅. Jaun₂ ca₂tsé'₃ tsi₁ 'má₅ ca₂tē₂ chei'₅₄ jmi₂g₂ lia'₂ rē₂can'₂ tion'₅₄ ju₄ ca₁can'₅₄. Con'₂ caun₂ 'ŋiá₂-lón₂ rē₂dsí₂ tē₂láu₃-guia₃-ún₂ (153) ju₄ jme₁tion'₅₄. La₁ o₁ŋia'₅₄ la₂ juin₅ ju₄ jme₁tion'₅₄, tsá₃ ca₂gag₂ bá₄ gué₄ tsi₁ 'má₅. ¹² Jaun₂ ca₂juá'₂ Jesús ca₂tsí'₃ chi'₂ dsi₂guia₃-tín₂:

—I₂nó'₅ 'nia'₂ i₂qué'₂ má₃ tē₂ o₃'iog₂.

Jaun₂ lia'₂ 'i₁jan₂ chi'₂ dsi₂guia₃-tín₂ tsá₃ tiá₂ dsí₅ ŋag₃ i₂'ein₂ 'éi₂, ia₁ ŋi₅ bá₄ jaun₂ Te₁gui'₅₄ bá₄ 'éi₂. ¹³ Jaun₂ ně₃ ca₂jme₃quián₃ Jesús, ca₂can₃ i₁ŋí'₄, jaun₂ ca₂cué'₃ chi'₂ dsi₂guia₃-tín₂. Ján₃ bá₄ le₂jaun₂ ca₂jmo₃ quian'₅₄ ju₄. ¹⁴ A₂nē₅ jē₁ca₂tē₂ 'nag'₂ ráun₂ a₂ca₂jme₃nia₅ Jesús ne₄ chi'₂ dsi₂guia₃-tín₂ quián₅ cang₂ jme₁ca₂jein'₅₄ ja₁jme₁rē₂'liin₅₄.

Dsia₅ Jesús jág₁ quian'₅₄ Si₂mu₅₄ Pe₄

¹⁵ Cang₂ jme₁ca₂lē₃ gué'₅ má₃ tē₂ o₃'iog₂, ca₂ŋag₃ Jesús ca₂ŋí'₃ Si₂mu₅₄ Pe₄:

—Si₂mu₅₄, ja₁ŋi'₅₄ Juan₅₄,⁸ tdsau₅ 'nióg'₃ jniá₂ lia'₂ con'₂ gué₄ dsa₂ tión₂ la₂?

Jaun₂ ca₂ŋag₃ Pe₄:

—Ján₅, Te₁gui'₅₄. ŋi'₅₄ bá₄ 'ne₂ jaun₂, a₂'nió₃ jniá₂ 'ne₂.

Jaun₂ ca₂juá'₂ Jesús:

—Jme₁tan₅₄ guein₂ já'₂ cha'₂ quiáng₃ jaun₂.

¹⁶ Jaun₂ ca₂ŋag₃ táng₃ Jesús jē₁ca₂tē₂ táng₃ ráun₂:

⁸15 o₃, ja₁ŋi'₅₄ Jonás.

—Si₂mu₅₄, ja₁ñi'₅₄ Juan₅₄, ¿'nióg'₃^h jniá'₂?
 Jaun₂ ca₂ṇag₃ Pe₄:
 —Ján₅, Te₁gui'₅₄. Ñi'₅₄ bá₄ 'ne₂ jaun₂ a₂'nió₃ jniá'₂ 'ne₂.
 Jaun₂ ca₂juá'₂ Jesús:
 —Jmo₄ 'í₁ já'₂ cha'₂ bë'₅₄ quiáng₃ jaun₂.
¹⁷ Jaun₂ ca₂ṇag₃ táng₃ Jesús jë₁ca₂té'₂ 'nag'₂ ráun₂:
 —Si₂mu₅₄, ja₁ñi'₅₄ Juan₅₄, ¿'nióg'₃ jniá'₂?
 Jaun₂ ca₂í'₃ qui'₂ dsí₅ Pe₄ ia₁ ca₂ṇag₃ Jesús jë₁ca₂té'₂ 'nag'₂ ráun₂,
 “¿'nióg'₃ jniá'₂?” Jaun₂ ca₂juá'₂:
 —Te₁gui'₅₄, ca₂le₃jé'₃ bá₄ ñi'₅₄ 'ne₂. Ñi'₅₄ bá₄ 'ne₂ jaun₂ a₂'nió₃ⁱ jniá'₂
 'ne₂.
 Jaun₂ ca₂juá'₂ Jesús:
 —Jme₁tan₅₄ já'₂ cha'₂ bë'₅₄ quiáng₃ jaun₂. ¹⁸ A₂dsi₂jó'₃ juá'₅ jniá'₂, lia'₂
 con'₂ jme₁lín'₄ gué'₄ dsa₂ chi'₂, jme₁ting'₂ jme₁quí'₂ tsíng'₂, jaun₂
 jme₁góg'₂ a₂já'₄ 'niog'₂ gog'₅₄; la₁ia₁ jë₁ma₂lín'₅ jan₂ dsa₂ ma₂guen'₂,
 jaun₂ nei'₅₄ gog'₂, jaun₂ i₂sián'₂ bá₄ quei'₃ tsíng'₂, jaun₂ dsi₃jio₃ ja₁tsá'₃
 'niog'₂ gog'₅₄.
¹⁹ Jme₁ca₂juá'₂ Jesús le₂në₅, ca₂jmo₃ jág₁ a₂'ë₂₃ 'e₂ ne₅₄ 'mú₃ a₂'i₄ 'éi'₃
 dsi₃ñí'₂ Pe₄, a₂jme₃ñiai₂₃ a₂jlán'₁ Diú₄. Jaun₂ ca₂juá'₂ táng₃ ca₂tsí'₃ Pe₄:
 —i'Éin₃ jniá'₂!

Chi'₂ dsi₂guia₃-tín₂ i₂'nió₄ gué'₄ quián₅ Jesús

²⁰ Jme₁ca₂jén'₃ Pe₄ le₃ca'₃, ca₂jág₃ já₅ chi₁co'₅₄ quió'₅, chi'₂ dsi₂guia₃-
 tín₂ i₂'nio₃ Jesús gué'₄ lín₃; chi'₂ dsi₂guia₃-tín₂ 'éi₂ i₂jme₁guá'₄ cau₅ le₃jén'₃
 quió'₅ Jesús ja₁ca₂gué'₃ má₃ të₂le₃ ca₂nei₂, ján₃ bá₄ 'éi₂ i₂ca₂ṇag₃ ca₂ñí'₃
 Jesús, jme₁ca₂juá'₂: “Te₁gui'₅₄, ¿i₂'ein₂ 'éi₂ i₂jáng'₂ quiáng'₂?” ²¹ Jaun₂
 jme₁ca₂jág₃ Pe₄ ca₂jín₂ 'éi₂, ca₂ṇag₃ ca₂ñí'₃ Jesús:
 —Te₁gui'₅₄, i₂la₂ gué'₂: ¿'e₂ jén'₄?
²² Jaun₂ ca₂ṇag₃ Jesús:
 —Chi₂jua'₂ 'nio₃ jniá'₂ a₂chan₂ i₂në₅ ca₂lia'₂ jë₁ma₂guión'₃ táng₃ jniá'₂,
 ¿'e₂ bá₄ 'uig₅₄ 'ne₂ 'i₅ 'au'₂? La₁ia₁ 'ne₂ 'éin₃ jniá'₂.
²³ Jaun₂ në₃ ca₂i₃'ag₅₄ jág₁ në₅ jin₄ riin'₅₄ a₂tsá₃ jón₂ chi'₂ dsi₂guia₃-tín₂
 'éi₂. La₁ia₁ on₃jua'₅₄ jaun₂ ca₂juá'₂ Jesús a₂tsá₃ jón₂ 'éi₂; a₂jaun₂ bá₄
 ca₂juá'₂: “Chi₂jua'₂ 'nio₃ jniá'₂ a₂chan₂ i₂në₅ ca₂lia'₂ jë₁ma₂guión'₃ jniá'₂
 táng₃, ¿'e₂ bá₄ 'uig₅₄ 'ne₂ 'í₅ 'au'₂?”
²⁴ Chi'₂ dsi₂guia₃-tín₂ 'éi₂ bá₄ la₂, i₂jáng'₅ jág₁ dsau₅ 'a₂ lia'₂ ca₂lë₃,
 i₂ca₂tó'₂ jág₁ la₂ ne₄ si₂ në₃. Jaun₂ ne₄ bá₄ jniog₄, a₂tí₅ bá₄ jág₁ dsau₅
 a₂jáng'₅ 'éi₂.

^h15-17 griego: agapeo (jui₁lia'₂ 'a₂ lia'₂ 'nio₃ Diú₄ dsa₂ mi₂güí'₃).

ⁱ15-17 griego: fileo (jui₁lia'₂ 'a₂ lia'₂ 'nio₃ dsa₂ mi₂güí'₃ rin'₅₄ a₂mei₅₄ quiáin₅).

²⁵ Ján₃ bá₄ cha₂ 'lióng₂ a₂siá'₂ a₂ca₂jmo₃ Jesús; jua'₅₄ mei'₂ gué'₃
 dsi₃to'₅₄ ne₄ si₂ le₂caun₂ le₂caun₂, ca₂lia'₂ jñia'₅₄ ta₁caun₂ mi₂güí'₃ bá₄
 tsá₃ jme₁'éi'₄ si₂ jua'₅₄ ca₂'ué'₃ dsa₂, lín₂ jniá'₂.^j
 Co₂ně₅.

^j25 A₂lin₅₄ chog₅₄ si₂ juá'₂ ján₃: “A₂meí₃.”